

二支

九十三

永樂大典

卷九百三
之九百四

IO 34056 a

永樂大典卷之九百三

二支

詩

寒山詩集三字詩 寒山道無人到。若能行。稱十號。有蟬鳴。無鴉噪。黃葉落。白雲掃。石磊磊。山隩隩。我獨居。名善導。子細看。何相好。寒山寒。冰鎖石。藏山青。現雪白。日出照。一時釋。從茲暖。養老客。我居山。勿人識。白雲中。常寂寂。寒山深。稱我心。純白石。勿黃金。泉聲響。撫伯琴。有子期。辨此音。

重巖中。足清風。扇不搖。涼氣通。明月照。白雲籠。獨自坐。一老翁。寒山子。長如是。獨自居。不生死。五字詩 我在村中住。衆推無比方。昨日到城

下。仍被狗形相。或嫌袴太窄。或說衫少長。撐却鷄子眼。雀兒舞堂堂。死

生原有命。富貴本由天。此是古人語。吾今非謬傳。聰明好短命。癡騃却

長年。鈍物豐財貨。惺惺漢無錢。國以人爲本。猶如樹因地。地厚樹扶疎。地薄樹顛顛。不得露其根。枝枯子先墜。決陂以取魚。是求一期利。秉志不可卷。須知我匪席。浪造山林中。獨卧盤陀石。辯士來勸余。速令受金壁。鑿墻植蓬蒿。若此非有益。報汝修道者。進求虛勞神。人有精靈物。無字

復有文。呼時歷歷應。隱處不居存。叮嚀善保護。勿令有點痕。去年春鳥鳴。此時思兄弟。今年秋菊爛。此時思發生。綠水千場咽。黃雲四面平。哀哉百年內。腸斷憶咸京。自樂平生道。烟蘿石洞間。野情多放曠。長伴白雲閑。有路不通世。無情孰可攀。石牀孤夜坐。圓月上寒山。大海水無邊。魚龍萬萬千。遞互相食噉。冗冗癡肉團。爲心不了絕。妄想起如煙。性月澄澄朗。廓爾照無邊。自見天台頂。孤高出衆群。風搖松竹韻。月現海潮頻。下望山青際。談玄有白雲。野情便山水。本志慕道倫。富貴疎親聚。只爲多錢米。貧賤骨肉離。非關少兄弟。急須歸去來。招賢閣未啓。浪行朱雀街。踏破芒鞋底。我見一癡漢。仍居三兩婦。養得八九兒。總是隨宜手。丁戶是新差。資財非舊有。黃蘖作驢鞦。始知苦在後。新穀尚未熟。舊穀今已無。就貸一斗許。門外立踟躕。夫出教問婦。婦出遣問夫。慳惜不救乏。財多爲累愚。大有好笑事。畧陳三五箇。張公富奢華。孟子貧軼軻。只取侏儒飽。不憐方朔餓。巴歌唱者多。白雪無人和。老翁娶少婦。髮白婦不耐。老婆嫁少夫。面黃夫不愛。老翁娶老婆。一一無棄背。少婦嫁少夫。兩兩相憐態。可惜百年屋。左倒右復傾。牆屋分散盡。木植亂差橫。甃瓦片片落。朽爛不堪停。任風吹蔦塌。再豎卒難成。他賢君即受。不賢君莫與。君賢他見容。

不賢他亦拒。憐善矜不能。仁徒方得所。勸逐子張言。拋却卜商語。俗薄
真成薄。人心箇不同。殷翁笑柳老。柳老笑殷翁。何故兩相笑。俱行諛諛中。
裝車競喘嶼。翻載各瀧凍。是我有錢日。恒爲汝貸將。汝今旣飽暖。見我
不分張。須憶汝欲得。似我今承望。有無更代事。勸汝熟思量。人生一百
年。佛說十二部。慈悲如野鹿。嗔怒似家狗。家狗趕不去。野鹿常好走。欲伏
獼猴心。須聽獅子吼。笑我田舍兒。頭顱底繫濕。巾子未曾高。腰帶長時
急。非是不及時。無錢趁不及。一日有錢財。浮圖頂上立。買肉血湫湫。買
魚跳鱖鱖。君身招罪累。妻子成快活。捷死渠家去。他人誰敢遏。一朝如破
牀。兩箇當頭脫。時人見寒山。各謂是風顛。貌不起人目。身唯布裘纏。我
語他不會。他語我不言。爲報往來者。可來向寒山。摧殘荒草廬。其中煙
火蔚。借問羣小兒。生來凡幾日。門外有三車。迎之不肯出。飽食腹膨臍。箇
是癡頑物。有身與無身。是我復非我。如此審思量。遷延倚巖坐。足間青
草生。頂上紅塵墮。已見俗中人。靈牀施酒菓。世有多事人。廣學諸知見。
不識本真性。與道轉懸遠。若能明實相。豈用陳虛願。一念了自心。開佛之
知見。男兒大丈夫。作事莫莽鹵。勁挺鐵石心。直取菩提路。邪路不用行。
行之枉辛苦。不要求佛果。識取心王主。一向寒山坐。淹留三十年。昨來

訪親友。大半入黃泉。漸滅如殘燭。長流如逝川。今朝對孤影。不覺淚雙懸。
相喚採芙蓉。可憐清江裏。遊戲不覺暮。屢見強風起。浪捧鴛鴦兒。波搖

鷓鴣子。此時居舟楫。浩蕩情無已。垂楊結如煙。飛花飄似霰。夫居離婦

州。婦住思夫縣。各在天一涯。何時復相見。寄語明月樓。莫貯雙飛鷺。有

酒相招飲。有肉相呼喫。黃泉前後人。少壯湏努力。玉帶暫時華。金釵非久

飾。張翁與鄭婆。一去無消息。可憐好丈夫。身體極稜稜。春秋未三十。才

藝百般能。金鞞逐俠客。玉饌集良朋。唯有一般惡。不傳無盡燈。桃花欲

經夏。風月催不待。訪覓漢時人。能無一箇在。朝朝花遷落。歲歲人移改。今

日揚塵處。昔時爲大海。我見東家女。年可十有八。西舍競來問。願姻夫

妻佞。烹羊煮衆命。聚頭作媼殺。含笑樂呵呵。啼哭受殃決。田舍多桑園。

牛犢滿廐轍。肯信有因果。頑皮早晚裂。眼看消磨盡。當頭各自活。無袴尾

作視。到頭凍餓殺。我見百十狗。箇箇毛鬚鬚。卧者樂自卧。行者樂自行。

投之一塊骨。相與嗟嗒爭。良由爲骨少。狗多分不平。俊傑馬上郎。揮鞭

指楊柳。謂言無死日。終不作梯航。四運花自好。一朝成萎黃。醍醐與石蜜。

至死不能嘗。欲向東巖去。于今無量年。昨來攀葛上。半路困風煙。徑窄

衣難進。苔粘履不前。住茲丹桂下。且枕白雲眠。巖前獨靜坐。圓月當天

耀萬象影現中。一輪本無照。廓然神自清。含虛洞玄妙。因指見其月。月是
心樞要。讀書豈免死。讀書豈免貧。何似好識字。識字勝他人。丈夫不識
字。無處可安身。黃連搵蒜醬。忘計是苦辛。我見謾人漢。如籃盛水走。一
氣將歸家。籃裏何曾有。我見被人謾。一似園中韭。日日被人傷。天生還自
有。自聞梁朝日。四依諸賢士。寶誌萬迴師。四仙傳大士。顯揚一代教。作
持如來使。建造僧伽藍。信心歸佛理。雖乃得如斯。有爲多患累。與道殊懸
遠。拆西補東爾。不達無爲功。損多益少矣。有聲而無形。至今何處是。可
笑五陰窟。四蛇同苦居。黑暗無明燭。三毒遞相驅。伴黨六箇賊。劫掠法財
珠。斬却魔軍背。安奉湛如蘇。富兒會高堂。華燈何煒煌。此時無燭者。心
願處其傍。不意遭排遣。還歸暗處藏。益人明詎損。頓訝惜餘光。可貴天
然物。獨立無伴侶。覓他不可出。入他無門戶。促之在方寸。延之一切處。你
若不信受。相逢不相遇。多少般數人。百計求名利。心貪覓榮華。經營圖
富貴。心未片時歇。奔突如煙氣。家眷實團圓。一呼百諾至。不過七十年。冰
消瓦解置。死了萬事休。誰人承後嗣。水浸泥彈丸。方知無意智。有人把
椿樹。喚作白旃檀。學道多沙數。幾箇得泥丸。棄金却擔草。謾他亦自謾。似
聚沙一處。成團也大難。蒸沙擬作飯。臨渴始掘井。用力磨碌甑。那堪將

永樂大典卷九百三
作鏡。佛說元平等。總有真如性。但自審思量。不用閑爭競。推尋世間事。子細總要知。凡事莫容易。盡愛討便宜。護却弊成好。毀即是成非。故知雜濫口。背面總由伊。冷暖我自量。不信奴唇皮。惡趣甚茫茫。冥冥無日光。人間八百歲。未抵半宵長。此等諸癡子。論情真可傷。勸君求出離。認取法中王。天高高不窮。地厚厚無極。動物在其中。憑茲造化力。爭頭覓飽暖。作計相噉食。食果都未詳。盲兒問乳色。天下幾種人。論時色數有。賈婆如許夫。黃老元無婦。衛氏兒可憐。鍾家女極醜。渠若向西行。我便東邊走。寒山有一宅。宅中無欄隔。六門左右通。堂中見天碧。房房虛索索。東壁打西壁。其中一物無。免被人來借。寒到燒軟火。飢來煮菜喫。不學田舍翁。廣置田莊宅。盡作地獄業。一入何曾極。好好善思量。思量知軌則。儂家暫下山。入到城隍裏。逢見一群女。端正容貌美。頭戴蜀樣花。燕脂塗粉膩。金釧鏤銀朶。羅衣緋紅紫。朱顏類神仙。香帶氤氳氣。時人皆顧盼。癡愛染心意。謂言世無雙。魂影隨他去。狗齧枯骨頭。虛自舐唇齒。不解返思量。與畜何曾異。今成白髮婆。老陋若精魅。無始由狗心。不超解脫地。騶馬珊瑚鞭。驅馳洛陽道。自憐美少年。不信有衰老。白髮會應生。紅顏豈長保。但看北邙山。箇是蓬萊島。竟日常如醉。流年不暫停。埋着蓬蒿下。曉日何

冥冥。骨肉消散盡。魂魄幾凋零。遮莫敲鐵口。無因讀老經。夫物有所用。用之各有宜。用之若失所。一缺復一虧。圓鑿而方柄。悲哉空爾爲。驛驢將捕鼠。不及跛猫兒。洛陽多女兒。春日逞華麗。共折路邊花。各持挿高髻。髻高花匝匝。人見皆睥睨。別求醪醪憐。將歸見夫婿。春女銜容儀。相將南陌陔。看花愁日晚。隱樹怕風吹。年少從傍來。白馬黃金羈。何須久相弄。兒家夫婿知。欲得安身處。寒山可長保。微風吹幽松。近聽聲愈好。下有班白人。喃喃讀黃老。十年歸不得。忘却來時道。少年何所愁。愁見鬢毛白。白更何所愁。愁見日逼迫。移向東岱居。配守北邙宅。何忍出此言。此言傷老客。聞道愁難遣。斯言謂不真。昨朝始赴却。今日又纏身。月盡愁難盡。年新愁更新。誰知席帽下。元是昔愁人。兩龜乘犢車。薦出路頭戲。一蠶從傍來。苦死欲求寄。不載爽人情。始載被沈累。彈指不可論。行思却遭刺。鸚鵡宅西園。虞羅捕得歸。美人朝夕弄。出入在庭幃。賜以金籠貯。扃哉損羽衣。不如鴻與鵠。颯颯入雲飛。有一餐霞子。其居諱俗遊。論時實蕭爽。在夏亦如秋。幽澗常漑漑。高松風颯颯。其中半日坐。忘却百年愁。妾家邯鄲住。歌聲亦抑揚。賴我安隱處。此曲舊來長。旣醉莫言歸。留連日未央。兒家寢宿處。繡被滿銀牀。快傍三翼舟。善乘千里馬。莫能造我家。

謂言最幽野。巖穴深嶂中。雲雷竟日下。自非孔丘公。無能相救者。智者
君拋我。愚者我拋君。非愚亦非智。從此繼相聞。入夜歌明月。侵晨舞白雲。
馬能任口手。端坐鬢紛紛。客歎寒山子。君詩無道理。吾觀乎古人。貧富
不爲恥。應之笑此言。談何踈闊矣。願君似今日。錢是急事爾。從生不往
來。至死無仁義。言既有枝葉。心懷使驗訛。若其開小道。緣此生大僞。詐說
造雲梯。削之成棘刺。一瓶鑄金成。一瓶埏泥出。二瓶任君看。那箇瓶牢
實。欲知瓶有二。須知業非一。將此驗生因。修行在今日。一自遯寒山。養
命餐山菓。平生何所憂。此世隨緣過。日月如逝川。光陰石中火。任你天地
移。我暢巖中坐。我見世間人。茫茫走路塵。不知此中事。將何爲去津。榮
華能幾日。眷屬片時親。縱有千斤金。不如林下貧。手筆太縱橫。身材極
魁偉。生爲有限身。死作無名鬼。自古如此多。君今爭柰何。可來白雲裏。教
你紫芝歌。 氏眼鄒公妻。邯鄲杜生母。二人同共老。一種好面首。昨日會
客場。惡衣排在後。只爲着破裙。喫他殘麩麩。東家一老婆。富來三五年。
昔日貧於我。今笑我無錢。渠笑我在後。我笑渠在前。相笑儻不止。東邊復
西邊。富兒多鞅掌。觸事難祇承。倉米已赫赤。不貸人斗升。轉懷鉤距意。
買絹先揀綾。若至臨終日。吊客有蒼蠅。一爲書劔客。三遇聖明君。東守

文不賞。西征武不勳。學文兼學武。學武兼學文。今日既老矣。餘生不足云。
莊子說送終。天地爲棺槨。吾歸此有時。唯湏一幡箔。死將餒青蠅。吊不
勞。白鶴餓着首陽山。生廉死亦樂。人問寒山道。寒山路不通。夏天冰未
釋。日出霧朦朧。似我何由屆。與君心不同。君心若似我。還得到其中。天
生百尺樹。翦作長條木。可惜棟樑材。拋之在幽谷。年多心尚勁。日久皮漸
禿。識者取將來。猶堪拄馬屋。不見朝垂露。日燠自消除。人身亦如此。閻
浮是寄居。慎莫因循過。且令三毒祛。菩提即煩惱。盡令無有餘。水清澄
澄瑩。徹底自然見。心中無一事。萬境不能轉。心既不妄起。永劫無改變。若
能如是知。是知無背面。說食終不飽。說衣不免寒。飽喫須是飯。着衣方
免寒。不解審思量。只道求佛難。迴心即是佛。莫向外頭看。可畏輪迴苦。
徃復似翻塵。蟻巡環未息。六道亂紛紛。改頭換面孔。不離舊時人。速了黑
暗獄。無令心性昏。可畏三界輪。念念未曾息。纔始似出頭。又却遭沉溺。
假使非非想。蓋緣多福力。爭似識真源。一得即永得。昨日遊峯頂。下窺
千尺崖。臨危一株樹。風擺兩枝開。雨漂即零落。日曬作塵埃。嗟見此茂秀。
今爲一聚灰。自古多少聖。叮嚀教自信。人根性不等。高下有利鈍。真佛
不肯認。置力在受困。不知清淨心。便是法王印。我聞天台山。山中有琪

永樂大典卷九百三
五

樹。永言欲攀上。莫遶石橋路。緣此生悲歎。幸居將已暮。今日觀境中。颯颯鬢垂素。養子不經師。不及都亭鼠。何曾見好人。豈聞長者語。爲染在薰猶。應須擇朋侶。五月販鮮魚。莫教人笑汝。我見頑鈍人。燈心拄須彌。蟻子齧大樹。馬知力氣微。學咬兩莖菜。言與祖思齊。火急求懺悔。從今輒莫迷。君見月光照。照燭四天下。圓輝掛太虛。瑩淨能蕭灑。人道有虧盈。我見無衰謝。狀似摩尼珠。光明無晝夜。余往無方所。盤礴無爲理。時陟涅槃山。或翫香林寺。尋常只是閑。言不干名利。東海變桑田。我心誰管你。左手握驪珠。右手執慧劍。先破無明賊。神珠吐光燄。傷嗟愚癡人。貪愛那生厭。一墮三途間。始覺前程險。般若酒冷冷。飲多人易醒。余住天台山。凡愚那見形。常遊深谷洞。終不逐時情。無愁亦無慮。無辱也無榮。諸佛留藏經。只爲人難化。不唯賢與愚。箇箇心構架。造業大如山。豈解憂懷怕。那肯細尋思。日夜懷姦詐。嗟見世間人。箇箇愛喫肉。碗碟不曾乾。長時道不足。昨日設箇齋。今朝宰六畜。都緣業使牽。非干情所欲。一度造天堂。百度造地獄。閻羅使來追。合家盡啼哭。鑪子邊向火。鑊子裏淥浴。更得山頭時。換却汝衣服。出家要清閑。清閑卽爲貴。如何塵外人。却入塵埃裏。一向迷本心。終朝役名利。名利得到身。形容已顛顛。况復不遂者。虛用平

生志。可憐無事人。未能笑得汝。養兒與取妻。養女求媒娉。重重皆是業。更殺衆生命。聚集會親情。總來看盤釘。目下雖稱心。罪簿先注定。得此分段身。可笑好形質。面貌似銀盤。心中黑如漆。烹猪又宰羊。誇道甜如蜜。死復受波吒。莫更稱冤屈。後來出家子。論情入骨癢。本來求解脫。却見受驅馳。終朝遊俗舍。禮念作威儀。博錢沽酒喫。翻成客作兒。若論常快活。唯有隱居人。林花長似錦。四季色常新。或向巖間坐。旋瞻丹桂輪。雖然身暢逸。却念世間人。我見出家人。總愛喫酒肉。此合上天堂。却沉歸地獄。念得兩卷經。欺他市鄽俗。豈知市鄽俗。大有根性熟。嗟見多知漢。終日枉用心。歧路逞嘍囉。欺謾一切人。唯作地獄滓。不修來世因。忽爾無常到。定知亂紛紛。迢迢山徑峻。萬仞險隘危。石橋莓苔綠。時見片雲飛。瀑布懸如練。月影落潭輝。更登華頂上。猶待孤鶴期。松月冷颼颼。片片雲霞起。匝匝幾重山。縱目千萬里。谿潭水澄澄。徹底鏡相似。可貴玉臺物。七寶莫能比。世有多解人。愚癡學閑文。不憂當來果。誰知造惡因。見佛不解禮。覩僧倍生嗔。五逆十惡輩。三毒以爲鄰。死定入地獄。未有出頭辰。可笑是林泉。數里勿人煙。雲從巖嶂起。瀑布水潺潺。猿啼暢道曲。虎嘯出人間。松風清颯颯。鳥語聲關關。獨步繞石澗。孤陟上峰巒。時生盤陀石。偃

永樂大典卷九百三
仰攀蘿泂。遙望城隍處。唯聞鬧喧喧。水浸泥彈丸。思量無道理。浮泡夢幻身。百年能有幾。不解細思惟。將言長不死。誅剥壘千金。留將與妻子。按

三隱詩。山中舊本如此。不復校正。博古君子。兩眼如月。正要觀雪中芭蕉畫耳。昨日何悠悠。場中可憐許。上爲桃李徑。下作蘭蓀渚。復有綺羅人。

舍中翠毛羽。相逢欲相喚。脉脉不能語。丈夫莫守困。無錢湏經紀。養得一牯牛。生得五犢子。犢子又生兒。積數無窮已。寄語陶朱公。富與君相似。

夕陽下西山。草木光曄曄。復有朦朧處。松蘿相連接。此中多伏虎。見我奮迅鬣。手中無寸刃。爭不懼懾懾。出身既擾擾。世事非一狀。未能捨流

俗。所以相追訪。昨吊徐五死。今送劉三葬。日日不得閑。爲此心悽愴。寄語食肉漢。食時無逗遛。今生過去種。未來今日脩。只取今日美。不畏來生

憂。老鼠入飯瓮。雖飽難出頭。一人好頭肚。六藝盡皆通。南見趨向北。西見趨向東。長漂如汎萍。不息似飛蓬。問是何等色。姓貧名曰空。繼縷關

前業。莫訶今日身。若言由冢宅。箇是極癡人。到頭君作鬼。豈令男女貧。皎然易解事。作麼無精神。五言五百篇。七字七十九。三字二十一。都來六

百首。一例書巖石。自誇云好手。若能會我詩。真是如來母。世事何悠悠。貪生未肯休。研盡大地石。何時得歇頭。四時凋變易。八節急如流。爲報火

宅主。露地騎白牛。常聞漢武帝。爰及秦始皇。俱好神仙術。延年竟不長。
金臺旣摧折。沙石遂滅亡。茂陵與驪嶽。今日草茫茫。憶得二十年。徐步國
清歸。國清寺中人。盡道寒山癡。癡人何用疑。疑不解尋思。我尚自不識。是
伊爭得知。低頭不用問。問得復何爲。有人來罵我。分明了了知。雖然不應
對。却是得便宜。語你出家輩。何名爲出家。奢華求養活。繼綴族姓家。美舌
甜唇脣。諂曲心鈎加。終日禮道場。持經置功課。鑪燒神佛香。打鍾高聲和。
不時學客春。夜夜不得卧。只爲愛錢財。心中不脫灑。見他高道人。却嫌誹
謗罵。驢屎比麝香。苦哉佛陀耶。又見出家兒。有力及無力。上上高節者。鬼
神欽道德。君王分輦坐。諸侯拜迎逆。堪爲世福田。世人須保惜。下下低愚
者。詐現多求覓。濁濫即可知。愚癡愛財色。着却福田衣。種田討衣食。作債
稅牛犂。爲事不忠直。朝朝行弊惡。徃徃痛臀脊。不解善思量。地獄苦無極。
一朝着病纏。三年卧牀席。亦有真佛性。翻作無名賊。南無佛陀耶。遠遠求
彌勒。寒巖深更好。無人行此道。白雲高岫閑。青嶂孤猿嘯。我更何所親。
暢志自宜老。形容寒暑遷。心珠甚可保。二儀旣開闢。人乃居其中。迷汝
即吐霧。醒汝即吹風。惜汝即富貴。奪汝即貧窮。碌碌群漢子。萬事由天公。
余觀諸稚子。急離火宅中。三車在門外。載你免飄蓬。露地四衢坐。當天

萬事空。十方無上下。來往任西東。若得箇中意。縱橫處處通。可歎浮生人。悠悠何日了。朝朝無閒時。年年不覺老。總爲求衣食。令心生煩惱。擾擾百千年。去來三惡道。時人尋雲路。雲路杳無蹤。山高多嶮峻。澗澗少玲瓏。碧嶂前兼後。白雲復西東。欲知雲路處。雲路在虛空。寒山棲隱處。絕得雜人過。時逢林內鳥。相共唱山歌。瑞草聯谿谷。老松枕嵯峨。可觀無事者。憇歇在巖阿。五嶽俱成粉。須彌一寸山。大海一滴水。吸入其心田。生長菩提子。徧蓋天地中。天語汝慕道。慎莫繞十纏。無衣自訪覓。莫共狐謀裘。無食自採取。莫共羊謀羞。借皮兼借肉。懷歎復懷愁。皆緣義失所。衣食常不周。自美山間樂。逍遙無倚托。逐日養殘軀。閑思無所作。時披古佛書。徃徃登石閣。下窺千尺崖。上有雲盤礴。寒月冷颼颼。身似孤飛鶴。我見轉輪王。千子常圍繞。十善化四天。莊嚴多七寶。七寶真隨身。莊嚴甚妙好。一朝福報盡。猶若棲蘆鳥。還作牛領蟲。六趣受業道。况復諸凡夫。無常豈長保。生死如旋火。輪迴似麻稻。不解早覺悟。爲人枉虛老。平野水寬闊。丹丘連四明。仙都最高秀。群峯聳翠屏。遠遠望何極。矢矢勢相迎。獨標海隅外。處處播嘉名。我見世間人。生而還復死。昨朝猶二八。壯氣曾襟士。如今七十過。力困形顛顛。恰似春日花。朝開夜落爾。迥聳霄漢外。

雲裏路蒼蒼。瀑布千丈流。如鋪練一條。下有棲心窟。橫安定命橋。雄鎮
世界。天台名獨超。盤陀石上坐。谿澗冷淒淒。靜翫偏嘉麗。虛巖蒙霧迷。
怡然憇歇處。日斜樹影低。我自觀心地。蓮花出淤泥。君看葉裏花。能得
幾時好。今日畏人攀。明朝待誰掃。可憐嬌艷情。年多轉成老。將世比於花。
紅顏豈長保。縱你居犀角。饒居帶虎睛。桃枝折作醫。蒜殼取爲瓔。暖腹
茱萸酒。空心枸杞羹。終歸不免死。浪自覓長生。爲人常喫用。愛意須慳
惜。老去不自由。漸被他催斥。送向荒山頭。一生願虛擲。亡羊罷補牢。大意
終無極。寒山無漏巖。其巖甚濟要。八風吹不動。萬古人傳妙。寂寂好安
居。空空離譏誚。孤月夜長明。圓日常來照。虎立兼虎谿。不用相呼召。世間
有王傳。莫把同周邵。我自遯寒巖。快活長歌笑。沙門不持戒。道士不服藥。
自古多少賢。盡在青山脚。有人笑我詩。我詩合典雅。不煩鄭氏箋。豈用毛
公解。不恨會人稀。只爲知音寡。若遣赴宮商。余病莫能罷。忽遇明眼人。即
自流天下。世間一等流。誠堪與人笑。出家弊已身。誑俗將爲道。雖着離
塵衣。衣中多養蚤。不如歸去來。識取心王好。高高峯頂上。四顧極無邊。
獨坐無人知。孤月照寒泉。泉中且無月。月自在青天。吟此一曲歌。歌中不
是禪。有箇王秀才。笑我詩多失。云不識蜂腰。仍不會鶴膝。平側不解壓。

凡言取自出。我笑你作詩。如盲徒詠日。我往在村鄉。無爺亦無孃。無名無姓第。人喚作張王。並無人教我。貧賤也尋常。自憐心的實。堅固等金剛。

寒山出此語。此語無人信。蜜甜足人嘗。黃蘗苦難吞。順性生喜悅。逆意多嗔恨。但看木傀儡。弄了一場困。我見人傳經。依他言語會。口轉心不

轉。心口相違背。心真無委曲。不作諸纏蓋。但且自省躬。莫覓他替代。可中作得主。是知無內外。寒山無白雲。寂寂絕埃塵。草座山家有。孤燈明月

輪。石牀臨碧沼。虎鹿每爲鄰。自羨幽居樂。長爲象外人。鹿生深林中。飲水而食草。伸脚巖下眠。可憐無煩惱。繫之在華堂。餽饍極肥好。終日不肯

嘗。形容轉枯槁。花上黃鶯子。關關聲可憐。美人顏似玉。對此弄鳴絃。翫之能不足。眷戀在韶年。花飛鳥亦散。灑淚春風前。棲遲寒巖下。偏訝最

幽竒。携籃採山茹。挈籠摘菓歸。蔬齋敷茅坐。啜啄食紫芝。清沼濯瓢鉢。雜和煮稠稀。當陽擁裘坐。閑讀古人詩。昔日經行處。今復七十年。故人無

來往。埋。在古冢間。余今頭已白。猶守片雲山。爲報後來子。何不讀古言。我見利智人。觀者便知意。不暇尋文字。直入如來地。心不逐諸緣。意根不

妄起。心意不生時。內外無餘事。白鶴銜苦花。千里作一息。欲往蓬萊山。將此充糧食。未達毛摧落。離群心慘惻。却歸舊來巢。妻子不相識。慣居

幽隱處。乍向國清中。時向豐干老。仍來看拾公。獨回上寒巖。無人話合同。
尋究無源水。源窮水不窮。生前大愚癡。不爲今日悟。今日如許貧。總是
前生做。今生又不修。來生還如故。兩岸各無船。渺渺應難渡。元非隱逸
士。自號山林人。仕魯蒙憤帛。且愛裘踈巾。道有巢許操。耻爲堯舜臣。獼猴
罩帽子。學人避風塵。自古諸哲人。不見有長存。生而還復死。盡變作灰
塵。積骨如毗富。別淚成海津。唯有空名在。豈免生死輪。寒山有躲蟲。身
白而頭黑。手把兩卷書。一道將一德。住不安。釜竈行不齋。衣裓常持智慧
劍。擬破煩惱賊。有人畏白首。不肯捨朱紱。採藥空求仙。根苗亂挑掘。數
年無效驗。癡意瞋佛鬱。獵師披袈裟。元非汝使物。書判全非弱。嫌身不
得官。銓曹被拘折。洗垢覓瘡癥。必也關天命。今年更試看。盲兒射雀目。偶
中亦非難。貧驢欠一尺。富狗剩三寸。若分貧不平。中半富與困。始取驢
飽足。却令狗飢頓。爲汝熟思量。令我也愁悶。柳郎八十二。藍嫂一十八。
夫妻共百年。相憐情狡猾。弄璋字烏虺。擲瓦名娼媼。屢見枯楊莢。常遭青
女殺。赫赫誰壚肆。其酒甚濃厚。可憐高幡幟。極目平升斗。何意訝不售。
其家多猛狗。童子若來沽。狗咬便是走。吁嗟濁濫處。羅刹共賢人。謂是
荒流類。烏知道不親。狐假獅子勢。詐妄却稱真。鈆礦入鑪冶。方知金不精。

白雲起嵯峨。綠水蕩潭波。此處聞漁父。時時鼓棹歌。聲聲不可聽。令我
愁思多。誰謂雀無角。其如穿屋何。粵自居寒山。曾經幾萬載。任運遯林
泉。棲遲觀自在。巖中人不到。白雲常變改。細草作卧褥。青天爲被蓋。快活
枕石頭。天地任變改。昨夜夢還鄉。見婦機中織。駐梭若有思。擎梭似無
力。呼之迴面視。况復不相識。應是別多年。鬢毛非舊色。人生不滿百。常
懷千載憂。自身病始可。又爲子孫愁。下視禾根下。上看桑樹頭。秤槌落東
海。到底始知休。亦有一等流。悠悠似木頭。出語無知解。云我百不憂。問
道道不會。問佛佛不求。子細推尋看。茫然一場愁。董郎年少時。出入帝
京裏。衫作嫩鵝黃。容儀盡相似。常騎踏雪馬。拂拂紅塵起。觀者滿路傍。箇
是誰家子。箇是誰家子。爲人大被憎。癡心常憤憤。肉眼醉曹曹。見佛不
禮佛。逢僧不施僧。唯知打大鬻。除此百無能。人以身爲本。本以心爲柄。
本在心。莫邪。心邪喪本命。未能免此殃。何言懶照鏡。不念金剛經。却爲菩
薩病。城北仲家翁。渠家多酒肉。仲翁婦死時。吊客滿堂屋。仲翁自身亡。
能無一人哭。哭他盃鬻者。何大冷心腹。下愚讀我詩。不解却嗤誚。中庸
讀我詩。思量云甚要。上賢讀我詩。把着蒲面笑。楊修見幼婦。一覽便知妙。
心高如山嶽。人我不伏人。解講圍陀典。能談三教文。心中無慚愧。破戒

違律文。自言上人法。稱爲第一人。愚者能讚歎。智者撫掌笑。陽燄虛空花。豈得免生老。不如百不解。靜坐絕憂惱。如許多寶貝。海中乘壞舸。前頭失却桅。後面又無拖。宛轉任風吹。高低隨浪簸。如何得到岸。努力莫端坐。我見凡愚人。多畜貨財穀。飲酒食生命。謂言我富足。莫知地獄深。唯求上天福。罪業如毗富。豈得免災毒。財主忽然死。爭共當頭哭。供僧讀疏文。空是鬼神祿。福田一箇無。虛設一群禿。不如早覺悟。莫作黑暗獄。狂風不動樹。心真無罪福。寄語兀兀人。叮嚀再三讀。勸你三界子。莫作無道理。理短被他欺。理長不奈你。世間濁濫人。恰似黍粘子。不見無事人。獨脫無能比。早須返本源。三界任緣起。清淨如入流。莫飲無明水。三界人蠢蠢。六道人茫茫。貪財愛淫欲。心惡若豺狼。地獄如箭射。極苦若爲當。兀兀過朝夕。都不別賢良。好惡總不識。猶如猪及羊。共語如木石。嫉妬似顛狂。不自見已過。如猪在圈卧。不知自償債。却笑牛牽磨。人生在塵蒙。恰似盆中蟲。終日行遶遶。不離其盆中。神仙不可比。煩惱計無窮。歲月如流水。須臾作老翁。寒山出此語。復似顛狂漢。有事對面說。所以足人怨。心直出語直。直心無背面。臨死渡柰河。誰是嚩囉漢。冥冥泉臺路。被業相拘絆。寄語諸仁者。復以何爲懷。達道見自性。自性即如來。天真元具足。修證轉差迴。棄

本却逐末。只守一場歎。世有一般人。不惡又不善。不識主人翁。隨客處處轉。因循過時光。渾是癡肉醬。雖有一靈臺。如同客作漢。常聞釋迦佛。先受然燈記。然燈與釋迦。只論前後智。前後體非殊。異中無有異。一佛一切佛。心是如來地。常聞國大臣。朱紫簪纓祿。富貴千般貪。知榮不知辱。奴馬蒲宅舍。金銀盈帑屋。癡福暫時扶。埋頭作地獄。忽死萬事休。男女當頭哭。不知有禍殃。前路何疾速。家破冷颼颼。食無一粒粟。凍餓苦悽悽。良由不覺觸。上人心猛利。一問便知妙。中流心清淨。審思云甚要。下士鈍暗癡。頑皮最難裂。直得血淋頭。始知自摧滅。看取開眼賊。鬧市集人決。死屍棄如塵。此時向誰說。男兒大丈夫。一刀兩段截。人面禽獸心。造作何時歇。我有六弟兄。就中一箇惡。打伊又不得。罵伊又不着。處處無柰何。耽財好淫殺。見好埋頭愛。貪心過羅刹。阿爺惡見伊。阿孃嫌不悅。昨被我捉得。惡罵恣情掣。趨向無人處。一一向伊說。汝今須改行。覆車須改轍。若也不信受。共汝惡合殺。汝受我調伏。我共汝覓活。從此盡和同。如今過菩薩。學業攻鑪冶。鍊盡三山鐵。至今靜恬恬。衆人皆讚說。我見世間人。堂堂好儀相。不報父母恩。方寸底模樣。欠負他人錢。蹄穿始惆悵。箇箇惜妻兒。爺孃不供養。兄弟似冤家。心中常悒快。憶昔少年時。求神願成長。今爲不

孝子。世間多此樣。買肉自家噉。抹背道我暢。自逞說嘍囉。聰明無益當。牛頭努目瞋。始覺時已昇。擇佛燒好香。揀僧歸供養。羅漢門前乞。趁却閑和尚。不悟無爲人。從來無相狀。封疏請名僧。襯錢兩三樣。雲光好法師。安角在頭上。汝無平等心。聖賢俱不降。凡聖皆混然。勸君休取相。有鳥五色文。棲桐食竹實。徐動合和儀。鳴中施禮律。昨來何以至。爲暫時一出。儻聞絃歌聲。作舞欣今日。昔日極貧苦。夜夜數他寶。今日審思量。自家須營造。掘得一寶藏。純是水精珠。大有碧眼胡。密擬買將去。余即報渠言。此珠無價數。一生慵懶作。憎重只便輕。他家學事業。余持一卷經。無心裝標軸。來去省人擎。應病則說藥。方便度衆生。但自心無事。何處不惺惺。我見出家人。不入出家學。欲知真出家。心淨無繩索。澄澄絕玄妙。如如無倚託。三界任縱橫。四生不可泊。無爲無事人。逍遙實快樂。昨到雲霞觀。忽見仙尊士。星冠月帔橫。盡云居山水。余問神仙術。云道若爲此。謂言靈無上。妙藥心神祕。守死待鶴來。皆道乘魚去。余乃返窮之。推尋勿道理。但看箭射空。須臾還墜地。饒你得仙人。恰似守屍鬼。心月自精明。萬象何能比。欲知仙丹術。身內元神是。莫學黃中公。握愚自守擬。余鄉有一宅。其宅無正主。地生一寸草。水垂一滴露。火燒六箇賊。風吹黑雲雨。子細尋本人。

布裘真珠爾。傳語諸公子。聽說石齊奴。僮僕八百人。水碓三十區。舍下
養魚鳥。樓上吹笙竽。伸頭臨白刃。瘖心爲綠珠。何以長惆悵。人生似朝
菌。那堪數十年。新舊凋零盡。以此思自哀。哀情不可忍。柰何當柰何。脫體
歸山隱。我詩也是詩。有人喚作偈。詩偈總一般。讀時湏子細。緩緩細披
尋。不得生容易。依此學修行。大有可笑事。有偈有千萬。卒急迷應難。若
要相知者。但入天台山。巖中深處坐。說理及談玄。共我不相見。對面似千
山。世間億萬人。面孔不相似。借問何因緣。致令遣如此。各執一般見。互
說非兼是。但自修己身。不要言他已。男女有婚嫁。俗務是常儀。自量其
事力。何用廣張施。取債誇人我。論情入骨癡。殺他雞犬命。身死墮阿鼻。
世上一種人。出性常多事。終日傍行衢。不離諸酒肆。爲他作保見。替他說
道理。一朝有乖張。過咎全歸你。我勸出家輩。湏知教法深。專心求出離。
輒莫染貪婬。大有俗中士。知非不受金。故知君子志。任運聽浮沉。寒山
自寒山。拾得自拾得。凡愚豈見知。豐干却相識。見時不可見。覓時何處覓。
借問有何緣。向道無爲力。從來是拾得。不是偶然稱。別無親眷屬。寒山
是我兄。兩人心相似。誰能徇俗情。若問年多少。黃河幾度清。若解捉老
鼠。不在五白猫。若能悟理性。那有錦繡包。真珠入席袋。佛性止蓬茅。一群

取相漢用意總無交。運心常寬廣。此則名為布。輟已惠於人。方可名為施。後來人不知。焉能會此義。未設一庸僧。早擬望富貴。獼猴尚教得人。可不憤發。前車既落坑。後車須改轍。若也不知此。恐君惡合殺。比來是夜。又變即成菩薩。滿卷才子詩。溢壺聖人酒。行愛觀牛犢。坐不離左右。霜露入茅簷。月華明瓦牖。此時吸兩甌。吟詩三兩首。施家有两兒。以藝干齊楚。文武各自備。託身為得所。孟公問其術。我子親教汝。秦衛兩不成。失時成齟齬。躑躅一群羊。沿山又入谷。看人貪竹塞。且遭豺狼逐。元不出孳生。便將充口腹。從頭喫至尾。餉餉無餘肉。銀星釘秤衡。綠絲作秤紐。買人推向前。賣人推向後。不顧他心怨。唯言我好手。死去見閻王。背後挿掃帚。閉門私造罪。准擬免灾殃。被他惡部童。抄得報閻王。縱不入鑊湯。亦須卧鐵牀。不許顧人替。自作自身當。三界如轉輪。浮生入流水。蠢蠢諸品類。貪生不覺死。汝看朝垂露。能得幾時子。閑入天台洞。訪人人不知。寒山為伴侶。松下嗽靈芝。每談今古事。嗟見世愚癡。箇箇入地獄。那得出頭時。古佛路凄凄。愚人到却迷。只緣前業重。所以不能知。欲識無為理。心中不掛絲。生生勤苦學。必定覩吾師。各有天真佛。號之為寶王。珠光日夜照。玄妙卒難量。盲人常兀兀。那肯怕灾殃。唯貪媯泆業。此輩實堪

傷。出家求出離。哀念苦衆生。助佛爲揚化。令教選路行。何曾解救苦。恣意亂縱橫。一時同受溺。俱落大深坑。常飲三毒酒。昏昏都不知。將錢作

夢事。夢事成鐵圍。以苦欲捨苦。捨苦無出期。應須早覺悟。覺悟自歸依。

悠悠塵裏人。常樂塵中趣。我見塵中人心。多生憫顧。何哉憫此流。念彼塵中苦。不須攻人惡。不須伐己善。行之則可行。卷之則可卷。祿厚憂責大。

言深慮交淺。聞茲若念茲。小兒當自見。千雲萬水間。中有一閑士。白日遊青山。夜歸巖下睡。倏爾過春秋。寂然無塵累。快哉何所依。靜若秋江水。踏蹬諸貧士。飢寒成至極。閑居好作詩。札札用心力。賤人言孰采。勸君

休歎息。題安餠餅上。乞狗也不喫。欲識生死譬。且將冰水比。水結即成冰。冰消返成水。已死必應生。出生還復死。冰水不相傷。生死還雙美。尋

思少年日。遊獵向平陵。國使職非願。神仙未足稱。聯翩騎白馬。喝兔放蒼鷹。不覺大流落。皤皤誰見矜。少年學書劍。叱馭到京州。聞伐匈奴盡。婆

婆無處遊。歸來翠巖下。席草枕青流。壯士志朱紱。獼猴騎土牛。重巖我卜居。鳥道絕人迹。庭除何所有。白雲抱幽石。住茲凡幾年。屢見春冬易。寄

語鍾鼎家。虛名定無益。少小帶經鋤。本將兄共居。緣遭他輩責。剝被自妻疎。拋絕紅塵境。常遊好閱書。誰惜一斗水。活取轍中魚。徒閉蓬門坐。

頻經歲月遷。唯聞人作鬼。不見鶴成仙。念此那堪說。隨緣須自憐。迴瞻郊郭外。古墓犁爲田。本志慕道倫。道倫常獲親。時逢杜源客。每接話禪賓。談玄月明夜。探理日臨晨。萬機俱泯迹。方識本來人。可笑寒山道。而無車馬蹤。聯谿難記曲。疊嶂不知重。泣露千般草。吟風一樣松。此時迷徑處。形問影何從。衆生不可說。何意許顛邪。面上兩惡鳥。心中三毒蛇。是渠作障礙。使你事煩拏。高舉手彈指。南無佛陀耶。驅馬度荒城。荒城重客情。高低舊雉堞。大小古墳塋。自振孤蓬影。長凝拱木聲。所嗟皆俗骨。仙史更無名。茅棟野人居。門前車馬踈。林幽偏聚鳥。谿澗本藏魚。山菓携兒摘。阜田共婦鋤。家中何所有。唯有一牀書。登陟寒山道。寒山路不窮。谿長石磊磊。澗淺草濛濛。苦滑非關雨。松鳴不假風。誰能超世累。共生白雲中。六極常嬰困。九維徒自論。有才遺草澤。無藝閉蓬門。日上巖猶暗。煙消谷尚昏。其中長者子。箇箇總無視。大有飢寒客。生將獸魚誅。長存廟石下。時笑路邊隅。累日空思飯。終冬不識襦。唯齋一束草。并帶五升麩。浪造凌霄閣。虛登百尺樓。養生仍天命。誘讀詎封侯。不用從黃口。何須厭白頭。未能端似箭。且莫曲如鉤。以我棲遲處。幽深難可論。無風蘿自動。不霧竹長昏。澗水緣誰咽。山雲忽自屯。午時庵內坐。始覺日頭暎。憶昔過

逢處人間逐勝遊。樂山登萬仞。愛水汎千舟。送客琵琶谷。携琴鸚鵡洲。烏
知松樹下。抱膝冷颼颼。今日巖前坐。坐久煙雲收。一道清谿冷。千尋碧
嶂頭。白雲朝影靜。明月夜光浮。身上無塵垢。心中那更憂。偃息深林下。
從生是農夫。立身既質直。出語無諂諛。保我不鑿壁。信君方得珠。烏能同
汎灩。極目波上鳧。隱士遁人間。多向山中眠。青蘿踈麓麓。碧澗響聯聯。
騰騰且安樂。悠悠自清閑。免有染世事。心淨如白蓮。父母續經多。田園
不羨他。婦搗機。兒弄口。過。拍手摧花舞。搗頤聽鳥歌。誰當來歎賀。
樵客屢經過。家住綠巖下。庭蕪更不芟。新藤垂繚繞。古石豎嶢巖。山菓
獼猴摘。池魚白鷺銜。仙書一兩卷。樹下讀喃喃。四時無止息。年去又年
來。萬物有代謝。九天無朽摧。東明又西暗。花落復花開。唯有黃泉客。冥冥
去不迴。歲去換愁年。春來物色鮮。山花笑綠水。巖樹舞青煙。蜂蝶自云
樂。禽魚更可憐。朋遊情未已。徹曉不能眠。吾家好隱淪。居處絕囂塵。踐
草成三徑。瞻雲作四鄰。助歌聲有鳥。問法語無人。月裏娑婆樹。幾年爲一
春。琴書須自隨。祿位用何爲。投輦從賢婦。中車有孝兒。風吹曝麥地。水
溢沃魚池。常念鷓鴣鳥。安身住一枝。弟兄同五郡。父子本三州。欲驗飛
鳧集。須旌白兔遊。靈瓜夢裏受。神橘座中收。鄉國何迢遞。同魚寄水流。

獨坐常忽忽。情懷何悠悠。山腰雲漫漫。谷口風颼颼。猿來樹嫋嫋。鳥入林
啾啾。時摧鬢颯颯。歲盡老惆惆。田家避暑月。斗酒共誰歡。雜雜排山果。
踈踈圍酒樽。蘆背將代席。蕉葉且充盤。醉後搯願生。須彌小彈丸。止宿
鴛鴦鳥。一雄兼一雌。銜花相共食。刷羽每相隨。戲入煙霄裏。宿歸沙岸湄。
自憐生處樂。不奪鳳凰池。山中何大冷。自古非今年。沓嶂怕凝雪。幽林
每吐煙。草生芒種後。葉落立秋前。此有沉迷客。窺窺不見天。城中蛾眉
女。珠珮珂珊珊。鸚鵡花前弄。琵琶月下彈。長歌三日響。短舞萬人看。未必
長如此。芙蓉不耐寒。三月蠶猶小。女人來採花。隈牆弄蝴蝶。臨水擲蝦
蟪。羅袖盛梅子。金鏡挑笋芽。鬪論爭物色。此地勝余家。婦女慵經織。男
夫懶耨田。輕浮耽挾彈。趾躩拈抹絃。凍骨衣應急。充腸食在先。今誰念於
汝。善痛哭蒼天。不行真正道。隨邪號行婆。口暫神佛少。心懷嫉妬多。背
後噎魚肉。人前念佛陀。如此修身處。應難避柰河。昔時可可貧。今日最
貧凍。作事不諧和。觸途成倥傯。行泥屢脚屈。坐社頻腹痛。失却班猫兒。老
鼠圍飯瓮。自從出家後。漸得養生趣。伸縮四肢全。動應六根具。疏褐隨
春冬。糲食供朝暮。今日懇懇修。願與佛相遇。勸你休去來。莫恼他闍老。
失脚入三途。粉骨遭千禱。長爲地獄人。永隔今生道。勉你信余言。識取衣

中寶。或有街行人。才藝過周孔。見罷頭兀兀。看時身侗侗。繩牽未肯行。錐刺猶不動。恰似羊公鶴。可憐生懂懵。三五癡後生。作事不真實。未讀

十卷書。強把雌黃筆。將他儒行篇。喚作賊盜律。脫體似蟬蟲。敲破他書帙。自在白雲閑。從來非買山。下危須策杖。上險捉藤攀。澗邊松常翠。谿邊

石自斑。友朋雖阻絕。春至鳥關關。玉堂掛珠簾。中有嬋娟子。其貌勝神。仙容華若桃李。東家春霧合。西舍秋風起。更過三十年。還成甘蔗滓。有

樂且須樂。時哉不可失。雖云一百年。豈滿三萬日。寄世是須臾。論錢莫啾啾。孝經未後篇。委曲陳情畢。箇是何措大。時來省南院。年可三十餘。曾

經四五選。囊裏無青蚨。篋中有黃卷。行到食店前。不敢暫迴面。自有慳惜人。我非慳惜輩。衣單爲舞穿。酒盡緣歌碎。常取一腹飽。莫令兩脚僂。蓬

蒿鑽髑髏。此日君應悔。我行經古墳。淚盡嗟存歿。塚破壓黃腸。棺穿露白骨。歌斜有筦篴。振撥無簪笏。風至攬其中。灰塵亂埒埒。養女畏太多。

已生須訓誘。捺頭遣小心。鞭背令緘口。未解乘機杼。那堪事箕箒。張婆語驢駒。汝大不知母。余家有一窟。窟中無一物。淨潔空堂堂。光華明日日。

蔬食養微軀。布裘遮幻質。任你千聖現。我有天真佛。子之何遑遑。卜居須自審。南方瘴癘多。北地風霜甚。荒取不可居。毒川難可飲。魂兮歸去來。

食我家園菴。凡讀我詩者。心中雖護淨。慳貪繼日廉。諂曲登時正。驅遣除惡業。歸依受真性。今日得佛身。急急如律令。 出生三十年。常遊千萬里。行江青草合。入塞紅塵起。鍊藥空求仙。讀書兼詠史。今日歸寒山。枕流兼洗耳。 變化計無窮。生死竟不止。三途鳥雀身。五嶽龍魚已。世濁作親孺。時清爲騷駢。前迴是富兒。今度成貧士。 賢士不貪婪。癡人好鑪冶。爭地占他家。竹園皆我者。努膊覓錢財。切齒驅奴馬。須看郭門外。纍纍松柏下。 嘖嘖買魚肉。擔歸餒妻子。何須殺他命。將來活汝已。此非天堂緣。純是地獄滓。徐六語破堆。始知沒道理。 雍容美少年。博覽諸經史。盡號曰先生。皆稱爲學士。未能得官職。不解兼耒耜。冬披破衣衫。蓋是書誤已。 寒山多幽竒。登者皆怕懾。月照水澄澄。風吹草獵獵。凋梅雪作花。朽木雲充葉。觸雨轉鮮靈。非晴不可涉。 有樹先林生。計年逾一倍。根遭陵谷變。葉被風霜改。咸笑外凋零。不憐內文彩。皮膚脫落盡。唯有真實在。 璨璨盧家女。舊來名莫愁。貪乘摘花馬。樂旁採蓮舟。膝坐綠熊席。身披青鳳裘。 哀傷百年內。不免歸山丘。 誰家長不死。死事舊來均。始憶八尺漢。俄成一聚塵。黃泉無曉日。青草有時春。行到傷心處。松風愁殺人。 獨卧重巖下。蒸雲晝不消。室中雖罔覿。心裏絕喧譁。夢去遊金闕。魂歸度石橋。拋除

開我者。歷歷樹間瓢。極目兮長望。白雲四茫茫。鷓鴣飽腩脰。鸞鳳飢徬徨。駿馬放石磧。蹇驢能至堂。天高不可問。鷓鴣在滄浪。精神殊奕奕。形

貌極堂堂。能射穿七札。讀書覽五行。經眠虎頭枕。昔生象牙牀。若無阿堵物。不啻冷如霜。教汝數般事。思量知我賢。極貧忍賣屋。纔富湏買田。空腹

不得走。枕頭湏莫眠。此言期共見。掛在日東邊。杳杳寒山道。落落冷澗濱。啾啾常有鳥。寂寂更無人。浙浙風吹面。紛紛雪積身。朝朝不見日。歲歲

不知春。世有聰明士。救苦探幽文。三端自孤立。六藝越諸君。神氣卓然異。精彩超衆群。不識箇中意。逐境亂紛紛。層層山水秀。煙霞鎖翠微。嵐

拂紗巾濕。露霑蓑草衣。足躡遊方履。手執古藤枝。更觀塵世外。夢境復何爲。白拂旃檀柄。馨香竟日聞。柔和如卷霧。搖曳似行雲。禮奉宜當暑。高

提復祛塵。時時方丈內。將用指迷人。畫棟非吾宅。青林是我家。一生俄爾過。萬事莫言賒。濟渡不造筏。漂淪爲採花。善根今未種。何日見生芽。

鳥弄情不堪。其時卧草庵。櫻桃向杏杏。楊柳正毵毵。旭日御青嶂。晴雲洗綠潭。誰知出塵俗。馳上寒山南。吁嗟貧復病。爲人絕友親。甕裏長無飯。

甌中屢生塵。蓬庵不免雨。漏榻劣容身。莫怪今顛顛。多愁定損人。群女戲夕陽。風來滿路香。綴裙金蛺蝶。挿髻玉鴛鴦。角婢紅羅縵。閹奴紫錦裳。

爲觀失道者。鬢白心惶惶。我見黃河水。凡經幾度清。水流如急箭。人世若浮萍。癡屬根本業。無明煩惱坑。輪迴幾許劫。只爲造迷盲。昨見河邊樹。摧殘不可論。二三餘藥卉。千萬斧刀痕。霜剥萎黃葉。波衝枯朽根。生處當如此。何用怨乾坤。憐底衆生病。餐嘗略不厭。蒸豚搵蒜醬。炙鴨點椒鹽。去骨鮮魚膾。兼皮熟肉臉。不知他命苦。只取自家甜。佛哀三界子。總是親男女。恐沉黑暗坑。示儀垂化度。盡登無上道。俱證菩提路。教汝癡衆生。慧心勤覺悟。佛捨尊榮樂。爲愍諸癡子。早願悟無生。辦集無上事。後來出家者。多緣無業次。不能得衣食。頭鑽入於寺。我見世間人。箇箇爭意氣。一朝忽然死。只得一片地。闊四尺。長丈二。汝若會出來爭意氣。我與汝。立碑記。丹丘迥聳與雲齊。空裏五峯遙望低。鴈塔高排出青嶂。禪林古殿入虹蜺。風搖松葉赤城秀。霧吐中巖仙路迷。碧落千山萬仞見。藤蘿相接次連谿。余曾昔覩聰明士。博達英靈無比倫。一選嘉名喧宇宙。五言詩句越諸人。爲官治化超先輩。直爲無能繼後塵。忽然富貴貪財色。瓦解冰消不可陳。汝謂埋頭癡兀兀。愛向無明羅剎窟。再三勸你早修行。是你頑癡心恍惚。不肯信受寒山語。轉轉倍加業汨汨。直待斬首作兩段。方知自身奴賊物。雲山疊疊連天碧。路僻林深無客遊。遠望孤蟾明皎皎。

皎近聞群鳥語啾啾。老夫獨坐棲青嶂。少室閑居任白頭。可歎往年與今日。無心還似水東流。閑自訪高僧。煙山萬萬層。師親指歸路。月掛一輪燈。閑遊華頂上。天朗晝光輝。四顧晴空裏。白雲同鶴飛。嗟見世間人。永劫在迷津。不省遮箇意。修行徒苦辛。身著空花衣。足躡龜毛履。手把兔角弓。擬射無明鬼。多少天台人。不識寒山子。莫知真意度。喚作閑言語。吾心似秋月。碧潭清皎潔。無物堪比倫。教我如何說。家有寒山詩。勝汝看經卷。書放屏風上。時時看一遍。無去無來本湛然。不拘內外及中間。一顆水精絕瑕翳。光明透滿出人天。雲山疊疊幾千重。幽谷路深絕人蹤。碧澗清流多勝境。時來鳥語合人心。千生萬死何時已。生死來去轉迷情。不識心中無價寶。恰似盲驢信脚行。心神用盡爲名利。百種貪婪進己軀。浮生幻化如燈燼。塚內埋身是有無。世間何事最堪嗟。盡是三途造罪祖。不學白雲巖下客。一條寒衲是生涯。秋到任地林葉落。春來從你樹開花。三界橫眠無一事。明月清風是我家。自笑老夫筋力敗。偏戀松巖愛獨遊。可歎往年至今日。任運還同不繫舟。千年石上古人蹤。萬丈巖前一點空。明月照時常皎潔。不勞尋討問西東。一住寒山萬事休。更無雜念掛心頭。閑於石壁題詩句。任運還同不繫舟。余見僧

繇性希奇。巧妙間生。梁朝時。饒邈虛空。寫塵跡。無因畫得。誌公師。久住
寒山。凡幾秋。獨吟歌曲。絕無憂。飢餐一粒。伽陀藥。心地調和。倚石頭。衆
星羅列。夜深明。巖點孤燈。月未沉。圓滿光華。不磨瑩。掛在青天。是我心。
老病殘年。百有餘。面黃頭白。好山居。布裘擁篲。隨緣過。豈羨人間。巧樣摸。

寒山頂上月輪孤。照見晴空一物無。可貴天然無價寶。埋在五陰溺身軀。
我向前谿照碧流。或向巖邊坐磐石。心似孤雲無所依。悠悠世事何須

覓。我家本住在寒山。石巖棲息離煩緣。泯時萬象無痕跡。舒處周流徧
大千。光影騰輝照心地。無有一法當現前。方知摩尼一顆珠。解用無方處

處圓。世人何事可吁嗟。苦樂交煎勿底涯。生死往來多少劫。東西南北
是誰家。張王李趙權時姓。六道三途事似麻。只爲主人不了絕。遂招遷謝

逐迷邪。余家本住在天台。雲路煙深絕客來。千仞巖巒深可遯。萬重谿
澗石樓臺。樺巾木屐沿流步。布裘藜杖繞山迴。自覺浮生幻化事。逍遙快

樂實奇哉。自從我到天台寺。經今早已幾冬春。山水不移人自老。見却
多少後生人。君不見。三界之中紛擾擾。只爲無明不了絕。一念不生心澄
然。無去無來不生滅。余自來天台。凡經幾萬迴。一身如雲水。悠悠任去
來。逍遙絕無鬧。忘機隆佛道。世間歧路心。衆生多煩惱。兀兀沉浪海。

漂漂輪三界。可惜一靈物。無始被境埋。霓光瞥然起。生死紛塵埃。寒山特相訪。拾得常往來。論心話明月。大虛廓無礙。法界即無邊。一法普徧

該。本來無一物。亦無塵可拂。若能了達此。不用坐兀兀。雲山詩集。瞋是心中火。能燒功德林。欲行菩薩道。忍辱護真心。碧澗泉水清。寒山月華

白。默知神自明。觀空境逾寂。卜擇幽居地。天台更莫言。猿啼谿霧冷。嶽色草門連。竹葉覆松室。開石引澗泉。已甘休萬事。採蕨度殘年。益者益

其精。可名爲有益。易者易其形。是名爲有易。能益復能易。當得上仙籍。無益復無易。終不免死厄。貪人好聚財。恰如梟愛子。子大而食母。財多還

割已。散之即福生。聚之即禍起。無財亦無禍。鼓翼青雲裏。去家一萬里。提劍擊匈奴。得利渠即死。失利汝即殂。渠命旣不惜。汝命有何辜。教汝百

勝術。不貪爲上謨。世有一等愚。茫茫恰似驢。還解人言語。貪婬狀若猪。險歌難可測。實語却成虛。誰能共伊語。令教莫此居。若人逢鬼魅。第一

莫驚懼。捺硬莫采渠。呼名當自去。燒香請佛力。禮拜求僧助。蚊子叮鐵牛。無渠下嘴處。浩浩黃河水。東流長不息。悠悠不見清。人人壽有極。苟欲

乘白雲。曷由生羽翼。唯當鬢髮時。行住須努力。乘茲朽木船。採彼絳婆子。行至大海中。波濤復不止。唯齋一宿糧。去岸三千里。煩惱從何生。愁哉

緣苦起。默默永無言。後生何所述。隱居在林藪。智境何由出。枯槁非堅
衛。風霜成天疾。土牛耕石田。未有得稻日。山客心悄悄。常嗟歲序遷。辛
勤采芝木。搜斥詎成仙。庭廓雲初卷。林明月正圓。不歸何所爲。桂樹相留
連。有人坐山陁。雲卷兮霞瓔。秉芳兮欲寄。路漫兮難征。心惆悵。狐疑。年
老已無成。衆喞咿斯蹇。獨立兮忠貞。猪喫死人肉。人喫死猪腸。猪不嫌
人臭。人返道猪香。猪死拋水內。人死掘地藏。彼此莫相喫。蓮花生沸湯。
快哉混沌身。不飯復不尿。遭得誰鑽鑿。因茲立九竅。朝朝爲衣食。歲歲愁
租調。千箇爭一錢。聚頭亡命叫。啼哭緣何事。淚如珠子顆。應當有別離。
復是遭喪禍。所爲在貧窮。未能了因果。塚間瞻死屍。六道不欣我。貪愛
有人求快活。不知禍在百年身。但看陽燄浮漚水。便覺無常敗壞人。丈夫
志氣直如鐵。無曲心中道。自真行密節。高霜下竹。方知不狂用心神。徒
勞說三史。浪自看五經。洎老檢黃籍。依前注白丁。筮遭連蹇卦。生主虛危
星。不及河邊樹。年年一度青。有漢姓傲慢。名貪字不廉。一身無所解。百
事被他嫌。死惡黃連苦。生憐白密甜。喫魚猶未止。食肉更無厭。中州集李
純甫雜詩六首。顛倒三生夢。飛沉萬劫心。乾坤頭至踵。混沌古猶今。黑
白無真色。官商豈至音。維摩懶問口。枝上一蟬琴。乾坤大聚落。今古小

朝昏。諸子蠅鑽帟。群雄虱處禪。一心還入道。萬物自歸根。却笑幽憂客。空招楚些魂。
丹鳳翔金鼎。蒼龍戲玉池。心源澄似水。鼻息細於絲。枕上山

川好。壺中日月遲。神仙學道者。那許小兒知。空譯流沙語。難參少室禪。泥牛耕海底。玉犬吠雲邊。仰嶠圓茶夢。曹山放酒顛。書生眼如月。休被衲

僧穿。狡兔留三窟。獼猴戲六窻。情田鋤宿草。心月印澄江。酒戒何曾破。詩魔先已降。雄蜂雌蛺蝶。正自不成雙。道義富無敵。詩書貴不貲。浮生

幾兩履。狂樂一絢絲。豪俠非吾友。臞儒即我師。誰知茅屋底。元自有男兒。
又作元有丈夫兒。又偶得。包裹青衫已十年。聰明更覺不如前。簿書

藁裏先抽手。鼓笛場中少息肩。篋底剩儲元亮粟。頭高掛老坡錢。會須著我屏山下。了却平生不問天。
李經雜詩。四言。巖椒鬱雲。日夕生陰。

雨雪縞衣。秋黃老林。人烟墨突。樵徑雲深。
造物開巖地。巖帳拚劒壁。苔花張古錦。霜葉老秋碧。日夕雲竇陰。風鼓泉湧石。馬啼忌磽确。樵道生枳

棘。盤盤出井底。回首悵如失。長老不耐事。底事挂塵迹。披雲出山椒。白鳥表林隙。
長河老秋凍。馬怯冰未牢。河山吟鞭底。日暮風更號。晨井凍

不爨。誰療壯士飢。天廡玉山禾。不救我馬臚。鴈奴失寒更。拍拍秋水。天長夢已盡。秋思紛難理。
塵埃汨沒伺候工。離騷不振矜魚蟲。風雲誰

復話著蔡。不圖履豨。哀屠龍。挾牋搦管。坐書空。咿嚶堂上。酣歌鐘。乃知造物戲兒童。不妨遠目送歸鴻。莫怪魏瓠無所容。此去未許江船東。五經不掃途轍窮。門庭日月生皇風。太阿剖室礪以石。生掃鶴鶴搥天雄。王特起偶作。人情爭勝似爭碁。死怕輸人一著遲。黑白不分傍袖手。年來吾亦愛吾癡。又謾作。有時幽鳥話心事。無限秋蟲誇口才。北闕上書吾老矣。東籬把菊思悠哉。竹林留得巨源在。蓮社招入淵明來。不然餘子敗人意。懷抱耿耿胡爲開。又絕句二首。山勢奔騰如逸馬。水流委曲似驚蛇。溪靈不欲露天巧。眼力未到雲先遮。鳥語留春春已迴。落花隨意卧蒼苔。清明寒食因循過。萱草薔薇次第開。王良臣雜詩三首。道人知我愛禪房。淨掃階前紫石牀。軟飽三盃風味好。脫中和月卧黃昏。老子平生酷愛閑。天教行處得禪關。粥魚敲落簷頭月。猶在梅花醉裏間。殘陽收拾弟兄行。揀得機心不到鄉。安置小奴今夜夢。蘆花風細月如霜。

周昂無題。西風吹白水。日暮動寒威。野帳收旗盡。奚兒飲馬歸。稍稍聞鳥過。慘慘見雲飛。夜黑多豺虎。荒村定敢依。又讀陳後山詩。子美神功接混茫。人間無路可升堂。一班管內時時見。賺得陳郎兩鬢蒼。又讀柳詩。功名翕忽負初心。行和騷人澤畔吟。開卷未終還復掩。世間無

此最悲音。史肅雜詩二首。春江日暖舞清漣。客舍蕭蕭一縷煙。幽鳥
隔林招我醉。小桃當戶爲誰妍。禪心已作沾泥絮。詩思渾如上水船。却是
官閑得無事。一簾紅雨枕書眠。南皮城下荒秋草。說是當日燕支臺。世
事翻騰只如此。吾生棄置已焉哉。迎風紫萸因循老。昔日黃花次第開。獨
夜不眠思阿謝。白羊如駕小車來。劉迎書何維禎見贈詩後。塵埃握
手衆人中。草木重來臭味同。春夏我雖迷出處。交游君不異初終。赤黃晚
歲徵竒夢。清白平生繼古風。嘆息蜀州人日作。傷心不覺涕無從。密國
公濤漫賦。貧知囊底一錢無。老覺人間萬事虛。富貴儻來終作麼。勳名
便了又何如。季膺未飽松江鱠。魯望將成笠澤書。自是杜門無客過。不關
多病故人疎。劉澤與劉之昂酬唱有詩云。侯門舊說炎如火。陋巷今
猶冷似冰。半夜杯槃長袖舞。白頭書冊短檠燈。蔡松年漫成。人生各
有適。一受不可更。違已欲徇世。憂患常相嬰。三軍護漢將。九鼎調蒼生。功
名豈不美。強之輒無成。朝昏忘寢食。俯仰勞心形。何如從所好。足以安餘
齡。予也一丘壑。野性直難名。力懦謝提劍。才拙慙窮經。踈放已成癖。紛華
誰與爭。驚鹿便草豐。白鷗願江清。不堪行作吏。萬累方營營。夜慮多俗夢。
曉枕無餘醒。拄頰西山語。適意千里羹。塵土走歲月。秋光浮宦情。欲語箇

中趣。知音耿晨星。世途古今險。方寸風濤驚。封侯有骨相。使鬼須銅腥。誓收此身去。田園事春耕。蔡珪讀戎昱詩有作。我家北潭邊。溪流卧衡

門。俗客自不來。好客時開尊。路人或不知。云是渭南村。底事半年別。此懷誰與論。來時西郊林。木末秋未老。借筇數歸日。迺復見冬杪。心馳倚門

望。望我綿綿道。慙愧戎子詩。在家貧亦好。吳激偶成二首。一番瘦筍羽林槍。松架陰陰盡日涼。繞屋雲煙無定態。連山草木有真香。蟹湯兔

盞鬪旗槍。風雨山中枕簟涼。學道窮年何所得。只工掃地與燒香。高士談偶題。羨他田父老於農。遠是庄西與舍東。不似宦遊情味惡。半生常

在別離中。朱之才寓言二首。獸有善觸邪。草有能指佞。獸草非有心。不移本天性。前王著臣冠。俾爾効端鯁。如何不稱服。觸指反忠正。吾欲取

二物。藜植列臺省。一令邪佞徒。奔走亟深屏。風雨晦時夜。鷄鳴有常聲。霜雪枯萬幹。松柏有常青。內守初已定。外變終難更。若人束世利。浮沉無

定情。俯仰効稗稗。低昂甚權衡。反出木鳥下。徒爲萬物靈。祝簡雜詩。雨後清寒滿袖風。鴈聲南去暮雲濃。秋來杞菊能多少。欲助盤飧自不供。

榴花嬌欲闌羅裙。石竹開成碎纈文。更有戎葵亦堪愛。日烘紅臉酒初醺。施宜生無題。唱得新翻穩貼腔。阿誰能得肯雙雙。天寧寺裏尊前

月分孽清寒入小牕。劉從益和淵明雜詩。俗士苦紛競。此心本無塵。功名迺外物。了不關吾身。吾身復何有。形神假相親。天地開一室。日月挾兩隣。有生即有化。如晏之必晨。但得醉中了。亦足稱達人。揮戈欲却日。小力自不量。何如任天運。閉門坐齊芳。詩書列四隅。著我於中央。夏卧北窻風。隆冬曝朝陽。但有藜藿羹。亦足充饑腸。少爲饑所驅。老爲病所迫。人生能幾何。東阡復南陌。急湏沽酒來。一笑舉太白。浩歌草木振。起舞天地窄。同歡二三子。誰主復誰客。浮沉大浪中。畢竟歸真宅。歲月去何速。老炎變新涼。游子久不歸。回首望大梁。風埃慘如此。何處真吾鄉。野菊明落日。林楓染飛霜。勸我一杯酒。悠然秋興長。郭邦彥讀毛詩。含氣有喜怒。觸物無不鳴。天機泄鳥迹。文字從此生。誰言土葦器。聲合天地清。樸懷犧氏瑟。巧露媧皇笙。末流不可障。聲律隨合并。徧讀蕭氏選。不見真性情。怨刺雜譏罵。名曰離騷經。頌美獻諂諛。是謂之果銘。詩道初不然。自是時代更。秦火燒不死。此物如有靈。至今三百篇。殷殷金石聲。漢儒各名家。辯口劇分爭。康成獨麾戈。諸儒約連衡。祭酒最後出。千古老成精。我欲讀爾雅。不辨螿蟹名。尚憐沈謝輩。滿筐月露形。孔徒凡幾人。入室無長卿。三子論性命。舉世爲譏評。白首草大玄。才得覆醬罌。不如匡鼎說。愈笑人愈

聽。張建雜詩二首。瓦竝擔山泉。石鼎煮巖菊。燎以松桂枝。清芬滿茅屋。踏雪尋梅花。雪梅同一色。不是暗香來。梅花尋不得。毛麾無題一

首。少顰對起石州山。楊柳分青入髻鬟。乍識春風眼如鵲。爲誰無語獨憑欄。李泚謾書。曾懷平日憲八達。伎倆只今龜六藏。唯有閑情如老

菊。寒華自信晚能香。劉勳讀張仲揚詩因題其上。布衣一日見明君。俄有詩名四海聞。楓落吳天真好句。不須多見鄭叅軍。郭用中偶得。

叅徧叢林懶出游。指端孤月照高秋。大千界裏閑窺掌。不二門中暗點頭。掃地燒香聊自遣。栽花種竹儘風流。莊蒙抵死談齊物。無物齊時也合休。

宗端修漫書。冷面宜教冷眼看。只慙索米向長安。陰崖何限枯松樹。望見屏幃盡牡丹。王敏夫同東崑元先生論詩。林逋仙去幾來年。驚

見梅花第二篇。千歲冰霜松骨瘦。九秋風露鶴聲圓。騰輝定出連城上。得趣知從太古前。邂逅茅齋話終夕。只疑人世改桑田。劉曹王豫雜詩六

首。竹塢人家瀕小溪。數枝紅杏出疎籬。門前山色帶煙重。幽鳥一聲春日遲。風荷柄柄弄清香。輕薄沙禽落又翔。紅日轉西漁艇散。一川山影

暮天涼。古渡停驂日向沉。淒涼歸思梗清吟。碧山幾點塞天闊。紅葉一林秋意深。倚崑蕭寺擬危崖。文室軒窗面水開。雪霽暮寒山月上。數竿

脩竹一枝梅。晝色清明著色圖。山光凝翠接平湖。煙嵐自古人難畫。遠
即深深近却無。寒林煙重暝棲鴉。遠寺疎鍾送落霞。無限嶺雲遮不斷。

數聲和月到山家。王中立雜詩四首。華山宮殿白雲封。不見當年打
睡翁。貪看終南山色好。不知紅日下前峯。獨跨蒼虬下太清。春風萬里

月華明。因君感激爲君說。鑿破天機我也驚。雲葉粼粼皴碧空。笙簫近
響入天風。忽驚風浪耳邊急。不覺形神來世中。此生休更問浮名。名利

區區不斲停。我有一丸天上藥。用時還解濟蒼生。王予可雜詩二首。
白露沙灘浸綠湄。小舟艤岸尚依希。山回屏曲江連樹。春鎖人家深處歸。

暗悲秋色素團團。一雨飄零颼霽寒。天淨長空煙歛處。彩虹金桂樹頭
山。元敏之讀裕之弟詩藁。有鶯聲柳巷深之句。漫題三詩其後。阿翁

醉語戲兒癡。說著蟬詩也道奇。吳下阿蒙非向日。新篇爭遣九泉知。鶯
藏深樹只聞聲。不著詩家畫不成。慚愧阿兄無好語。五言城下把降旌。

傳家詩學在詩郎。剖腹留書死敢忘。先人臨終。有剖腹留書之語。背上錦
囊三箭在。直須千古說穿楊。元德明詩。少有吟詩癖。吟來欲白頭。科

名不肯換。家事幾曾憂。含咀將誰語。研磨若自饒。百年閑伎倆。直到死時
休。燈下讀林和靖詩。落葉落復落。清霜今幾番。踈燈照茅屋。山月入

顏垣老愛寒花淡。幽嫌宿鳥喧。卷中林處士。相對兩忘言。滕茂實偶成。

纖雲卷盡見秋容。古木交陰一掃空。雪壓羣山曉來雨。葉侵缺甃幾番

風。欲歸未得人將老。屢送還來鬼亦窮。賴得子卿佳傳在。整冠時讀慰飄

蓬。中州元氣李章讀。太白詩六首。古風六十篇。詩家共斂手。可憐郊島

輩。區區到白首。本是江湖人。強作金門客。拔劍斫蒼蠅。歸來弄明月。

長安白日晚。渭水秋風寒。蓬萊有歸路。休歌蜀道難。平生不識愁。但恐

榮華改。泰山作黃金。酒池接滄海。朝作猛虎行。暮作長相思。誰知心似

鐵。也有皺眉時。詩家無處泄。挂席探禹穴。飽登黃鶴樓。爛醉金陵月。

又讀過齋詩。杜老藩籬豈易窺。西崑體變漸澆漓。語新涉近難名世。調

古求深却背時。射虎豈無真李廣。捧心那得兩西施。牛腰幾卷猶嫌少。鬼

妬天愁不自知。又雜詩。李杜文章冠一時。六朝高勝晚唐卑。淵明自

合詩家愛。萬古清風一伯夷。陶潛志屈歸來日。賈誼書陳慟哭時。澗底

孤松休鬱鬱。世間萬事只天知。自憐高處少於癡。半世蹉跎坐好奇。到

處溪山題品遍。關中猶欠羨坡詩。又謾成。學得詩篇似古人才。交人

笑捧心顰。直須到却無心處。信手拈來始是真。志短才微學失真。枉消

歲月費精神。閑來點檢囊中作。幾首新詩到古人。又絕句三首。李杜

韓蘇萬古春。西崑一變漸離真。前山未了後山出。多少邯鄲失步人。開
簾忽見簷前月。欹枕未眠窻下客。山雲過雨不成陰。鞦韆院落花如雪。

竹影重封綠瑣窻。蝸涎微印紫苔墻。曉來一陣催秋雨。便覺風來帶嫩涼。
房灑讀友人詩六首。客從長安來。夢寐嵩少間。誤入梁王都。繁華亦

可觀。清晨登吹臺。豁豁詩眼寬。回頭一西顧。三十六青山。天垂日月光。
人目借以明。夜深黑如漆。誰不摸索行。異哉學仙子。視明恐日盲。終日暗

室中。癡坐守冥冥。自古賢聖人。立行貴適中。所以千萬年。人感教化功。
西山聳夷節。東魯揚惠風。清和亦奚罪。後世隘與恭。天地有定位。醉眼

迷東西。望道未之見。自魯還適齊。安車由坦途。不聞有顛隕。胡爲遠丘壑。
披蒿尋幽蹊。有客從東來。携我陟峻嶺。或上如綠壁。或下如墮井。四望

雲霧深。天藏祕佳景。歸來返平川。紅日正炳炳。揚子草太玄。知音一何
寡。寥寥千載後。僅得邵與馬。費盡二公辭。不贖蘇子罵。玄尚且如斯。况不

及玄者。又謾成。膳肉不至孔子行。醴酒不設穆生去。聖賢志豈在酒
肉。酒肉之中禮所寓。主人待客禮已亡。客若不去真苟聚。丈夫生有萬里

氣。豈肯低眉市虛譽。與其舐痔得車多。曷若行歌丐於路。我之爲我當自
持。窮達聽天無必固。或乘雲氣登蒼梧。或遊東海隨烟霧。杖頭長掛一壺

酒。蒲目江山總詩具。浩然一點天地間。我大物小坦無懼。不然須入鹿門山。徑謁龐公棲隱處。蓋頭風雨茅三間。妻學辟纊兒織屨。石田瀕水得數畦。病力猶堪種芎苢。弊衣糲食任平生。天下何思復何慮。一毫既不詘於人。綽綽胷中有餘裕。又讀杜詩。後學爲詩鬪務奇。詩家奇病最難醫。欲知子美高人處。只以尋常話做詩。穹窿冥搜枉費功。天成一語自然工。况兼詩是窮人物。好句多生感慨中。白水魚竿鶴髮翁。世間底處覓英雄。縱橫雖有如椽筆。不入麤人眼目中。千里奔馳蜀道難。草堂賓主罄交歡。怒冠三掛簾鉤上。誰謂將軍禮數寬。又漫題。白髮已刁騷。顏頰懶折腰。身如枯木瘦。心似穀芽焦。歲月長漂泊。生涯慣寂寥。年來忘肉味。豈是爲聞韶。又偶得。節過重陽景自殊。斜風細雨曉寒初。黃花自逐秋光老。白髮還同世事疎。百念已灰時去矣。一身多病盍歸歟。幽居自是無車馬。獨對餘尊讀道書。趙從周雜擬三首。朱明變氣候。大火向西流。六龍整征轡。倏忽夏已秋。閭闔來悲風。霜稜被九州。豈不念時節。歲律聿其周。精衛填溟海。木石安所投。獨携羨門子。高步登崑丘。千秋長不老。永謝區中囚。猗猗南山竹。並生凡卉叢。歲晏多霜雪。見別蕭艾中。我欲食鷓鴣。千歲不一逢。留之和律呂。截竹嶰谷筒。一變爲清商。日暮來悲

風。清泉漑石根。上有白雲封。虛心抱靜節。知音爲誰容。不如歸去來。一竿釣清澧。白日淪西汜。滄海無回波。四時更代謝。奈此遲暮何。我欲制頽光。惜無魯陽戈。憑高望八荒。眈眈迷山河。驚風振江海。山林無靜柯。獸狂走四顧。曠野迷絺羅。西登廣武山。北顧望三河。蓬蒿蔽極目。人少虎狼多。喟然發長嘆。拊劔徒悲歌。劉昂讀山谷詩。語要新奇萬世傳。琴中高趣在無絃。纔離古佛拈花處。又到莊周夢蝶篇。老栢燒餘觀物化。寒梅雪裏作春妍。論封合作江南將。輸與明珠萬顆圓。絕句二首。山花山雨相兼落。溪水溪雲一樣閑。野店無人問春事。酒旗風外鳥關關。禪僧勸學安心法。道士教行進火功。今日一盃俱破戒。黃花籬下醉西風。王庭筠偶作。腰金舊說揚州鶴。網鳥曾聞萊縣鳧。何似東平阮夫子。一官千里獨騎驢。又絕句二首。竹影橫窗瘦。梅花入夢香。可憐今夜月。不肯下西廂。幾年山裏伴雲閑。却逐閑雲漫出山。官職留人歸未得。如今矯首送雲還。魏之美絕句。百歲光陰千歲憂。三分春色二分愁。九分斟酒十分飲。一事灰心萬事休。劉瞻絕句。一句暫得耳無事。三盞且教心太平。寄語山南舊兄弟。此時不合論功名。葛天民偶題。綠樹何稠疊。清風稍羨餘。枕縈雲片片。簾透雨踈踈。脩篔通泉壑。殘碑出野鉏。丘陵

知幾變耕稼雜陶漁。又偶成。始參龍象種。終見馬牛身。再整衝冠髻。
難忘漉酒中。散花天上女。撥草道中人。寄語林和靖。非翁不卜鄰。又絕
句。夜雨漲波高二尺。失却搗衣平正石。天明水落石依然。老夫一夜空
相憶。又雜詩。下竺山前打一遭。丁寧門子看溪橋。恐驚繞磴梅花落。
莫遣行人語笑高。江湖集陳起宗。以毅齋曾先生詩法曰。能以無情作有
情。子熊舉以見教。兼示學詩如學禪之句。次韻聲謝。西禪欲南闡。胡僧
越海來。一蹴高山雲。五分五歧開。逢人問靈源。要識老牛胎。半生苦迷此。
所見祇曹哉。有時面壁求。眼底仍飛埃。誰知機湊到。却自詩中回。無中寫
出有。金枝生蒿萊。再拜先生語。段段空中裁。當此意會處。高唱還自哈。如
得合浦珠。如獲荆山瑰。方信春力到。無地匝蒼苔。可憐思花人。區區羯鼓
催。我今得密旨。敢熄爐中灰。辦香爲南豐。用酬開靈臺。又天台桐栢觀
李高士惠詩。兼寄其遊山紀詠一編。且復見招予不能赴約。敬次來韻以
謝。景物寫成編。清新人競傳。風輕花自若。雨驟鳥悽然。老我塵中累。多
君物外仙。未能拋世慮。山館借牀眠。又汪起潛謝送唐詩。用韻再送劉
滄小集。二年不覲孟山賢。戍客打門驚幽禪。手持姑溪之雙鯉。中藏片
玉龍鸞鐫。弘璧天球匠意古。未數大曆郎與錢。自非仙蛻得靈骨。何以坐

拍洪崖肩。秋高約我西湖邊。是時抱衾借枕眠。未賡踈影暗香句。且繼寒泉秋菊篇。篋中尚有詩一編。持贈雖微意則虔。錦段料應重下剪。向來清

思湧如泉。又趙監簿寄建寧諸詩。推敲久不見新裁。函軸光芒寄草

萊。音調似於清廟聽。風騷知自建安來。每嗟衰晚同籬菊。豈意先春得嶺

梅。拂拭塵軒對清絕。媿無錦段報瓊瑰。又六言。破窻有子書鷓。杜門

無客嘗茶。春事應憐幽獨。隔墻飛過楊花。曾吉甫讀呂居仁舊詩。有懷

其人。作詩寄之。學詩如參禪。慎勿參死句。縱橫無不可。乃在歡喜處。又

如學仙子。辛苦終不遇。忽然毛骨換。政用口訣故。居仁說活法。大意欲人

悟。常言古作者。一一從此路。豈惟如是說。實亦造佳處。其圓如金彈。所向

若脫兔。風吹春空雲。頃刻多態度。鏘然奏琴筑。間以八珍具。人誰與口耳。

寧不起欣慕。一編落吾手。貪讀不能去。嘗疑君胷中。食飲但風露。經年闕

親近。方寸滿塵務。足音何時來。招喚亦云屢。賤子當爲君。移家七閩住。

周信道以洪致遠屢來問詩。作長句遺之。君不見。伯倫平生老閉關。祇

有一頌留人間。懷鈿抱槧亦何益。惠子五車終不傳。我今所見蓋如此。堆

案文書藏鼠矢。自知老境要虛心。却笑少時空血指。勞君日日求徵詩。試

欲把筆心自疑。無鹽已老稍識耻。安敢唐突西施爲。古人作詩有成法。句

欲圓轉字欲活。始循規矩後變化。如以金丹蛻凡骨。君試停盃叅此語。莫笑前人用心苦。只今孰是前輩詩。風漪作文君記取。無名氏絕句。行

到山深處。臨流一兩家。也知春色好。隨分種桃花。太乙峯前是我家。蒲床書籍舊生涯。春城戀酒不歸去。老却碧桃無限花。侍宴黃昏未肯休。

玉堦夜色月如流。朝來自覺承恩最。笑倩傍人認綉毬。姚寬絕句四首。一雨一風花欲零。在官在私蛙亂鳴。留春欲繫金鴉脚。日日斜樓上

情。花信今吹第幾風。香苞未拆牡丹叢。雨聲細入窻前樹。夜夜夜寒春夢中。京洛逢春思昔時。翩翩遊騎醉中歸。平川花柳濃如錦。樹樹樹頭

蜂蝶飛。愁將老眼到花稍。獨自傷春嘆絕交。王謝風流今不見。家家屋燕成巢。安晚堂頌上人。索春間詩軸。以臂疼未能錄去。姑以倡語展

限。轉盼湖山忽半年。春鶯啼處起秋蟬。詩囊未倒真成債。道眼相看總是禪。壯士不甘弓掛壁。病翁猶有筆如椽。少須定賦茅齋約。恐掉頭吟聒

夜眠。又還雲岑魯直詩。并見改字詩帖。蟠空健筆虎蛟騰。九折羊腸萬馬登。裁剗燠寒真見聖。牢龍泉石肯輸僧。命意得了兔走穴。放字未安狐

聽冰。句法當頭飛棒喝。就渠言下辨三乘。又讀魯直詩。晚唐詩似晚春景。姿媚有餘風骨輕。千歲俄逢古壘洗。摩挲篆籀眼增明。又口占。

誰道寒官俸給稀。齋裝滿路得追隨。秋光不與詩腸筭。無限江山信筆支。
李龔偶作。心如野鹿迹如萍。只願陶陶不願醒。楚國蕙蘭增悵望。雨

中嵐影洗還青。獨立空山冷笑春。不須歌調更含頻。平原累累添新塚。
死者還曾哭送人。又偶題。杞菊苗香雨足時。芼羹千載憶天隨。食盤

近覺魚蝦貴。勿笑吳儂啖逐夷。又偶成。投老謀生未有涯。酸吟空自
度年華。人間春雨秋風夜。落葉堪悲似落花。又讀周晉仙詩。句中響

處玉瓏玲。合使吟人洗耳聽。王謝風流今不見。金鵝山下月冥冥。薛嵒
王民山惠詩。民山名字出朋輩。獨推先。不奉寒暄問。于今四十年。傳來

詩似錦。倏去步如仙。自古山林士。無營貌亦賢。又謝松岡姪惠詩。韋
布名猶盛。詩書不負人。每過臨水宅。長想釣魚身。思苦詩難和。歲寒交始

真。迺翁憐病久。余病復兼負。卓汝恭刊劉後村先生。選唐宋絕句。謾題
一絕。千年風雅存餘響。唐宋諸人是似之。好在一章章四句。後村選後

恐無詩。蕭元之與程右史論詩道。我曾論詩始。其道最希夷。神工裂
渾沌。聲音相雄雌。物理何鉅細。人性無妍媸。當其天真發。各鳴志所之。斯

民樸未散。粹如玉不疵。老穉壤衢日。君臣賡歌時。下逮雅頌作。間列民風
熙。怡愉且密勿。和厚無澆漓。固經聖人擇。要匪古義虧。屈宋變賦體。蘇李

五字詩。七字追迅電。陶謝縈寒漪。雖各騁逸思。猶如觀尊彝。但有竒古意。了非斧鑿姿。傷心玉臺後。巧麗爭紛披。雕鏤以爲工。叫噪以爲竒。詩乃一技爾。那復古道爲。有唐李與杜。切切哀其衰。稍欲復古作。便覺騷些遺。後人好異論。鹹酸各行私。白以詭見斥。甫以樸見嗤。那知托奧妙。中有真趣怡。昧昧作者流。行行信且疑。我曾任胃臆。謂自唐無詩。山川或登覽。朋友或聚離。頗以悲喜意。吐作蹇復辭。豈有肩古作。聊欲支傾欹。子雲不可待。賞者又復誰。所以拜壇下。儻令佐鼓旗。庶幾皇甫謐。猶能知左思。又偶成。拋却滄江事。遠遊獨携弓。劍上邊頭。群胡忽遁陰。山北欲渡河。冰不自由。少年鞍馬疾如飛。賣盡儒衣買戰衣。老去不知筋力減。夜闌猶夢解重圍。葉茵古意三首。悠悠澗邊人。濺濺澗中水。水流無返時。人生流水耳。逝波不可迴。白鳥不可馴。古人成感慨。今人猶古人。鏡空納風月。心遠辭埃塵。終日窮目力。得景亡天真。又讀梅雪村詩。雪村吟有藁。名峻斗牛低。聲調唐之上。精神江以西。愛君憂國意。臨水傍山題。何代無風雅。人心自鷺鷄。又偶成六首。春陰晴復陰。因物悟浮生。杜宇鄉心重。楊花世事輕。知非蘧伯玉。覺是晉淵明。此意誰人會。騎牛訪偶耕。人門總利名。此地此心清。雨架筆多潤。風櫺琴自聲。虛堂回古味。逆境

見真情。脫帽尋蘄箬。酣眠小太平。江湖千萬頃。小艇熟煙波。無夢世情薄。有吟春思多。百年空反覆。兩鬢暗消磨。釣叟同吾志。鳴榔柳外過。世

事如今不可知。相逢茶罷且吟詩。無風古鼎香煙直。未午空庭樹影遲。袖手好看碁勝敗。論心休問酒醇醅。謀居恰與松江近。斫膾羹蓴漸及時。

醉敲牛角過前村。此世應無利祿昏。有水可漁田可稼。即松而徑竹而門。賓朋連屬琴書樂。亭榭參差鳥雀喧。不假山靈回俗駕。惠心同是一乾坤。

留得春風趁馬蹄。日長無事綠陰隄。菜花籬落誰家酒。緩轡長歌過小溪。沙門紹嵩亞愚口占二首。江上有微徑。漁人四五家。野船明細火。

宿鳥起圓沙。峽口聞猿夜。秋星見客槎。徘徊幽興盡。更覺在天涯。谷口殘春黃鳥稀。野梅山杏暗芳菲。百千幽勝無人見。紅白落花相雜飛。又

偶成。誰復知予懶是真。平生百信解甘貧。苦無名位高今世。爲有煙霞伴此身。長掩柴荆避寒暑。猶將談笑對風塵。只今那得王摩詰。狀取江湖

太古民。又偶作。孤錫依京寺。悠悠過一生。有山供傑句。無地可歸耕。燕競波中影。碁閑局上聲。流年衰此世。寂寞不勝情。又戲題。地僻人

稀到。東郊自養蒙。山遙天接樹。夜靜竹藏風。岸柳含烟翠。江花脫晚紅。詩應是遊戲。吟嘯不須工。小閣稱幽隱。群峯競秀尖。村春雨外急。秋色望

中添。世事已黃髮。忘情付黑甜。從渠造物巧。未恠老夫潛。又寓題。幽
徑草初青。無人知地名。征鞍千里遠。倚杖一江橫。雲重欲爲雨。風和拗得
晴。家家好春色。春色徧空明。王諶絕句。紫燕黃鸝興已闌。薰風庭院
綠陰寒。兒童競說新篁長。只隔前窗懶去看。午風吹夢過橋西。夢裏詩
成未有題。睡起不知天早晚。柳風忽送子規啼。過了茶蘼與素馨。一春
風雨欠追尋。却從立夏晴多日。策杖閑來看綠陰。又無題。草綠花紅
展綉衾。菜畦一色漾黃金。行行山路情何限。春事三分一半深。小院風
來荷葉香。莓苔繞砌綠陰涼。燕飛低拂琴絃響。驚破一窻幽夢長。又題
劉玉潭詩。萬古玉潭水。君何獨擅名。多應吟思苦。一似此泉清。山澤供
高隱。江湖已著聲。小詩拈未出。更欲與君評。俞桂古意。無言情脉脉。
美人久相隔。道阻脩且長。春草幾番碧。鳳釵冷鬢雲。鸞鏡輕雲幕。昔爲比
翼鳥。今作孤飛翮。愁絕寄郎衣。腰瘦裁宜窄。又論詩。大道本無體。何
在文字間。易從先天畫。詩自聖人刪。流風傳益遠。後作莫可攀。推敲誰氏
子。一字不可閑。又看先叔祖。青松居士倉使詩。儒冠每笑拙身謀。春
日因何桂玉留。南浦未思芳草恨。西湖正爲落梅愁。四靈去矣今如在。諸
老蕭然事已休。衣鉢青松誰繼續。家鷄還復可搜求。又偶成二首。短

髮蕭蕭滿鏡秋。家居但覺歲時流。兩年不見西湖面。笑我寒盟是白鷗。
吹來一葉報秋知。玉露金風正及時。戴了涼巾披野服。桂花香裏看唐詩。

又口占。園林綠暗又紅稀。蜀鳥啼山笋蕨肥。春夏一番交篆早。錦衣
脫了著單衣。又吟詩。漁溪僻好只吟詩。此意還須識者知。自古島郊

貧徹骨。詩逢窮處始爲奇。陳必復。五月十三日偶成。富貴真同一蟻
丘。寵榮多處獨多憂。靜觀草木自生意。晚愛溪山多勝游。竹豈有情那得

醉。雞寧解語亦能愁。紛紛數子成何事。只合求田問舍休。又偶成。遠
屋栽梅亦可人。寂憐夏月綠陰清。前村雨過山如洗。深徑風來竹自鳴。滌

硯不嫌池水冷。寫書愛傍午窻明。近吟未許人知得。且向梅邊隱姓名。
又漫賦。篝燈讀易聽更殘。微雨蕭蕭獨閉關。治世豈無謀可獻。書生從

古命多寒。數莖鬚爲憂時白。一點心猶報國丹。未肯軒裳便塵土。此身翻
恐誤儒冠。又讀後山詩。百世人參杜陵句。一燈晚得後山傳。天寒霜

重隼孤擊。木落江空花自妍。絕代文章驚此老。半生心力盡他年。後來不
作嗟誰繼。古意淒涼付斷編。趙漢宗讀陶詩。端居洗塵慮。細讀淵明

詩。疇昔慕此翁。寤寐忘調餓。此翁非詩人。而有天然姿。紛紛世事中。采采
黃菊枝。此語人共賞。此意疇復知。知即翁之徒。高風接皇羲。有籬可種

菊有琴可無絃。適趣不待聲。種菊真偶然。南山有佳氣。得意終忘言。薄酣空庭中。一笑涼風前。又讀陶詩罷。一山秋意入柴扉。細讀淵明采菊詩。讀罷依然成一筦。閑拈野草調兒嬉。又偶成。負郭二頃田。貿易辦喪祭。喪祭幸已周。啼饑坐終歲。長貧固非病。時運矧復爾。幽居日月閑。糜粥勝甘膩。明日春風生。它山蕨薇紫。曾由基偶作三首。才退愁無友。時艱悔有家。鄉心慙杜宇。世事付楊花。故山荏苒失歸期。顏尚如丹鬢已絲。憶昔師門傳拙賦。迄今客路懶工詩。不傷遲暮無豪舉。却喜聰明減舊時。便把蝸廬題退隱。何時買得草堂基。遣愁時復賦篇章。此是書生習未忘。小吏豈堪人看覷。酒邊生怕帶詩狂。又與陳剛父論詩。少陵久矣跨鯨遊。近說西江沸不休。雙井發源注南海。百川分港失東流。君懷正印高懸眼。我扶玄關笑點頭。半世工夫緣底事。旁人却作等閑求。又答詩友徵近詩。寄傲西峰未肯東。論文舊約幾時同。不知傑句真何用。便有虛名豈療窮。珍重遠書微近作。踈蕪故我欠新功。每慙時輩多豪逸。點筆成章杯酒中。又題楊敬之贈項斯詩後。今古銷沉幾項斯。由來作者不祈知。看渠一片憐才意。合把黃金鑄敬之。胡仲參無題。露重濕征衣。風急翻紗帽。山下灌園人。倚鋤看馬過。又偶得二首。挑燈伴

寒夜兀坐竹爐邊。赤脚知吟苦。時將山茗煎。欲問梅花信。山寒去未能。靜思天外句。坐對夜深燈。戒酒頻添衲。煎茶旋鑿冰。月殘霜又落。無復叩

門僧。蕭澣寫林和靖梅花詩後。西湖幽處卧煙霞。湖裏荷花匝四涯。何事先生得佳句。荷花却不似梅花。又無題。衣縫密密今垂老。襤褸

咿咿漸趨行。君縱無情到閨闈。那應母子亦無情。趙汝錡偶成。青雲得志士。願指快所欲。萬事付杯酒。粉黛貯金屋。嗟我骨相窮。不受富貴逐。

嗜欲人所同。有時未免俗。青奴頗專房。高卧擎老足。黃妳最如意。開卷醒困目。暖寒命脚婆。凍衾轉陽谷。開樽喚湯婦。新醅溫鄙淥。始得此四人。明

珠不計斛。呼之即來前。相娛不相觸。時人皆笑之。畫餅豈充腹。我亦翻自笑。竹憲聽戛玉。又無題。人與春俱老。花因雨易殘。天涯雲萬里。腸斷

倚闌干。姚鏞雜詩一首。北風日以勁。古道無人行。陽坡樹已黃。陰崖草猶青。四時相代謝。誰爲此枯榮。攬衣坐幽磴。下有流泉聲。聽之不成調。

挹之有餘清。悠悠京洛塵。污人頭上纓。芳庭偶成二首。東風玉勒馬蹄輕。多少遊人上鳳城。燕子不來春寂寞。海棠花發近清明。漁歌聽盡

欲狂吟。一徑人家柳影深。天意似嫌花信早。東風吹雨又成陰。李濤雜詩四首。滔滔東流水。赴海無歸期。亭亭右轉日。今茲復來茲。人生寄天

地百年七十稀。思慮復營營。恐爲達此嗤。燕雀賀厦屋。虫蟻慕腥羶。野
花引飛蝶。古木來新蟬。秋天百虫吟。春天百鳥喧。翟公真闇事。喜愠見色

言。明主不棄士。我自志山林。爵服豈無華。才疎力難任。鳥向深山棲。魚
由深淵沉。吾亦愛吾廬。高歌復微吟。深巖有老翁。龐眉鬚鬢雪。夜半呼

我名。授我微妙訣。字畫古籀樣。體勢訛復缺。雙眸忽炯炯。須臾竟披閱。至
今得其傳。心會口難說。羅綺讀曾景建四詩。騷客詩翁死有靈。君行

亦足慰飄零。甫云來共長沙醉。原謂何如澤畔醒。一瓣誰堪續香供。四詩
今擬當埋名。黃花紅葉秋天晚。想見瀟湘野鷺汀。景建道州聽讀自跋其

詩云。已令家人石刻四詩殉葬。又絕句。巖青樹綠塊。兮。軋。澗。落。雲。寒。折
以清。二月山磬九月桂。江南處處得閑行。楚山葉脫洞庭波。絢落毛兮

製薜蘿。欲識千秋萬古意。前人此句後人哦。杜旃讀杜詩斐然有作。
王澤久淪浹。正聲皆雅言。百川忽西流。青黃雜蟻樽。騷經吹死灰。明燭日

月昏。綺麗兆建安。淳古還開元。夫子握元氣。大音發胚暉。明婁失毫芒。神
犧隘乾坤。再變六義彰。一日五典焚。上該周南風。下返湘水魂。仲尼不容

刪。餘子何足吞。五季兵戈繁。嘲啗虫鳥喧。頽波旣瀰漫。新奇尚西崑。吻喙
生譏評。神鬼懷憤寬。王蘇發醯甕。黃陳窮河源。煌煌百年間。後學同推尊。

時時或嘗鼎。往往猶戴孟。做募惑銅盤。箋釋訛金根。顧子小子旃。獨受罔極恩。神融淚交墮。思苦心屢捫。相望五百載。如接顏色溫。爐冶無停工。况

復忝諸孫。斯文誠儻存。庶以起九原。鄧允端絕句。楚岸卸輕帆。停舟曲江曲。日暮塞鴻歸。春水平橋綠。陳宗達絕句。鳥鳴山逕曉。鳧浴野

塘春。一路山磬落。幽香亂撲人。黃文雷絕句。乳燕飛飛簾影遲。不晴不雨晚春時。開窗縱目消書困。風送楊花落硯池。琴劔平生嘆薄游。雲

間春晚思如秋。夢回月浸書窗冷。身在吳松江盡頭。一室如窩且屈蟠。稍加糊幕得心寬。欲教禁足名安樂。只恐難支大暑寒。莫怪人言濟叔

癡。東行西去又思歸。兒童舊讀從溫故。一笑今朝到式微。張紹文絕句。曉雲扶日上高梧。一枕春醒困未蘇。山鳥不知如許事。隔窗猶自勸提

壺。雨過盤池起綠波。夜來添得幾圓荷。單衣不柰春寒惡。却羨楊枝挾續多。周端臣偶成。一灑斑斑小雨晴。杖藜隨意散幽情。不論城市山

林地。纔有梅花處便清。黃敏求偶成。熨開詩眼靜中觀。春在虛無杳靄間。風老山樊香世界。日烘躑躅錦屏山。峙糧備歲蜂開戶。堅壁防春燕

抱關。不被東風相鼓弄。蒼波依舊白鷗閑。葛起文偶成。止水澄胃次。蕭然遠俗氛。靜求微外趣。時策酒中勳。風馬欄前樂。香猊帳底雲。破黃臨

小草。咄咄逼鵝群。王志道五言一首。頗得山居趣。悠然醉復醒。開門延爽氣。數竹寄閑情。清磬敲殘月。寒潭浴曉星。誰能牽世網。汨汨苦勞生。

朱南杰。因陳梅隱求詩。早歲走江湖。那堪又歲除。隱梅非活計。行李盍寧居。自有珠璣集。不携朝貴書。酬君無好語。索笑謾躊躇。趙耕夫論

詩有感。未得歸山養聖胎。憑誰輕脫出山來。老猶作態經霜柳。靜有餘妍照野梅。大小易知惟酒戶。淺深難說是詩才。吟翁終欲招田父。止話桑

麻共一杯。陳允中無題。閑拈紅葉欲題詩。待得詩成又懶題。心事不隨流水去。月明人在赤橋西。戴復古無題。憶聞春燕語雕梁。又聽秋

鴻叫斷腸。一縷沉煙飛不過。兩樓相對立斜陽。又曾景建以詩得罪道州聽讀。聞說烏臺欲勘詩。此身幸不墮危機。少陵酒後輕嚴武。太白花

前忤貴妃。遷客芬芳窮也達。故人評論是耶非。飽參一勺瀟溪水。帶取光風霽月歸。又讀嚴粲詩。風撼瀟湘覆。非深於杜詩者不能作此語。江空

雪月明。以其一聯彙括爲對。粲字坦叔。筆端有神助。句法自天成。風撼瀟湘覆。江空雪月明。苦吟聊草草。妙趣若平平。李杜詩壇上。爲君題姓名。

胡仲弓讀杜牧之詩。風流不減晉諸賢。湧出胷中萬斛泉。吟到秦淮商女句。令人憶殺杜樊川。張至龍擬韓偓詩體。一聲阿雛鷓鴣雙。學

調新詞未得腔。拜了夜香郎喚睡。旋收鍼綫背銀缸。張煒絕句。春醒聽子規。枝上惜芳菲。風弄落花片。一簾紅雨飛。蒲陽劉氏題洪使君詩

卷。陳師復爲序。刻於芹泮。士爭披。傳到茅廬我竊窺。突過韋郎森戟句。高如柳渾采蘋詩。日惟坐歎熏沉水。間亦搖毫品荔枝。况有太丘爲小序。遙

知流布滿京師。又題許介之詩草。益公稱其詩。我留爲踏外。君住鴈迴邊。走僕行千里。敲門授一編。真妍非粉黛。至巧謝雕鐫。何必周丞相。男兒

要自傳。又教茂才論詩。詩道不勝玄。難於問性天。莫求鄰媪誦。姑付後儒箋。至質翻如俚。尫癯始似僊。吾非肝肺異。先得子同然。又還杜子

楚詩卷。老眼昏花廢課程。小窻久矣斷書聲。夜來忽得君詩卷。自起挑燈讀到明。張良偶題。誰家池館靜蕭蕭。斜倚朱門不敢敲。一段好春

藏不盡。粉牆斜露杏花梢。又賦。柳暗旗亭不忍看。臨江愁殺晉衣冠。傷心明月揚州路。十里朱簾蕙草寒。錢塘徐氏松庵雜詩四首。疇昔

庵中人。爲饑所驅去。去去竟何之。二年江上任。辛苦歸得來。重尋舊栖處。屋宇缺洒掃。蟻敗風雨蠹。頽漏思補葺。貧有中輟懼。人生如寄爾。復作身

外慮。丁丁斤斧邊。眼闇髮垂素。秋深燕營巢。無乃日已暮。松間待月明。露下衣上濕。歸庵閉門坐。勿聽俗塵入。挂壁燈花昏。倚窻樹影直。老懶世

久踈。浩歌心有適。淵明彭澤歸。醉裏詩成集。仲蔚蓬蒿宅。門無車馬跡。
山深嵐氣寒。煖我唯有酒。飲酒不易對。隔林叫隣叟。相見無雜言。唯說竹
利厚。明年筍當生。鋤壟蘭在手。事從勤苦得。此說誠不苟。客去醉則眠。徑
到無何有。鼻眼不吾用。遇物輒成礙。萬法何從生。要須自悟解。松庵今
年秋。木犀在門外。黃蘗含清芬。因風入窻內。我已結集空。彼猶故態在。色
香方橫陳。無諍得三昧。周成師古詩三首。采采芳梅枝。瑣碎白雲姿。
在山千花怨。出山百鳥啼。操持思所寄。轉趾迷所思。清披太始風。寒應太
虛月。一日拂人衣。三歲香不歇。昔懷今未歸。悄悄無誰語。超超何所爲。
空齋聽春雨。鏘然金玉聲。幽窻相爾汝。政以平在中。萬物皆媚嫵。暗想四
城外。花草不可數。浮雲日夜征。東臯悵何許。德人天機深。凡子人心多。
慄余思寡過。月計愧盈科。勿謂玉無疵。當知石可磨。四十尚無聞。素心恐
蹉跎。汲我簷下井。澆我盤中花。清香未似之。懶惰欲如何。大梁李氏無
題 舜裳本自完。色絲馬用補。故應盤溪翁。江海看煙雨。平生事機巧。百
歲亦塵土。寒花貴晚節。顧影吾與汝。平生霜中竹。歲晏風下草。靡靡不
可救。皦皦竟誰保。倉箱固爾富。食薇可以飽。歎息復歎息。已矣勿復道。
趙希仞劾王建詩體三首。玉釵半落珊瑚枕。金屋低垂翡翠簾。莫喚女

醫來問病。逢春自是可曾快。從渠羅鞵印香泥。偷鄉堦前問柳枝。昨日看郎來繫馬。杏花亭北立多時。銀釘未徹碧紗窻。秋入樓心送斷腸。誰

念纈花簾不捲。簷前收下玉玳瑁。來梓六言二首。葉浙歷而爭墮。菊徘徊而尚開。流年逼人太甚。佳客折簡不來。行空月不著相。出岫雲無

戀心。曾中一丘一壑。不磯城市山林。危旗借詩話於應祥第。有不許點抹之約。作詩戲之。我有讀書癖。每喜以筆界。抹黃飾句眼。施朱表事派。

此手定權衡。衆理析畎澮。歷歷燦可觀。開卷如畫繪。知君篤友于。因從借詩話。過手有約言。不許一筆壞。自語落我耳。便覺意生械。明朝試靜觀。議

論頗澎湃。讀到會意處。時時欲犯戒。將舉手復止。火側禁搔疥。技癢無所施。悶懷時一噫。只可捲還君。如此讀不快。千駟容可輕。君抱亦少隘。昨問

雞林人。尚有此編賣。典衣須一收。吾多當痛畷。徐文卿因放翁以劔南詩藁爲贈。詠歎之餘。賦短歌以謝。半生誦公流傳詩。每恨收拾多所遺。

豈知二千五百二十有四首。一旦俱爲吾得之。長松駕壑風烟老。春花媽然動碧草。祇今忠憤欲白頭。四海但推言語好。有文如此何所憂。世間萬

事元悠悠。君不見。李杜千載名不休。豈不勝彼公與侯。廬陵劉氏以仲立於枕上。和余韻。夜半得詩句。敲門喚余。余攝衣而起。相與對語于野航。

橋上殊爲勝絕。因再用韻。夜半詩壇喜解圍。楚天雲淡玉繩低。撞鍾自得興不淺。泣鬼初成人未知。踏月過橋驚鶴睡。犯霜對語伴烏啼。蕭條此意欣重見。絕勝圍紅醉玉卮。黃元易漫成。在俗參寥子。無田靖節翁。心平詩少怨。胃弱酒多中。煇煇蒸梅日。離離脫葉風。未應悲歲晏。端合幸年豐。張韓伯古詩。疊練如疊愁。練厚愁亦厚。登登夜深杵。隨月到窻牖。不道有離人。空齋獨搔首。天台徐氏偶題。老去功名不掛懷。高眠之外只清齋。偶因種竹便多事。風葉掃餘還蒲塔。史文卿偶成。一生富貴皆空夢。千古英雄只斷碑。幾欲含毫作天問。西風吹恨入江籬。無名氏無題。秦王夜宴茱萸宮。月上海棠千點紅。舞女歌童留不住。荒茵蔓草啼寒蛩。咸陽原頭三月春。楊花顛倒迷人。行人混混幾來去。東去邯鄲西去秦。又絕句。照影空蒙山色裏。背人撲澆水禽飛。梅花落盡春寒在。細雨斜風點客衣。侍宴黃昏未肯休。玉堦夜色月如流。朝來自覺承恩最。笑倩傍人認綉毬。

永樂大典卷之九百三

永樂大典卷之九百四

二支

詩

金壁故事。春來欲寄梅花信。晉陸凱寄梅花與范曄。詩云。折梅逢驛使。寄與隴頭人。江南無所有。聊贈一枝春。時凱在江南。曄在長安也。雪下誰吟柳絮詩。晉謝安嘗與諸子姪內集。俄而雪下。安曰。白雪紛紛何所似。兄子朗曰。撒鹽空中差可擬。兄女道蘊曰。未若柳絮因風起。安大悅。東坡詩云。柳絮才高不道鹽。池草又生靈運夢。晉謝靈運嘗於永嘉西堂。思詩不就。忽夢弟惠連。遂有池塘生春草。園林變夏禽之句。大以爲工。江蓴曾動季膺思。晉張翰字季膺。爲齊王司馬。見秋風起。因思吳江中蓴菜羹。鱸魚膾。乃作歌曰。秋風起兮木葉飛。吳江冷兮鱸正肥。人生貴在適志耳。何能羈宦數千里。遂命駕而歸。俄而齊王敗。時人謂之見機。省中有客看紅藥。晉謝元暉直省中作詩云。紫殿肅陰陰。彤庭赫弘敞。紅藥當階翻。蒼苔依砌上。又韓文公詩云。浩態狂風昔未逢。紅燈爍爍綠盤龍。覺來獨對忽驚恐。身在仙宮第幾重。又杜詩云。傍砌看紅藥。閣下何人對紫薇。唐白居易在

紫薇省中作詩云。絲綸閣下文書靜。鍾鼓樓中刻漏長。獨坐黃昏誰是伴。紫薇花對紫薇郎。又歐陽脩詩云。人言清禁紫薇郎。草詔紫薇花影傍。山木不知官况味。也隨紅日上東廊。湘竹斑斑成悲淚。染。昔舜巡狩死於蒼梧之野。二妃娥皇。女英。求舜淚下。染竹成斑。妃死爲湘神。杜甫題其祠云。蒼梧恨不淺。染淚在叢筠。筠者竹也。又元微之詩云。一枝斑竹渡湘沅。萬里行人感淚魂。知是娥皇廟前物。遠隨風雨送啼痕。海棠睡起醉魂歸。唐楊貴妃傳。明皇嘗召太真妃。妃被酒新起。帝曰。此乃海棠花睡未足耶。東坡詩云。東風嫋嫋泛崇光。香霧霏霏月滿廊。只恐夜深花睡去。高燒銀燭照紅粧。滿城桃李春長媚。晉潘岳。字安仁。爲河陽縣令。滿城種桃李。人謂河陽一縣花。又李廣傳。桃李不言。下自成蹊。同室芝蘭日自芳。孔子家語云。與善人同居。如入芝蘭之室。久而不聞其香。與不善人同居。如入鮑魚之肆。久而不聞其臭。亦與之俱化矣。是以君謹與處焉。梅熟必憑犀浦雨。唐杜子美詩云。南京犀浦道。四月熟黃梅。湛湛長江去。冥冥細雨來。橘香須待洞庭霜。唐韋應物。寄友人詩云。鄰居病後思新橘。始摘猶酸色未黃。書後欲題三百顆。洞庭須待滿林霜。鑑湖人看荷花發。唐李太白。夜吟吳歌云。鑑湖三百里。菡萏發荷花。五月西施採。人看溢若耶。齊東昏侯。鑿

金爲蓮花貼地。令潘妃行其上。人看曰此步步生蓮花也。馬嶺天飄桂子香。唐垂拱中。天台山桂子落十餘日。宋之問。吟靈隱寺詩云。鷲嶺鬱岩峩。龍宮隱寂寥。樓觀滄海日。門揖浙江潮。桂子月中落。天香雲外飄。又李道詩。月窟姮娥不惜哉。和香分付下天來。欲知仙艷無窮處。不隔人間朔望開。天作離人傷柳別。韓琮。詠柳詩云。枝頭纖腰兼鬪眉。春來無處不垂絲。灞陵岸上人離別。多少長條拂地垂。好看舉子爲槐忙。遯齋。閑盡集云。槐花黃。舉子忙。唐人翁望贊詩云。雨中粧點望中黃。勾引蟬聲送夕陽。憶昔當年隨計吏。馬蹄終日爲君忙。東籬黃菊攀陶令。晉陶淵明。爲彭澤令。宅邊種叢菊。九月九日出生菊邊。採菊盈把。忽有白衣吏送酒至。乃江州太守王弘使人來也。淵明遂飲醉而歸。作詩云。採菊東籬下。悠然見南山。西蜀朱櫻贈杜公。唐杜甫。詠櫻桃詩云。西蜀櫻桃也自紅。野人相贈蒲筍籠。金盤玉箸無消息。此日嘗新任轉蓬。家有燕山丹桂子。五代時。竇諫議禹鈞有五子。儀儼。倂。僞。皆貴顯。馮丞相道贈之詩曰。燕山竇十郎。教子有義方。靈椿一株老。丹桂五枝芳。靈椿出莊子。以八千歲爲春。以八千歲爲秋。義方。出左傳。石碣曰。愛子教之以義方。弗納於邪。世無商嶺紫芝翁。秦時東園公。夏黃公。角里先生。綺里季。謂之四皓。避秦亂入商雒山採芝。

而食。作歌曰。漠漠高山深谷。逶迤曄曄紫芝。可以療饑。唐虞世遠。吾將安歸。駟馬高車。其憂甚大。富貴之留人。不如負賤之肆志。及秦滅。高祖召不至。乃深入終南山而去。坡詩云。吾慕漢初老。時清猶茹芝。渡江拾得萍如日。春秋時。楚王渡江。有物觸王舟。王使人取之而不識。使人問孔子。孔子云。此萍實也。吾嘗聞童謠云。楚王渡江得萍實。大如斗。赤如日。剖而食之。甜似蜜。泣竹應教。笋出冬。漢孟宗。母冬月思笋。宗入林求之。時笋未生。乃泣於竹間。遂出笋數莖。持歸遺母。詠史詩云。孟宗泣竹笋冬生。豈是青青竹有情。影響主張非別物。人心但莫負幽冥。又宋朝陳繹。事親至孝。作堂名慶老。王荊公贈之詩曰。種竹應教出冬笋。開池自合湧寒泉。丞相不存留古栢。蜀丞相諸葛亮。字孔明。謚武侯。廟前有古栢甚高。杜子美題其祠云。丞相祠堂何處尋。錦宮城內栢森森。映堦碧草自春色。隔葉黃鸝空好音。又作古栢行云。孔明廟前有老栢。柯如青銅根如石。霜皮溜雨四十圍。黛色參天二千尺。先生歸去撫孤松。晉陶潛。爲彭澤令。郡遣督郵至。吏白應束帶見之。乃歎曰。吾不能爲五斗米。折腰事鄉里小兒耶。即解印綬。賦歸去來辭云。三徑就荒。松菊猶存。景翳翳以將入。撫孤松而盤桓。又宅邊手栽五株栢。自號五栢先生。古稱紫禁三眠栢。漢上苑中有柳狀似人

形。號曰人柳。一日三起。三倒。文選江之媯賦云。豈如河畔牛星。隔歲只聞一遇。不比禁中人柳。終朝剝得三眠。又杜甫洗兵馬云。青春復隨冠冕入。紫禁正耐煙花遶。世美青門五色瓜。秦郡平。封東陵侯。食邑千戶。及秦破家貧。於長安城東種瓜。五色而美。世號東陵瓜。唐柳子厚。賀瓜表云。七月而食。幽詩歌王業之難。五色祗珍。東陵詠嘉賓之會。又黃山谷薄薄酒行云。秦時東陵千戶食。何如東門五色瓜。青門即東陵也。中使奔騰南海荔。唐楊貴妃。嗜荔枝。必欲生致之。時南海獻荔。數千里至京師。色味未變。杜甫詩云。憶昔南海使。奔騰獻荔枝。又杜牧詩。一騎紅塵妃子笑。無人知是荔枝來。又蔡君謨荔枝歌云。綉衣中使動輜車。黃紙封林遍阡陌。雄豪鬪美建溪茶。宋朝范希文。鬪茶歌云。年年春自東南來。建溪先暖冰微開。溪邊竒茗冠天下。武夷先人從古栽。又云。北苑將期獻天子。林下雄豪先鬪美。飽看春結楊梅實。宋朝蘇東坡。在惠州作詩云。羅浮山下四時春。盧橘楊梅次第新。日啖荔枝三百顆。不妨長作嶺南人。笑對人簪茉莉花。東坡在儋耳。有黎女挿茉莉。含檳榔。戲書几間曰。暗麝着人簪茉莉。紅潮登頰醉檳榔。一本作白雲滿頭。啖棗何須貧婦去。前漢王吉。字子陽。時居長安。東家有棗樹垂吉庭中。吉婦取而啖之。吉知。乃去其婦。東家聞之。欲伐樹。

隣里共止之。因請吉還婦。鄉里為之諺曰。東家代樹。王陽去婦。東家棗完。去婦復還。傳柑留與細君誇。唐開元遺事。上元夜貴戚宮人。以黃柑賜近

臣。謂之傳柑宴。故宋襲其事。東坡有元夜詩云。老病行穿萬馬群。九衢人散月紛紛。歸來一盞殘燈在。猶有傳柑遺細君。古人謂妻為細君。葡萄

止渴思歸遺。唐陳叔達。帝嘗賜食得葡萄不舉。帝問之。對曰。臣母病。渴求之不得。願歸奉之。韓愈詩云。若欲滿盤堆馬乳。不妨添竹引龍鬚。葡萄出

大宛國。張騫使西域。得此種。種之中國。實如馬乳。朱少章詩云。葡萄產西域。漢使斲根回。自到中原後。先從上苑栽。葡萄亦名馬乳。枝蔓長數仞。橄

攬餘甘更待回。宋蘇軾。詠橄欖詩云。紛紛青子落紅鹽。正味森森苦且嚴。待得餘甘回齒頰也。輸崖蜜十分甜。崖蜜即櫻桃也。好事要將橙橘記。東

坡。贈劉景文詩云。荷敗已無擎雨蓋。菊殘猶有傲霜枝。一年好景君須記。正是橙黃橘綠時。孩心只為棗梨來。杜甫。百憂集行云。憶年十五心尚孩。

健如黃犢去復來。庭前八月梨棗熟。一日上樹能千回。溪邊蓮看佳人採。李白。採蓮曲云。若耶溪畔採蓮女。笑隔荷花共人語。日照新粧水底明。風

飄香袖空中舉。觀裏桃思道士栽。唐劉禹錫。出外職及歸京師。聞有道士種桃於玄都觀中。作詩云。紫陌紅塵撲面來。無人不道看花回。元都觀裏

桃千樹。盡是劉郎去後栽。後又出外職二十年。復歸京師。而桃已不存矣。惟見燕麥。兔葵。搖動春風耳。又作詩云。百畝庭中半是苔。桃花淨盡菜花開。種桃道士今何在。前度劉郎去復來。欲使忘憂萱草植。采朝丁晉公作詩云。草解忘憂憂底事。花名含笑笑何人。又杜詩云。侵凌雪色還萱草。漏泄春光有柳條。毛詩云。焉得諼草。言樹之背。諼。即萱也。背。堂之北也。退之示兒詩曰。主婦治北堂。今人稱母曰萱草。憑誰伴醉木蓮開。唐白樂天詩云。晚涼思飲兩三盃。召得江頭酒客來。莫怕秋無伴醉物。水邊花盡木蓮開。腰鎌山蕨殊無味。蘇子瞻詩云。老翁七十自腰鎌。慙愧春山笋蕨甜。

豈是聞韶解忘味。近來三月食無鹽。手扇溪蒲也自妍。宋朝徐仲車詩云。妾有一匹絹。以爲身上衣。自織青溪蒲。團團手中持。朝携麥壠去。暮汲井

泉歸。無人不看妾。不使見蛾眉。首蓓盤中非飽暖。唐薛令之。泉州人。爲東宮侍讀左庶子時。官僚簡淡。令之以詩自悼云。朝日上團團。照見先生盤。

盤中何所有。首蓓長闌干。飯澁匙難縮。羹稀筋易寬。無以謀朝夕。何由保歲寒。胡麻盃裏覺神仙。晉劉晨。阮肇。入天台山採藥。迷失道路。糧盡。望山頭有桃。共取食之。次有一盃流出。中有胡麻飯屑。二人相謂曰。此去人家不遠。沿出大溪。見二女。相邀過去。設酒榼。行夫婦禮。有仙客將三五桃至。

云來慶女婿。住半年求歸甚切。仙女送出洞口。至大道。得還鄉。並無相識。驗得七代子孫。傳聞上祖入山採藥不出。今人有詩云。流水胡麻好問津。何須採藥更求真。阮郎不悟思歸去。空度人間七世春。虛聞詩詠吳楓落。唐崔信明。有楓落吳江冷之句。爲人所稱。後鄭世翼。於舟中遇信明曰。聞君楓落吳江冷之句。因取其詩集展讀未終。曰。所見不逮所聞。投之水中而去。曾聽漁歌楚竹燃。唐柳子厚詩云。漁翁夜傍西岩宿。曉汲清湘燃楚竹。煙消日出不見人。欸乃一聲山水綠。剝棗烹葵還舊俗。毛詩幽風七月篇。六月食藿及蕒。七月烹葵及菽。八月剥棗。十月獲稻。爲此春酒。以介眉壽。言周人以農事開國。幽風之俗如此。乃還舊也。賣絲糶穀是何年。五代史進士聶夷中。作傷田家詩云。二月賣新絲。五月糶新穀。醫得眼前瘡。剝却心頭肉。我願君王心。化作光明燭。不照綺羅筵。偏照逃亡屋。經霜松栢姿猶茂。晉簡文帝與顧雍同年。而雍鬚髮盡白。帝問其故。對曰。松栢之姿經霜猶茂。蒲柳之質望秋先零。蒲柳雍自謂也。松栢謂簡文也。顧雍字愷之。落雨梧桐恨更多。唐元宗於楊貴妃死後思之不已。白居易作長恨歌云。春風桃李花開夜。秋雨梧桐葉落時。昔人於河濱網得一石。刻曰。井梧花落盡。一半在銀床。又李白詩。梧桐落金井。一葉飛銀床。銀床。井欄也。

十里荷開了公事。東坡守杭州。陳少章獻詩云。十里荷開菡萏初。我公初至有西湖。却將公事湖中了。見說官閑事也無。兩岐麥秀聽民歌。漢張堪爲漁陽太守。勸民農桑以致殷富。民歌曰。桑無附枝。麥秀兩岐。張君爲政。樂不可支。東山不見薔薇久。李白有憶東山詩云。不到東山久。薔薇幾度花。白雲他自散。明月落誰家。南浦傷如芍藥何。晉江淹別賦云。芍藥之詩。佳人之歌。桑中衛女。上宮秦娥。春草碧色。春水綠波。送君南浦。傷如之何。芍藥。出毛詩溱洧篇云。惟士與女。伊其相譖。贈之以芍藥。芍藥一名可離。晚節黃花須採訪。宋朝韓魏公詠菊花詩云。不羞老圃秋容淡。且看黃花晚節香。又古詩云。眼前景物年年別。只有黃花似故人。舊遊蒼蘚更摩挲。宋朝陳少微。遊碧落洞歸。令子弟作詩。有一先云。碧落他年訪舊遊。摩挲蒼蘚又從頭。懸崖縱有詩千首。直許蘇陳占上流。東坡少微皆題詩碧落洞。故曰蘇陳也。斷蛇帝子英雄在。漢高祖初爲泗上亭長。時過豐西澤中亭止飲。夜徑澤中。有前行者。還報曰。前有大蛇當徑。高祖醉曰。壯士行何畏哉。乃前拔劍斬蛇。後人至蛇所。有一老嫗夜哭。人問其故。嫗曰。吾子白帝子。化爲蛇當道。今者赤帝子斬之。嫗忽不見。胡曾詠史詩云。白蛇初斷路人通。漢祖龍泉血刃紅。不是咸陽將尾解。素靈那哭月明中。素靈。老

姬也。白帝子之母也。射虎將軍勇敢名。西漢文帝時。李廣有勇力。從軍擊胡。用善射。殺首虜甚衆。匈奴謂之飛將軍。嘗居藍田。於南山草中見石。以爲虎射之。矢入沒羽。下視乃石也。他日復射。矢簇無迹。黃魯直詩云。奪得胡兒馬便休。休嗟李廣不封侯。當時射殺南山虎。仔細看來是石頭。華表歸來聞鶴語。昔遼東華表柱。有鶴作人語。其上曰。有鳥有鳥。丁令威。去家千載今來歸。城郭如故人民非。何不學仙家。累累丁令威。鳥自謂古仙人也。北山去後覺猿驚。東漢末孔德彰作北山移文志。蕙帳空兮夜鶴怨。山人去兮曉猿驚。昔聞投簪逸海岸。今見解蘭縛塵纓。投簪漢疏廣也。東海人。故曰海岸。高飛不作商山鶴。漢高祖欲以趙王如意易太子。呂后使人早辭厚禮迎四皓。從太子入侍。四人年皆八十餘。鬚眉皓白。衣冠甚偉。上驚問。四人各言姓名。上曰。煩公卒調護太子。四人去。上目送之。召戚夫人曰。我欲易之。彼四人爲之輔。羽翼已成。難動搖矣。上曰。汝爲楚舞。我爲楚歌。歌曰。鴻鵠高飛兮一舉千里。羽翮已成兮橫絕四海。橫絕四海兮將柰何。雖有矰繳兮何所施。浪跡須騎禹穴鯨。杜甫送孔巢父歸江東兼呈李白詩云。南尋禹穴探李白。杜甫問信今何如。又賀知章以李白爲謫仙人云。若逢李白騎鯨魚。時白在會稽。乃禹穴之地也。援筆空成鸚鵡賦。後漢

禰衡少有才辨。爲江夏太守。黃祖書記云。祖時大會賓客。有獻鸚鵡者。祖子射。舉卮於衡前曰。願先生賦此以娛賓客。衡覽筆而就。文不加點。辭采甚麗。後於座上言不遜。爲祖所害。後人有詩云。黃祖才非長者儔。禰衡珠碎此江頭。今來鸚鵡洲邊過。惟有無情碧水流。吹簫猶聽鳳凰聲。列女傳。蕭史者。秦穆公時人。善吹簫。穆公有女。名弄玉。好吹簫。嫁之。吹作鳳凰聲。鳳凰止其屋。公作鳳凰臺。數月鳳凰從天而來。夫婦俱升仙而去。詠史詩云。秦娥一別鳳凰臺。東入青冥去不回。空有玉簫千載後。遺音時到世間來。又漢司馬相如遊臨邛。富人卓王孫。女卓文君新寡。竊於壁間窺之。相如以琴心挑之曰。鳳兮鳳兮。歸故鄉。遨遊四海求其凰。又云。鳳兮鳳兮。從我棲。得托字尾兮。永爲妃。文君遂奔相如。座上真龍誰起舞。漢高祖爲沛公時。與項羽鴻門之會。羽臣范增數目擊沛公。羽不應。出謂項莊曰。汝入以劔舞。因擊沛公。莊入爲壽。請以劔舞。時項伯與公約爲婚姻。項伯亦起舞。常以身翼蔽沛公。唐人李長吉作公莫舞歌云。材官小臣公莫舞。座上真龍赤帝子。樞中老驥謾雄思。東漢末。曹操挾天子令諸侯。屢欲篡漢。祚而自立。嘗作樂府辭云。老驥伏櫪。志在千里。烈士暮年。壯心未已。世說王莽大將軍。每醉後以鐵如意叩壺而歌此詞。壺盡缺矣。杜詩云。長歌擊

擗破。渡江已化中興馬。晉大安之際。有童謠云。五馬浮渡江。一馬化爲龍。時晉氏諸王渡江。惟元帝中興晉祚馬。乃應其讖。晉姓司馬也。倚帳空歌不逝。騅。項羽爲楚王時。有美人名虞。常幸。有駿馬名騅。常騎。被漢王追至垓下。及諸侯兵圍之數重。羽夜聞四面皆楚歌。遂飲帳中。悲歌曰。力拔山兮氣蓋世。時不利兮騅不逝。騅不逝兮無奈何。虞兮虞兮奈若何。李白擬恨賦云。項王虎鬪。白日爭輝。拔山力盡。蓋世氣微。帳中舞劍。泣挫雄威。騅馬不逝。噫吁何歸。胡曾詠史詩云。拔山力盡霸圖隳。倚帳空歌不逝騅。明月滿營天似水。那堪回首別虞姬。鳥喙越王休與共。春秋末。范蠡與大夫種言事越王勾踐時。越王爲吳王夫差所敗。栖於會稽。蠡種二人相與報吳。及吳滅。蠡乃乘扁舟泛五湖。至齊與大夫種書曰。越王爲人如長頸鳥喙。可以共患難。不可以共安樂。乃曰。狡兔死。良狗烹。飛鳥盡。良弓藏。敵國破。謀臣亡。子可以去矣。後又題韓信廟詩云。築壇拜日恩雖厚。躡足封時慮已深。隆準早知同鳥喙。將軍應起五湖心。鷄鳴齊客去難追。春秋戰國時。齊公子田文。號孟嘗君。養賓客數千人。入秦。秦昭王囚欲殺之。孟嘗君獻狐裘於王。幸姬爲言。釋之。得出。夜半至函谷關。關法雞鳴出客。孟嘗君恐追至。有客能爲雞鳴。野雞聞之。盡鳴。遂得出關而去。詠史詩云。寂寂函

關鎖未開。田文車馬出秦來。朱門不養三千客。誰爲雞鳴得放回。纏腰便跨揚州鶴。昔有四人共言志。其一曰欲富。其二曰欲貴。其三曰欲仙。其四曰欲腰纏十萬貫。騎鶴上揚州。東坡綠筠軒詩云。君對此君仍大嚼。世間那有揚州鶴。曳尾寧爲濮水龜。莊子釣於濮水。楚王使大夫聘之。莊子持竿不顧曰。吾聞楚有神龜死三歲矣。王中笥而藏之。此龜寧其死而留骨爲貴乎。寧其生而曳尾於塗中乎。大夫曰。寧生而曳尾。莊子曰。往哉。吾寧生而曳尾矣。胡曾詠史詩云。青春行役去悠悠。一曲汀蒲濮水流。正是塗中龜曳尾。令人特地感莊周。鷹揚渭水思興起。毛詩大明篇云。維師尚父。時維鷹揚。尚父乃太公呂望。如鷹鷲之揚也。釣於渭水。周文王爲西伯出獵於渭濱。見太公年八十坐茅而釣。遂車載歸。後爲太師。又載記云。慕容垂猶鷹也。饑則附人。飽則高飛。若遇風塵之會。必有凌霄之志。後呂布因陳登求徐州牧不得。登喻曰。吾見曹公言。待將軍譬如養虎。當飽其肉。不則噬人。公曰。不如卿言。譬如養鷹。饑則爲用。飽則颺去。杜送高書記云。饑鷹未飽肉。側翅隨人飛。龍卧南陽豈久留。蜀丞相諸葛孔明躬耕隴畝時。崔州徐庶謂蜀先主曰。諸葛孔明卧龍也。後人詩云。如今世上無徐庶。誰向桑麻識卧龍。又曰。天意欲蘇陽九旱。肯教空作卧龍休。又王荆公詩

云。溪北溪南水暗通。隔江遙望夕陽春。思量諸葛成何事。只合終身作卧龍。杜詩云。天下蒼生望霖雨。不知龍向此中蟠。誰信飯牛終作相。春秋時。齊相公送客於郊。宰臧飯牛車下扣角而歌曰。南山粲白石爛。中有鯉魚長尺半。生不逢堯與舜禪。短布單衣纔至骭。從昏飯牛至夜半。長夜漫漫何時旦。相公聞之。遂舉爲相。要知牧豕至封侯。西漢武帝時。衛青少時。父使之牧羊豕。青之兄弟皆奴畜之類。有人相青曰。此貴人也。官至封侯。青笑曰。人奴之。生得無笞辱足矣。安望封侯事乎。後爲大將軍。伐匈奴。賜爵關內侯。又漢公孫弘。菑川人也。初牧豕海上。後對策及第爲相。封平津侯。石橘林文集云。菑川牧豕之夫。初成何事。渭水非熊之兆。請看暮年。丹墀獨對龍旗動。宋朝夏英公竦廷對詩云。殿上衮衣明日月。硯中旗影動龍蛇。縱橫禮樂三千字。獨對丹墀日未斜。紫禁須陪鶴駕遊。杜甫洗兵馬行云。青春復隨冠冕入。紫禁正耐煙花遶。鶴駕通霄鳳輦備。雞鳴問寢龍樓曉。鶴駕。太子車也。周靈王太子晉好吹笙。乘白鶴。謝時人而去。故曰鶴駕。乘醉騎驢來古縣。唐李白被謫。一日乘醉騎驢入華陰縣。縣官使人問狀。對曰。曾使貴妃捧硯。力士脫靴。天子門前。尚容吾走馬。華陰縣裏。不許我騎驢。諷詩馳馬入長洲。唐高祖時天下無事。上官儀侍郎獨特國政。常凌

晨入朝。沿洛水堤步月。乃緩轡。諷詩云。脉脉廣川流。驅馬入長洲。鵲飛山
月曉。蟬噪野風秋。音韻清亮。人望之如神仙焉。黃牛欲買休歸去。西漢
龔遂爲渤海太守。勸民農桑。見郡人帶刀佩劍。遂曰。何爲帶牛佩犢。乃令
賣劍買牛。賣刀買犢。世傳一武人詩云。欲掛衣冠神武門。先尋水北渭南
村。却將舊斬樓蘭劍。買得黃牛教子孫。白馬牽來仔細看。昔人有獻金陵
牧薛大夫作白馬詩云。白馬披絲練一團。今朝被絆欲行難。雪中放去惟
留迹。月下牽來只見鞍。向北長鳴天外遠。臨風斜墮耳邊寒。自知毛骨天
然異。更請王郎仔細看。又家語云。顏回望吳門。馬見一足練。孔子曰。馬也。
然則馬之光景一足長耳。後號馬爲一足也。三匝羞渠飛鵲遠。魏武帝樂
府辭云。月明星稀。烏鵲南飛。遶樹三匝。無枝可依。烏鵲以喻蜀。劉備也。李
白詩。還聽月下烏。三遠未安巢。一朝看我快鵬搏。莊子逍遙篇。北溟有魚。
其名曰鯤。鯤之大不知幾千里。化爲鳥。其名曰鵬。鵬之背不知幾千里。怒
而飛翼若垂天之雲。是鳥也。北海運則將徙於南溟。南溟者。天池也。鵬之
徙擊水三千里。搏扶搖而上者九萬里。李白大鵬賦云。擊水三千以掘起。
搏風九萬而迅征。又杜詩云。從茲振羽翰。九萬一朝搏。歸來海燕知簾捲。
宋朝仁宗時。丞相呂申公。舉陳文惠公堯叟代相。堯叟大拜。極懷引薦之。

德。作燕詞。携酒過云。爲誰歸去爲誰來。主人情重珠簾捲。申公笑曰。自恨捲簾人已老。文惠曰。莫愁調鼎事無功。不食溪魚爲水寒。傳燈錄。華亭船子和尚偈云。千尺絲綸直下垂。一波纔動萬波隨。夜靜水寒魚不餌。蒲船空載月明歸。又黃山谷。作長短句歌云。一箬笠。一蓑衣。一釣絲。斜風細雨不須歸。金鱗正在深深處。也須垂吞又吐。信還疑。上鉤遲。水寒夜靜。蒲目江山。空載月明歸。虎豹山中藜不採。西漢鄭昌爲諫大夫。愍傷蓋寬饒。爲文吏詆挫。上書曰。山有猛獸。藜藿爲之不採。國有忠臣。奸邪爲之不起。帝不聽。下寬饒吏。寬饒乃引刀自剄。衆莫不憐之。蛟龍水裏竹難安。杜子美詩云。欲作魚梁雲覆湍。因驚四月雨聲寒。清溪元有蛟龍窟。竹石如山不敢安。言劈竹積石以爲聚魚之區。而下有蛟龍能興雲致雨。雖魚梁之利。而公不敢犯之。趨利異乎人之徑行直前以謀利矣。要知霧豹成文虎。列女傳陶大夫妻曰。妾聞南山有玄豹。霧雨七日不下食者何也。欲以澤其毛衣而成其文章。故藏身以遠害。今君貪富務才不無後患乎。謝朓詩云。雖無玄豹姿。終隱南山霧。易革卦云。大人虎變。其文炳也。君子豹變。其文蔚也。揚子曰。狸變則豹。豹變則虎。誰謂雲龍作野麋。晉陸雲字士龍。荀鳴鶴。二人未相識。因會張華座。華以其並有大才。謂相見可勿作常語。陸

曰雲間陸士龍。荀荅曰。日下荀鳴鶴。陸曰。旣開青雲觀。白雉。何不張爾弓。挾爾矢。張曰。荀何遲。荀曰。本是雲龍駮駮。今乃山鹿野麋。獸微弩強。是以發遲。一座撫掌而笑。歸燕須尋華屋去。唐元和中。士人下第。多作詩刺試官。獨章孝標作歸燕詩。獻庾侍郎云。舊壘危巢泥已落。今年故向社前歸。連雲大廈無棲處。更傍誰家門戶飛。又東坡賀新郎詞云。乳燕飛華屋。飛鳥願借上林棲。唐李義甫。初召見太宗。令詠鳥詩云。日裏颺朝彩。琴中聞夜啼。上林多少樹。不借一枝栖。太宗曰。我當全借爾。豈特一枝。颺朝彩。日中有鳥也。聞夜啼。乃王義慶爲江州刺史。宋文帝所徵。家人大懼。妓妾夜聞鳥啼。憂思而成曲。曰。烏夜啼。李白詩云。爾何不向別處栖。夜夜夜半當戶啼。風飄雨洒亦不移。君家樹頭多好枝。金牛通路山須鑿。蜀記曰。昔蜀中無路入秦。秦惠王聞蜀有五丁力士壯勇。乃以鐵作牛五頭。詐稱其牛食粟。每日糞金三斗。蜀侯聞之。貪金。乃使五丁開山作路入秦。取牛。得牛視之。果知其詐。路已通矣。後五丁死。惠王遣張儀將兵伐蜀。蜀遂滅。詠史詩云。山色千重擁蜀門。成都別是一乾坤。五丁不鑿金牛路。秦惠何由得併吞。駟馬登橋柱必題。西京雜記。司馬相如字長卿。初往蜀郡。過升仙橋。乃題其柱曰。大丈夫不乘駟馬車。不復過此橋。後果車歸至其處。杜詩云。

贈粟困應指。登橋柱必題。贈粟事周瑜也。又孟明焚舟賦云。出西蜀都。題橋以見志。入函谷關。棄繻而示誠。棄繻事。前漢終軍。年十八。西入關。關吏授軍繻。軍曰。大丈夫西遊終不還。遂棄繻而去。後拜謁者。持節出關。關吏識之曰。此前棄繻生也。却笑採薪悲白雉。古有牧犢子。五十而無妻。李白詩云。隴麥青青二月時。白雉朝飛挾兩雌。錦衣綺翼何離襪。牧犢採薪感之悲。又云。枯楊枯楊爾生莢。我獨七十而孤棲。好聽掩瑟唱黃雞。白居易侍郎守杭州。日有歌妓高珍瓏者。白公與之歌曰。罷胡琴。掩秦瑟。珍瓏再拜歌初畢。莫謂使君不解歌。聽唱黃雞與白日。黃雞催曉丑時鳴。白日催人酉後沒。腰間紫綬繫未穩。鏡裏朱顏看易失。珍瓏珍瓏奈老何。使君歌兮汝更歌。逢春須問牛何喘。漢宣帝時。丙吉爲相。出逢人逐牛。牛喘吐舌。吉駐車使吏問逐牛者曰。牛行幾里矣。或譏言。道中群聞死傷。前後失問。吉曰。方春少陽用事。未可太熱。恐有傷害。宰相典調陰陽。職當憂。故問之。又江南李璟。登臺見牛晚卧。曰。牛且熱矣。有樂部頭李進明曰。臣不學。敢上絕句云。曾遭霖威鞭敲角。又被田單火燎身。悶背夕陽嚼枯草。而今問喘更無人。遇雪方嗟馬不前。唐韓文公姪韓湘。落魄不羈。公勉之學。湘曰。予之學與公異。公令作詩以見志。湘乃詩曰。解造逡巡酒。能開頃刻花。

有人能學我。同共看仙葩。公覽詩戲之曰。子能奪造化權乎。湘曰。此事甚易。公開樽。湘聚土以盆覆之。良久發視。乃出碧花二朵。花間擁出金字一聯云。雲橫秦嶺家何在。雪擁藍關馬不前。公未曉其意。湘曰。事久可驗。遂告而去。未幾。公爲佛骨事謫潮州。在途中遇雪。俄有一人冒雪而來。乃湘也。問公曰。憶花上之意乎。正今日之事也。公詢其地。即藍關也。嗟嘆久之。曰。吾爲汝足成此詩。曰。一封朝奏九重天。夕貶潮陽路八千。本爲聖明除弊事。豈期衰老送殘年。雲橫秦嶺家何在。雪擁藍關馬不前。知子遠來深有意。好收吾骨瘴江邊。自信蘧蘧成夢蝶。莊子齊物篇。莊周夢爲蝴蝶。栩栩然化蝶也。俄然覺。則蘧蘧然周也。不知周之夢爲蝶歟。蝶之夢爲周歟。故人有詩云。蘧蘧無一事。非夢亦非周。又白居易無柰何歌曰。爲彼何非。爲此何是。誰明此志。夢蝶之子。何禍非福。何吉非凶。誰達此觀。喪馬之翁。休看跼跼墜飛鳶。東漢馬援有大志。其弟少游常哀之曰。士生一世間。乘下澤車。御欵段馬。鄉里稱善人足矣。致求羸餘。但自苦耳。後援征五溪蠻。在浪泊西里間。下潦上霧。毒氣鬱蒸。仰視飛鳶。跼跼墜水下。卧念少游平生時語。何可得也。坡詩云。何須更待飛鳶墜。方念平生馬少游。又劉夢得經伏波祠有詩云。一以功名累。方思馬少游。援爲伏波將軍也。書成浪語。

憑鴻鴈。前漢蘇武使匈奴。留十九年。後漢使至匈奴。常惠教使者言於單于。漢天子射上林中。得鴈足繫帛書云。武在某澤中。單于大驚。武等遂還。孔琛曰。憑鴈寄書真浪語耳。杜詩云。萬里衡陽鴈。今年又北歸。繫書真浪語。寂寂故山微。又江淹詩。袖中有短書。欲寄雙飛燕。皆無是理。以鴈秋來而春去。燕秋去而春來。如人寄書有往來之義。客久傷心怯杜鵑。蜀成都記曰。杜宇自天而降。稱爲望帝。後死其魄化爲鳥。名曰杜鵑。亦曰子規。深春時有聲。蜀人悲之。詠史詩云。杜宇曾爲蜀帝王。化禽飛去舊城荒。年年來叫桃花月。似向春風訴國亡。又李白蜀道難云。問君西遊何當還。畏途巉岩不可攀。但見悲鳥號古木。雄飛呼雌遶林間。又聞子規啼。夜月愁空山。又杜詩。傷心怯杜鵑。鶴避茶煙人不到。宋章聖真宗也。使人召魏野。野聞使至。留詩一聯於壁間云。洗硯魚吞墨。烹茶鶴避煙。使錄詩以進。章聖曰。野不來矣。遂不召。鶯啼花裏客猶眠。唐王維居輞川作詩云。桃紅復含宿雨。柳綠更帶春煙。花落家僮未掃。鶯啼山客猶眠。九重彩鳳休教下。宋陳希夷先生。諱搏。字圖南。居華山。周世宗時嘗召見。至宋朝太宗皇帝太平興國初。再赴召。後歸隱。再召。辭表曰。九重丹詔。休教彩鳳嚙來。一片野心。已被白雲留住。一箇冥鴻已奮飛。楊子曰。鴻飛冥冥。弋人何慕焉。宋

朝范文正公謫官過嚴州。題嚴子陵釣臺云。漢包六合。周英豪。一箇冥鴻。惜羽毛。世祖功成三十六。雲臺爭似釣臺高。塞馬安知非是福。北叟塞上翁也。馬亡入胡。人弔之。翁曰。安知非福乎。後馬將駿馬歸。人賀之。翁曰。安知非禍乎。後子騎馬墮折髀。人弔之曰。安知非福乎。後胡兵大出。丁壯者戰死。其子以跛故。得父子相保。又賈誼賦云。禍兮福所倚。福兮禍所伏。海鷗相與盡忘機。列子云。海上有好鷗者。每旦之海上。從鷗鳥遊。鷗至百數。其父曰。取來吾翫。明日之海上。鷗鳥舞而不下。機心一萌。鷗鳥自驚。李商隱太倉箴云。海翁忘機。鷗故不飛。海翁易慮。鷗乃飛去。左太冲詩。壘壘元思清。曾中去機巧。物我兩忘情。可以狎鷗鳥。行人爭羨松江鱸美。宋朝范希文。贈釣翁詩云。江上往來人。盡愛鱸魚美。君看一葉舟。出沒波濤裏。東坡赤壁賦云。今者薄暮。舉網得魚。巨口細鱗。狀似松江之鱸。又隋唐佳話云。吳都獻松江鱸魚膾。煬帝曰。所謂金齏玉鱠。東南之佳味也。漁父還歌。桃花流水鱖魚肥。自庇一身青箬笠。相隨到處綠蓑衣。斜風細雨不須歸。坡以詞增成爲浣溪沙云。萬里不封飛燕食。東漢班超人相之曰。當封侯萬里之外。問其狀曰。燕領虎額。飛而食肉。萬里侯相也。石敏若橘林文集云。

玉山照人。晉侍郎裴楷。字叔則。人見如近玉山。照映人也。燕頷封侯。漢飛將李廣。匈奴號爲飛將軍。數從天子射獵。格殺猛獸。文帝嘆曰。惜廣不逢時。今當高祖世。萬戶侯豈足道哉。是不封侯事也。五湖便作釣魚歸。范蠡與大夫種事。越王既平吳。遂乘扁舟泛五湖。人有詩云。一箭已中鵠。五湖歸釣魚。又羅隱作歸五湖詩云。江東日暖花又開。江東行客思悠哉。高陽酒徒盡彫落。山簡事也。終南山色空崔嵬。盧藏用始隱終南山。後赴召至闕。人曰。此山乃仕宦之捷徑耳。聖代也。知無棄物。侯門未必用遺才。一輪明月一竿竹。家在五湖歸去來。勸君偶作鴛鴦合。蘇東坡。一本云。杜子

美。鴛鴦泛江。詩云。使君自有婦。莫作野鴛鴦。鴛鴦匹鳥也。飛則並翼。眠則交頸。以喻人之夫婦也。宋朝呂士隆知宣州。好以事笞官妓。妓皆欲去而未能也。適杭州一妓到。士隆喜之。一日群妓小過。又欲笞之。妓泣曰。妾不敢辭。恐杭妓不安也。呂釋之。梅聖俞聞作莫打鴨詩。以寄意云。莫打鴨。莫打鴨。打鴨驚鴛鴦。鴛鴦新向水中落。莫比孤洲老鴿鷓。鴿鷓尚欲遠飛去。何況鴛鴦羽翼長。擇對屏看孔雀開。隋竇毅在周爲上柱國。有女生而髮垂過耳。三歲與身等。讀列女誡傳。一過不忘。毅常曰。此女有異相。見識不凡。何可妄與人。因畫孔雀於屏間。請婚者使射二矢。陰約中目。則許之。射

者閱數皆不合。唐高祖最後射二矢。各中目。遂歸之。後爲唐高后。杜甫賀季監宅詩云。屏開金孔雀。褥穩綉芙蓉。鸞鳳結成詩有約。唐于祐。晚步禁衢於御溝中。得一紅葉題詩云。流水何太急。深宮盡日閑。慙慙謝紅葉。好去到人間。祐見詩。亦取一葉題云。曾聞葉上題紅怨。葉上題詩寄阿誰。後祐託韓泳門館。帝放宮女出嫁。泳以韓夫人嫁祐。一日開宴。二人各有所題詩爲證。泳曰。二子可謝媒人也。韓氏笑答曰。一聯佳句。隨流水。千載幽思。蒲素懷。今日結成鸞鳳友。方知紅葉是良媒。古今詞話云。唐顧况遊御溝。得一梧葉上有詩云。一入深宮裏。年年不見春。波間寫紅葉。寄與有情人。况讀恍如有失。乃取一葉題詩擲於上流曰。花落深宮鶯亦悲。上陽宮女斷腸時。帝城不禁東流水。葉上題詩寄與誰。余以况與祐。二者之事皆相似。故並質之於此。

麒麟抱送夢將來。昔徐陵年四歲。家人携見寶誌上人。上人乃以手摩其頂曰。天上石麒麟也。杜甫徐卿二子歌云。徐卿二子生絕奇。感應吉夢相追隨。孔子釋氏親抱送。並是天上麒麟兒。**錦標要識龍頭奪。**唐盧肇。黃頗。皆宜春人。頗富而肇貧。時赴舉。同日起途。郡守獨餞頗於郵亭。而遺肇。明年肇狀元歸。郡守會看競渡。肇即席賦詩。末句云。向道是龍剛不信。果然奪得錦標歸。**盃酒須知鶴髮催。**宋朝仁宗時。蔡齊狀

元歸有酒失。有僧與齊舊。一日來謁齊。不過題詩一絕而去云。聖君寵重
龍頭選。慈母恩深鶴髮垂。君寵母恩俱未報。酒如爲患悔何追。齊歸見詩。
遂命一盃酒飲畢覆盃。終不飲也。汗血驊騮真偉物。杜甫從姪杜勤下第。
甫於長安作醉歌行。驊騮作駒已汗血。驚鳥舉翮連青雲。詞源倒流三峽
水。筆陣獨掃千人軍。又贈曹將軍詩云。先帝天馬五花驄。畫工如山貌不
同。斯須九重真龍出。一洗萬古凡馬空。渥洼水中出汗血馬。即天馬也。能
言鸚鵡豈凡材。宋朝王禹偁字元之。年七歲能屬文。畢文簡公爲郡從事。
聞其家以磨麵爲生。因令作磨詩。元之不思以對曰。但存心裏正。無愁眼
下遲。若人輕着力。便是轉身時。文簡大奇之。留與子弟講學。一日太守席
上出對云。鸚鵡能言爭似鳳。坐客未有對。文簡寫之屏間。元之書其下曰。
蜘蛛雖巧不如蚕。文簡嘆曰。此經綸之才也。遂加以衣冠。呼爲小友。至文
簡入相。元之已掌書命矣。又禰衡賦云。惟西域之靈鳥。挺自然之竒姿。體
金精之妙質。含火德之明輝。性辨慧而能言。才聰明而識機。乞閑且作
龜魚主。宋朝王荆公罷相知金陵作詩云。投老歸來一幅巾。君王猶許備
藩臣。芙蓉塘下疏秋水。聊與龜魚作主人。再罷相會靈臺觀。使者居鍾山。
又詩云。乞得膠膠擾擾身。江湖波浪替埃塵。只同鳧鴈爲閑侶。不與龜魚

作主人。昔馮羸王性仁愛。每得魚放於池中。其子監丞常竊釣之。王不憚。乃鎖其門。高其墻。題詩於門曰。高却垣墻鎖却門。監丞從此罷絲綸。池中魚鱉應相賀。從此方知有主人。往卜寧爲雞鶩爭。楚屈原字平。旣放三年不見王。乃往卜於鄭詹尹曰。余有所疑。欲因先生決之。詹尹乃端策拂龜曰。君將何以告乎。曰。吾寧昂昂。若千里之駒乎。將泛泛。若水中之鳧。與波上下。偷以全吾軀乎。寧與黃鵠比翼乎。將與雞鶩爭食乎。此孰吉孰凶。何去何從。又云。世溷濁而不清。蟬翼爲重。千鈞爲輕。黃鍾毀弃。瓦釜雷鳴。平自傷忠直不容於時。而耻於小人伍也。留鶴本爲高士侶。宋朝太宗興國中。潘若冲罷林任道經南岳。留鶴一隻與處士廖融。贈詩云。峭峪數年同野興。一官纔罷共船歸。稻梁少飼教長瘦。羽翼無傷任遠飛。側耳聽吟侵靜夜。合花作舞帶斜暉。朝天萬里不將去。留伴高人坐釣磯。若冲到今授官維揚有詩寄融云。秋來頻夢岳雲白。別後應添鶴頂紅。後融與鶴相繼而亡。若冲感之爲一絕云。南岳僧來共嘆吁。風亭月榭已荒蕪。先生去世未十日。留伴高人鶴亦殂。放猿猶有主人情。宋朝王仁裕嘗養一猿名曰野賓。久而放之。作詩云。放汝叮嚀復故林。舊時伴侶好相尋。耐寒不憚霜中宿。隱迹從教霧裏深。歸去免勞青嶂夢。躋攀應怯白雲心。三秋菓熟松

稍健。任抱高枝徹曉吟。裕後入蜀。過墻冢祠前。漢江之陰。有群猿連臂下飲清流。有一巨猿捨群而前。從者指曰野賓。呼之而應。哀吟而去。又作詩云。墻冢祠前漢水濱。山猿連臂下嶙峋。漸來子細窺前客。認得依稀似野賓。月宿免勞羈紲夢。松棲那復稻粱身。數聲腸斷連雲叫。認得前年舊主人。吟成白鷺窺人笑。韋莊感舊詩云。長安方悟少年非。人道新詩勝舊詩。十里野塘留客釣。一軒春雨對僧棋。花間醉任黃鸝語。池上吟成白鷺窺。大道不將爐冶去。此心重立太平基。其詩壯後官至台輔。夢覺黃鸝喚客鳴。宋朝陳搏嘗於彭門壁間見一聯云。一鳩鳴午寂。雙燕語春愁。後以語東坡曰。世謂公作否。坡笑曰。此唐人得意之句。僕安能道此。茗溪漁隱曰。予常用此語。作春日一聯云。話盡春愁雙紫燕。喚回午夢一黃鸝。經卷寫來鵝欲換。晉王羲之性愛鵝。見山陰道士有群鵝求市之。道士曰。爲我寫黃庭經以換。羲之寫畢。道士舉群鵝相贈。遂籠鵝而歸。杜詩云。鵝費羲之墨。又李白詩。山陰道士如相見。寫寫黃庭換白鵝。金囊倒盡鴨呼名。唐陸龜蒙居震澤。有闔鴨一欄。有內養自長安使杭州。舟出舍下。挾彈斃其綠頂鴨。龜蒙手一表駭云。此鴨善人語。待附蘇州上進天子。使者斃之柰何。內養信。酬以囊中金。因徐問其鴨何言。龜蒙曰。能自呼其名。內養憤且笑。蒙

還其金曰。吾戲耳。後有題吳江三賢堂內云。千首文章二頃田。囊中未有一錢看。却因養得能言鴨。驚破王孫金彈丸。河豚欲把聲名道。梅聖俞。

於范希文席上賦河豚詩云。春洲生荻芽。春岸飛楊花。河豚於此景。貴不數魚鰕。河豚出暮春。遊水上。食柳絮而肥。南人多以荻芽爲羹。故聖俞知之。道盡河豚好處。人以此詩爲絕唱。劉元甫戲云。鄭都官鷓鴣詩。人謂鄭鷓鴣。聖俞河豚詩。當謂梅河豚。此魚。吳人珍之曰。其腹腴爲西施乳。坡詩。萋蒿短短荻芽肥。正是河豚欲上時。甘美遠勝西子乳。吳王當日未曾知。孤鴈能令禮貌殊。司馬文正詩話云。鮑當美。景德二年。登進士第。爲河南法掾。嘗忤其意於知府薛映。因獻孤鴈詩云。天寒稻粱遠。萬里孤難進。不惜充君庖。爲帶邊城信。薛大稱賞。自是不以掾屬禮待之。時人謂之鮑孤鴈。薛公暑月詣其舍。當美方露頂狼狽。入易服飾。把板而出。忘其幘頭。薛公嚴重。左右莫敢言。坐久月上。當美顧見髮影。大慙。以公服袖掩頭而退。學

士吟成蝴蝶喚。謝學士。吟蝴蝶詩三百首。時人呼爲謝蝴蝶。其中有佳句云。狂隨柳絮有時現。舞入梨花何處尋。又曰。江天春晚暖風細。相逐賣花人過橋。後人有詩云。物化舊同莊叟夢。詩題新得謝公名。都官詩就鷓鴣呼。鄭公詠鷓鴣詩云。暖戲平蕪錦翼齊。品流應得近山雞。雨昏青草湖邊

過。花落黃陵廟裏啼。遊子乍聞征袖濕。佳人纔唱翠眉低。相呼相叫湘江曲。苦竹叢深春日西。時人呼爲鄭鷓鴣。唐人呼爲鄭都官。啼春妖鳥須知避。方圭好詩。宋公庠知揚州。圭來謁。乃宴於平山堂。圭誦詩不已。宋欲他辭已之。乃見野牛就木挨癢。謂坐客胡恢曰。野牛恃力狂挨木。恢應曰。妖鳥啼春不避人。宋公大笑。圭悟其意。飲至客散。欲奮臂擊恢。衆救而免。離席青蠅却被驅。唐人羅隱與顧雲同謁淮南高駢。雲爲人素雅律重。而性傲睨。高公留雲而遠隱。至武陵餞雲于亭。時盛暑青蠅入座。高命扇驅之。譚隱曰。青蠅被扇扇離席。隱見白澤圖釘在門。應曰。白澤遭釘釘在門。乃譏雲也。傳語借鵬休跨鶴。廬山道士林完魁飲酒啖肉。居九天使者廟。一日有鶴因風飄憇于廟庭。道士驚喜。自謂當赴上天命。令山童捉而乘之。羽儀清弱不勝其載。毛傷骨折而斃。翌日馴養知訴于公府處士。陳沆嘲之曰。啗肉先生欲上昇。黃雲踏破紫雲崩。龍腰鶴背無多力。傳語麻姑借大鵬。不須乘馬且騎驢。唐咸通中。以舉子衣服侈異。下令不許騎馬。場中以下千人皆跨長耳驢。或嘲之曰。今年初下盡騎驢。短帽長鞭蒲九衢。清瘦兒郎猶自可。就中愁殺鄭昌圖。昌圖肥大。故有此作也。好看巾笥憐黃雀。後漢楊寶年七歲。行於華陰山。見一黃雀被瘡。爲螻蟻所損。哀而憐

之。因收中箱中。採黃花餵之。經十餘日瘡愈。旦去暮來。一旦變爲黃衣年
少。與玉環一雙報之曰。好掌此環。子孫累世爲三公。寶生震。明帝時爲太
尉。震生秉。和帝時爲太尉。秉生賜。安帝時爲司徒。賜生彪。靈帝時爲司空。
寶華陰人。出搜神記。莫把絲綸釣白龜。搜神記。毛寶行於江。見漁人釣一
白龜。寶贖放江中。後十餘年守鎮邾城。與石虎將軍交戰。戰罷投江中。脚
如踏一物。視之乃昔所放之白龜。漸得至岸。背長四尺。龜至中流。猶返顧
寶。又會稽錄。孔愉見人籠龜。買放之中流。龜左顧數四。及愉封侯。鑄侯印。
印龜左顧者。三鑄如初。工以告愉。悟而佩之。槐國蟻邀人理政。異聞集云。
淳于棼家居廣陵。宅南有古槐樹。棼醉卧其下。夢二使者曰。槐安國王奉
邀棼。隨使入穴中。見曰。大槐安國。其王曰。吾南柯郡。政事不理。屈卿爲守。
至郡凡二十載。使送歸。遂覺。因尋古槐下穴。洞然明朗。可容一榻。有二大
蟻。乃王也。又尋一穴直上南枝。即南柯郡也。雲軒燕助客歸期。唐王榭居
金陵。以航海爲業。遇風舟破。榭附一板。抵一洲。見翁媪皆皂服曰。此吾主
人郎也。引至宮室。見王坐殿。以女妻之。榭問女。此何國。曰。烏衣國也。王召
宴於寶墨殿。命作詩。卒章云。恨不此身生羽翼。王曰。不能與君生羽翼。亦
可與君跨煙霧。遂命取飛雲軒。既至。乃烏氈氍子。令榭入其中。閉目少息。

至家見梁上雙燕呢喃。下視。謝乃悟。所止燕子國也。至秋燕去。乃書一詩。繫燕尾曰。誤入華胥國裏來。主人終日苦伶才。雲軒一去無消息。淚洒春風幾百回。來春燕至。復有詩云。昔人相逢宜數合。只今睽遠是生離。來春縱有想思字。三月天寒無鴈飛。明年燕果不來。豺狼當道狐安問。後漢張綱。字文紀。和帝時遣八使循行風俗。綱獨埋車輪於洛陽都亭。曰。豺狼當道。安問狐狸。遂奏梁冀等。無君臣之心。十五事。鴻鵠冲天。燕豈知。前漢陳勝。少時與人傭耕。輟耕之隴上。悵然曰。苟富貴無相忘。傭者笑曰。若爲傭。何富貴之有。勝太息曰。燕雀安知鴻鵠之志哉。又白帖云。有餉鶴於支遁者。遁謂之曰。爾冲天之物。寧耳目之翫乎。遂放去。毛詩云。鶴鳴于九臯。聲聞于天。不悟猿妖能命筆。世說云。廣德中。孫恪遊洛中。遇袁氏女。納爲室。後十年。同至峽山寺。袁氏乃持一碧玉環。獻僧曰。是此院舊物。僧初不曉。及齋罷。有野猿數十。悲嘯而集。袁氏惻然。命筆題詩云。無端造化幾煙沉。剛被風情役此心。不如逐伴歸山去。長嘯一聲煙霧深。詩畢。遂裂衣化爲猿。追嘯者而去。僧方悟曰。此猿乃貧道所養者。碧玉環。胡人所施。繫其頸也。坡詩云。忽憶嘯雲侶。賦詩留玉環。後郭昌題詩云。猿豈爲妖恪自迷。世間那有倘來妻。裂衣心痛從前悔。恪不如猿。反噬臍。豈知木客解吟詩。寰

宇記。上洛山多木客。乃鬼類也。形似人。語亦似人。而徐鉉小說。鄱陽山中
有木客。自言秦時造阿房宮采木者。食木實。遂得不死。時就民間飲酒。爲
詩一章云。酒盡君莫酌。壺傾我當發。城市多囂塵。還山弄明月。故坡詩云。
誰向空山弄明月。山中木客解吟詩。竊銅嘗見徒奸吏。九域志。賈郁。性
峭直。不容人吏。文遇爲仙游令。及受代。有一吏酣酒。郁怒曰。吾再典此郡。
必懲此輩。吏揚言公欲再令。猶造鐵船渡海也。郁後復典是邑。時醉吏爲
庫吏。盜官錢數萬下獄。其狀批榜尾曰。竊銅鎚以潤家。非因鼓鑄造鐵船
而渡海。不假爐鎚。因決杖徒之。懷璧曾聞罪匹夫。左傳桓公十年。虞叔有
玉。虞公求旃。弗獻。旣而悔之曰。周諺有之曰。匹夫無罪。懷璧其罪。吾焉用
此。以賈害也。乃獻之。與舅同心。河棄璧。左傳秦伯納晉公子重耳。及河。子
犯以璧授公子曰。臣從君巡天下。臣之罪多矣。臣猶知之。而况君乎。請由
此亡。公子曰。所不與舅氏同心者。有如白水。遂投璧於河。子犯。狐偃也。治
民善政。浦還珠。後漢孟嘗爲合浦太守。郡無耕稼。海出珠。民採以易米。先
宰守貪穢。採求不知紀極。珠忽去。其民困。及嘗到郡。革前弊。未踰歲。去珠
復還。坡詩云。合浦賣珠無復有。論錢盡買不平事。筆談毘陵女子。詠破錢
云。半輪殘月掩塵埃。依稀猶有開元字。想見清光未破時。買盡人間不平

事。又魯褒傷時貪鄙。著錢神論刺之曰。親之如兄。字曰孔方。又曰。錢無耳。可使鬼。凡今之人。惟錢而已。韞玉須求善賈。沽語子貢曰。有美玉於斯。韞匱而藏諸。求善賈而沽諸。孔子曰。沽之哉。沽之哉。我待賈者也。註云。子貢以孔子有道不仕。故以此問。孔子言當賣。但當待賈。不當求之耳。泣玉曾聞三獻有。韓非子曰。楚人卞和。得玉璞獻楚懷王。王使玉人相之曰。石也。王以和爲詐。刖其左足。王死。子平王立。和復獻之。王又以爲詐。刖其右足。及死。子荆王立。和又欲獻。恐見害。乃抱璞哭於荆山之下。三日三夜。泣盡繼之以血。王聞。使人問曰。天下刖者多矣。子奚哭之悲。和曰。吾非悲刖也。悲夫寶玉而題之以石。貞士而名之以詐。吾是以悲。隨使獻玉。王使人琢璞果得玉。遂名爲和氏璧。遺金何謂四知無。後漢楊震。迂東萊太守。道經昌邑。所舉荊州茂才王密。爲昌邑令。密謁見。至夜懷金十斤以遺震。震曰。故人知君。君不知故人何也。密曰。暮夜無知者。震曰。天知。神知。子知。我知。何謂無知。密愧而去。國朝劉基覆瓿集絕句九首。異鄉風景不知春。滿地蒼苔一病身。睡起無人問幽獨。杜鵑聲在綠楊津。花自飄零草自榮。何須惆悵獨關情。高軒日永成危坐。隔水風來聞鍛聲。雨餘煙柳約青絲。風過芹塘澹碧漪。正是愁來無著處。綠陰庭館暮寒時。一樹穠華

半夜風平。明枝上十分空。黃蜂紫蝶紛紛去。留得蒼苔藉碎紅。槐葉陰陰覆短牆。微風細雨。麥秋涼。如何一歲三春景。不及閑窗午夢長。淮水東邊舊六朝。瓊樓翠館白雲銷。于今只有垂楊柳。猶似當時舞細腰。花落江皋宿雨晴。野烟消盡見蕪城。鳳簫一去無回日。不及年年綠草生。天塹長江似海深。江頭山鬼笑埋金。東家釀酒西家醉。世上英雄各有心。暖風吹帳日光遲。恰是清和四月時。黃鳥不知人嬾起。未明啼上綠楊枝。又無題。花自飄零水自流。無情有恨月如鉤。十年一枕三更夢。贏得風烟滿地愁。後夜蛾眉約淺黃。河邊猶翳玉繩光。不知何處藤蘿上。全見姮娥一面粧。槐映高樓柳映墀。風來唯有鵲先知。長應別殿黃昏後。記得金宮妬寵時。一片浮雲萬里心。海波無底未爲深。虞淵險迫羲和疾。空使傍人詫鄧林。玉樹沉沉結夜愁。金陵蔓草沒荒丘。誰言錦纜江都去。不見金陵蔓草秋。黃鵠高飛雲路遐。野鳧謀食但泥沙。山中樗櫟年年存。看盡西風木槿花。又漫成。八駿茫茫去不回。白雲歌曲使人哀。鯨魚風起鯨鯢湧。青鳥何由海上來。瞿塘怒水激天風。回首童顏變老翁。落日長年鳴櫓過。白鷗飛出浪花中。微涼生袂一登樓。落照歸鴉點點愁。誰似孤雲獨無事。隨風直到海西頭。階下青苔砌上莎。春深

烟雨自相和。幽蘭生在空山裏。縱有清香奈爾何。沉水香銷金博山。月
滿樓臺深夜寒。瑤琴弦絕不可彈。葉落烏啼尋夢難。江水如天月如水。
落葉蕭蕭夜風起。一寸愁心千萬里。不見行人應未已。春雨日日送愁
來。雨中百花渾未開。青山不見神禹穴。碧草已滿越王臺。魚兒弄水浮還
沒。燕子尋巢去却回。頭白楊雄嬾獻賦。衙門從此掩蒿萊。愁將短髮逢
搖落。漫把殘燈照寂寥。兩地身心悲夜鵲。五更鍾鼓夢春潮。驚寒栢葉垂
垂靜。向日霜華泫泫消。悵望烟塵滿長路。紫芝空長故山苗。又題陸放
翁晚興詩後。雄劍閔寶匣。中夜蛟龍吼。男兒抱志氣。寧肯甘衰朽。松栢
在深谷。枝葉拂星斗。雖無般匠顧。勢自凌培塿。昂昂商山翁。矯矯渭濱叟。
林泉不遐遺。軒冕亦固有。奈何劉伶輩。賤身若芻狗。徒生天地間。辜負髮
與手。三復詠斯章。千載吾尚友。又題鮮于伯機書杜工部詩後。少陵
昔避亂。買屋西枝村。卜鄰得贛公。聊可與晤言。四國鬪豺虎。煙塵塞乾坤。
中宵望北辰。慘戚衰老魂。我今亦漂泊。不得歸本根。感此一太息。欲語聲
復吞。又雜詩。江籬生汀洲。香氣何清婉。欲采寄所思。不憚道路遠。疾
風吹塵沙。山澤蛟蛇混。誰復惜芳菲。空悲歲年晚。小魚頭如針。大魚須
如松。小大各生育。孰私天地功。神靈發滄怒。溟海簸驚風。大魚食小魚。陂

池爲之空。波空水亦竭。小大相噉啜。但見灌莽間。顛骨成崆嶲。殘膏飮螻
螳。孰辨鯨與鱉。饒婦厭負夫。常懷相棄心。慨慕東家子。年少多黃金。輕
身改栖託。布被爛錦衾。寧憶秋風起。霜露淒繁林。葉落枝亦盡。愁聞蜻蛚
吟。雲月雖不明。精魄固長在。飛蛾亦何知。乘時妬光彩。天高多飄風。烟
霧中鬣鬣。紛紛墮蒿棘。終竟爲何罪。人生如浮雲。飄搖無根蒂。昨暮青
山阿。今朝滄江漭。風波無定時。淪躓難爲計。是中苟不爽。曷問耿與翳。申
胥存楚國。仲連却秦帝。此士雖則亡。英名千萬世。渴人常夢飲。饑人常
夢餐。中宵羈旅夢。兩臂生羽翰。騰身入紫霄。吹面天風寒。驚覺凜毛髮。感
我涕沆瀾。吾觀神龍變。天地爲晦冥。龍成宰元化。嘉澤浹四溟。出山不
飄風。入水無震霆。枯萎仰沾漑。沃若生葱青。豈比蜮與蛉。裂石摧巖陁。俾
民舉疾首。抗神蹙眉顛。鷹本是鷲鳥。爪利翮勁疾。胡爲化爲鳩。鈍拙無
與匹。棲遲荆棘間。粒啄營口實。暮啼墻角雨。朝啼屋頭日。昔爲衆鳥畏。今
爲衆鳥啣。運命若不常。孰爲金石質。愚公志移山。精衛思填海。山高海
茫茫。心事金石在。松栢冒雪霜。秀色終不改。春陽熙幽林。卓立有光彩。
急雨漲潢潦。溝池成五湖。青蛙與耿黽。得意鳴相呼。自謂樂無似。至足不
求餘。蓬萊有玄鶴。曾見東海枯。清夜淚長風。哀音繞天衢。使我起太息。黑

髯變霜鬢。空庭生夕陰。高閣留返照。歸鴉集紛紛。棲雀鳴噉噉。冥思觀
群物。肆目展遐眺。草樹蔚參差。雲霞相輝耀。慷慨商山心。想像蘇門嘯。大
鵬搏扶搖。斥鷃翳蓬藿。悠悠共淪汨。潰潰堪一笑。惟豺知祭獸。獺亦知
祭魚。豺獺有報本。人道當何如。華堂飲玉食。盜賊塞中塗。那能不自媿。而
以耀庸愚。吁嗟千載下。枯骨空專車。雷藏蟄蟲伏。雷動蟄蟲起。蟲雷不
相期。冥契非人使。英雄應有時。何異羶致蟻。神劍無風胡。銅花蝕泥滓。
種荷淥池中。荷生葉猶紫。掠萍逐蛙蝸。恐畏傷荷蓋。荷心有露珠。的皜無
泥滓。荷根有藕絲。纏綿誰得似。陰崖有喬樹。乾鵲巢其顛。朝食葉上露。
暮食葉下蟬。巢成長衆雛。鳴飛一何嫺。但願本根固。風雨得安眠。如何就
搖落。而不抱悁悁。蒼蠅眼晝明。蚊蟲眼夜明。明眼利口嘴。晝夜無時停。
拍死紛藉藉。飛來更營營。一旦霜風起。稜威肅天刑。飛者不復飛。鳴者不
復鳴。雖有太陽光。不能照其生。乃知天勝人。智力徒鬪爭。豺狼食人肉。
蚊蟲食人血。食肉死須臾。食血死不輟。哀哀露筋女。肉盡惟皮骨。誰謂蚊
蟲微。積鏞能銷鐵。蟲母羽蟲孽。與人無怨尤。胡爲含毒害。吐蚊吼如牛。
紛紛散草澤。解解森戈矛。無辜受螫蠱。皮破腥血流。覆巢或有令。未應後
鳩鷓。黃鷹食鳥雀。山雞食蟲豸。蜂食花上蜜。蝦食苔間滓。兔食茆草根。

鳳食梧桐子。所嗜由性成。易之則皆死。冥觀付一笑。誰與窮茲理。魯陽
仰揮戈。羲和爲紆轡。耿恭俯拜井。湧液出荒地。精誠所感格。高厚靡不至。
人生亦良難。如何珍其類。蓬蒿蒲六合。慚媿真宰意。在昔信陵君。勞謙
實弘度。好士天下稀。賓客遠傾慕。救趙奪兵符。掃清邯鄲霧。歸來存大梁。
秦甲誓東顧。魏王木偶人。朽心自成蠹。讒言一以入。危石不可擲。日落西
河陰。歌鍾怨零露。天鷓巢蒿草。形軀纖且微。不知懷何事。直上聞天扉。
啾啾終日鳴。天聽不可希。鍛羽口吻裂。落日空悲歸。雉死爲從雌。鷓死
爲鬪力。蜜蜂死洩憤。鳴鳩死求食。象犀好齒角。豺豹美毛色。紛紛死相籍。
殺身奉華飾。自取夫豈過。外至良可惻。驅獍合族烹。梟鴟宜卵殞。山林久
穢薈。誰復繼禹益。天風觸萬竅。小大皆有聲。律呂與懸匏。嘈嘈同一鳴。
人情有所鍾。聲氣爲之使。無知而強聒。則亦縣匏耳。殊俗甘胸臆。比之
芻牛腴。殷勤奉賓客。自謂敬有餘。鷓嚇雖異貫。赤惑誰能祛。靈陰蔽玄象。
清渭混汙渠。誰能繼夏后。再分龍與魚。大星出四方。睽睽如明月。兒童
驚指示。草木見毫髮。夜久斗柄迴。人靜涼風發。徒倚步中庭。空煙散成雪。
楚人將適蜀。揚帆信江水。江濶多西風。帆逸行不止。日暮入海濤。極目
無涯涘。鯨魚吹高浪。舵折檣竿圯。頓足空號呼。烟波千萬里。冲霄難爲

羽泛海難爲舟。縛羊駕戎輅。猛志空悠悠。農時失耕耨。何以望有秋。決藩盜菽粟。鷹隼不如鳩。韶華不我與。去若川水流。歲暮獨彷徨。凜凜懷百憂。

爰居避風翔。豈冀染牲祀。臧孫強自用。取笑於君子。拾蟲養鳳凰。將以爲觀美。徒令暈翟畏。長逝深林裏。神仙不世出。螭蛄笑蜉蝣。嘉禾曠膏

澤。穉穉矜有秋。驅馬將馬往。荆棘滿崇丘。玄陰結嚴冬。芳意坐自道。鴻鵠從何來。哀鳴聲啾啾。願欲適縣圃。路阻迷所投。况我孱懦成。引領空憂愁。

桓温一老兵。豈識捫蝨士。擁衆臨上流。竟作跋扈鬼。符堅匹羗豎。何能作天子。眈眈視中原。爲有景略耳。知人聖難之。求賢在虛已。袁曹豈力敵。

生死一彈指。惆悵後來人。慷慨前車軌。英英木槿花。振振蜉蝣羽。乘彼三秋露。及此六月雨。容好能幾時。生成亦良苦。十年構阿房。一日化爲土。

染鬚作童顏。於身竟何補。不如順天命。保己良多祐。天地若大甕。萬物生其腹。人猶腹中蟲。蠢蠢隨化育。鑽攻無時休。臟腑爲翻覆。帝青調元氣。

豈不畏戎毒。幡然命滌蕩。汗下兼湧血。蚩蚩自狂獠。涓沸交殺戮。何當瞑眩定。風止水歸瀆。鑄鐵作鋤犁。春耕待秋熟。二儀播元氣。晝夜靡停機。

有生即有死。化工亦何私。彼狂帝所欲。冥行失康逵。無航思利涉。發此百禍幾。賊人還自賊。擾擾竟何爲。郭南有窮夫。黃髮對老妻。見人抱兒女。

仰面看天啼。郭北有宕子。鮮服明春閨。累累倚門親。疏茹芝鹽醢。盛年異
欣戚。薄冀空噬臍。達生貴知命。胡爲苦悲悽。咬咬水中鳧。谷谷墻下雞。良
無返哺望。乳抱何棲棲。冥目思此理。惆悵中自迷。盜跖飲梁肉。原思餒窮
閭。夷齊采薇蕨。儀秦駟高車。祥麟殪西狩。尼父空嘆吁。天道果福善。彼蒼
竟何如。老眼昧昏夜。見螢以爲燈。燈螢何足辨。所悲老且瞶。曹老復何
用。甘心就無能。逍遙麋鹿願。所得良已弘。鬼神陰陽精。變化無定迹。如
能禍福人。豈向人求食。而况天地心。怛怛甚正直。祭祀本人情。將以牲與
稷。居歆豈在物。馨香薦明德。葛伯倍不臧。虞公亦何益。前王有舊章。敬之
在無射。海鯨乘扶搖。激水騰九旻。退潮觸泥沙。顛骨空嶙峋。猛虎掉尾
行。飲血不滿唇。跳哮逞雄攫。係首八尺緡。賦命雖在天。成之亦由人。嗟嗟
燈上蛾。亦豈厭其身。夷齊值明時。餓死西山陽。四老生亂世。采芝以徇
佯。李業遇公孫。欲善返受殃。嚴陵辭故人。萬古清名揚。性也寔有命。君子
順其常。漫漫雲間鳥。冥冥隨風翔。海宇豈不寬。六翮有短長。浩歌向日月。
曲盡意茫茫。雜詩 趙女工妙舞。秦娥善清聲。同入楚王宮。各擅傾城
名。宵陪綺席宴。夙侍金輿行。常恐他人至。得寵分恩榮。涕泣奉顏色。冶態
隨風生。願爲松栢枝。莫作日及英。開花不結實。坐傷秋露零。白露出草

根。顆顆如明珠。黃華炫金錢。亦復盈堦除。閑居無尤物。翫之聊可娛。衡門不必扃。此非衆所須。但恐成蕙苾。千載令人吁。服力徇穡事。矻矻望有秋。凌晨荷鋤出。日入且未休。中夜看星辰。早潦切所憂。西成告豐歲。珠璣滿田疇。飽食幸可期。喜色欲盈眸。寧知霜雪早。零落不得收。荒畦委滯穗。槿籬掛空篝。斜陽照白髮。短褐還飯牛。天命固如此。汲汲復何求。季世罕上壽。百歲爲長年。軒皇不可見。顏冉復誰憐。安期乘彩虹。羨門駕紫烟。朝游蓬萊島。夕宿曾城顛。常恐風聲枝。摧折滄海田。徒令驪山客。想望稱神仙。月明棲鳥動。月暗棲鳥定。茅鷓潛枳拘。大眼掛宵鏡。皇天生萬物。一物俾一性。遂令蓋壤間。擾擾事爭競。喧呶窮日夕。豈不慝天聽。化工雖云巧。烏法祇自病。沉思令人嗟。欲問誰與應。蒼蒼山上松。濯濯庭前柳。亭亭拂雲起。矯矯含風久。佳人皎如玉。曠世難爲偶。長歌繼以歎。去鳥盡回首。昔爲瑤草華。今爲蠹餘杻。棄置勿復道。華容不如醜。連成非良器。驟得難久好。桃李望春舒。亦復迎秋槁。薜英耀朝日。未夕委蔓草。饑農種植禾。自慶得食早。歲暮寒凜冽。衡門靜如掃。瀛洲對方壺。弱水爲池沼。不見千年花。安得如瓜棗。徐市駕樓船。輕帆迅於鳥。仙人倘可見。常恐三光老。寄書附文鯨。碧雲空縹緲。宋濂文粹雜體五首。丹桃艷陽質。移自武

陵源。柔風拂纖條。鮮澤沃靈根。吐葩當春茂。結實俟秋蕃。盈盈大如掌。有
色極華丹。衛之不敢褻。期以奉君餐。君餐發靈和。神茲生玉顏。無爲升玄
化。恭默即軒轅。效陸平原。流幻百年中。有如水中泡。虛形本不實。何能
永今朝。悟此造化意。肆情常消搖。夜來新雨至。南園秀芳苗。掇之薦美酒。
冲懷正陶陶。斜川素心人。叩門約遊遨。相携步迥澤。神與品物交。驚颺亂
陵蟬。墜照落巖猿。歸徠枕肱卧。遐思溯汰寥。黃唐不我逮。緬焉心煩勞。效
陶徵君。竹死不變節。蕙焚尚餘馨。秉性有恒操。滯物非至情。左崦結層
構。中園穿空冥。井華遙上白。嵐影時獻青。築竈試丹訣。濡毫謄酒經。一爲
纓笏累。殊嗟神符局。事去慮將澹。感來心已醒。薨薨哀饑鳶。累累嘆凍蠅。
逝將命脩駕。薄言還故垆。斟穠澆陽卉。泛碧破陰華。觀化驗群品。褰襟咏
三精。情素諒已展。爵服吾何營。效謝臨川。周庭體王國。漢制建神區。環
極法北辰。玄莢應蘿圖。綺殿祥飈轉。丹闕寶氣浮。象魏壓輦道。獸環銜金
鋪。宮華錦隊展。御柳翠帟圍。長生臨寓縣。億載握皇符。琛贄九夷集。梯航
百蠻輸。天開睿情懌。道洽臣節孚。奉觴鳩鵲殿。奏䟽承明廬。元功在獻替。
昌言列都俞。殷勤宣大雅。持用補嘉謨。效顏特進。少年趨京洛。京洛多
繁華。迅河日流駛。崇芒鬱巍峩。宛馬游龍行。文軒流水過。晨夕騁般樂。張

筵陳綺羅。觀袂濯魯澗。行酒上陽坡。宛轉七盤舞。縈環北里歌。中有巖棲士。如同顏闔家。尋雲因剪木。飲竇却搴蘿。時盼城關中。流塵深如何。自吃逸德殷。頗興賢達嗟。及時不行樂。長有好容華。效鮑參軍。宋濂羅山集雜詩四首。去去清江曲似蛇。誰憐身世半浮楂。眼中一掬思鄉淚。灑入寒波寄到家。若箇征夫不意家。製衣便合剪秋霞。經年不下潛溪釣。心逐秋風上蓼花。峻嶒病骨縮如蠶。纔到秋深轉不堪。九曲愁腸燒欲碎。西風紅樹帶霜酣。獨騎瘦馬岸烏紗。白首行穿賣酒家。容貌自知顛顛久。醉來不敢見黃花。張孟循詩集曩在京師與內御史涿郡王本中論詩雅相契。令其上都即事詩。有一天秋色在簾鉤之句。賀丞相每諷誦之。既而本中出知磁州。余以憂歸。避地荒僻。不知今除何官。賦二詩以志余意。

昔日磁州王太守。于今闕下轉何官。魏郡歌謠聞已舊。秦州勅目見應難。綠蓑黃帽滄浪水。碧落金莖玉露盤。一別知音寧再得。殷勤驛使報平安。

一天秋色在簾鉤。絕勝當年趙倚樓。丞相每吟星斗上。衲僧傳過海雲陬。周歌總及韶虞日。漢曲新含鼓角秋。記得論詩竝驄馬。雪華吹滿黑貂裘。又舒城李主簿有詩見寄。不到微其重寫。近聞得便寄新詩。轉遞浮沉竟不知。瓊葉吐華須重寫。玉笙同韻莫遙吹。家連楚竹無音信。路結

淮雲有夢思。料得篇中無浪語。鄉心如我共南馳。僧妙聲東臯集題郭義
仲詩集。每誦新裁樂府詞。歷觀群製副深期。蘭茗翡翠春風後。碧海珊
瑚夜月時。吳下篇章誰最好。杜陵才力晚尤奇。何由一鼓滄江柁。春水相
從詠竹枝。又雜詩。悲風抃黃桑。茆舍依楨棘。歲歉兒苦饑。家貧母猶
績。寒窻秉機杼。卒歲不成匹。里胥夜踰門。叫怒催絰織。蹇余晚歸田。畊不
如仲力。一飯愧其人。安敢自皇息。胡鴈乘朔風。矯矯厲羽翼。江南稻梁
地。異彼陰山北。所憂弋者慕。繒繳在尋尺。柰何隨揚侶。自剪排風翮。豈知
絳羅網。復思膏鼎鬲。本不飛真真。于今悔何益。有虞昔南狩。死葬蒼梧
山。帝子泣悲怨。至今竹班班。重華骨已朽。淳朴何時還。我欲往從之。洞庭
汨孱顏。夢寐奠靈瑣。懷椒候其間。安得御風去。揮手謝人寰。美利在於
人。翁張隨所如。上馬有好者。天下將同趨。宣尼常罕言。防源知在初。魏瑩
問利國。孟子亦回車。沛公田舍夫。蕭何刀筆胥。提劍入咸陽。僅收其圖書。
謀生誠止足。制用自可餘。橫流竟莫返。舉世無寧居。西山一何高。草樹
鬱樽樽。仙靈此焉宅。尚有秦遺民。我欲躡丹梯。引手捫青天。天高迥無極。
欲上嗟無因。今天若可上。世上那有人。喬木豈無枝。高山亦有岑。嚶鳥
尚求友。我獨無知音。沉歎和氏璧。掩抑嵇生琴。誰令抱奇蘊。惻惻多苦心。

永樂大典卷之四百
廿五

荅祿與權詩集雜詩四十七首。東風扇微綠。卉木日蕃滋。慨此春榮花。寧忘冬悴時。澗底松鬱鬱。淇澳竹猗猗。物性固難變。千春恒若斯。勾芒布春令。微和蒲郊墟。開門足生意。青青見園蔬。抱瓮時灌溉。植杖自耰鋤。寄迹衡門下。神閑體亦舒。靜坐掩虛室。塵事何擾擾。齋心服我形。稍欣繁慮少。披襟澹忘機。味道窮幽杳。俯聽枝上蟬。仰看雲間鳥。好風何處來。悠悠動林杪。一笑天宇開。百年靜中了。積雨憂我心。雨晴還可喜。樹響清風來。天空白雲起。林光動逸興。鳥語清閑耳。宴坐久忘機。澹然獨凭几。偃息南窻下。快此涼風夕。手把一編書。仰看天正碧。矧茲都邑士。迥若山林客。幸無案牘勞。聊任詩書責。慮淡神自清。身閑地仍僻。坐待月華升。中夜頻移席。黃河自天來。日夜無停奔。崩騰蕩山嶽。浩汗徹乾坤。龍馬負圖出。羲皇道彌敦。妙契畫前易。人文今古存。至人不可見。至理諒可論。恭惟千載下。獲仰聖謨尊。人言溟海上。靈槎蟠古根。張騫骨已朽。誰復窮其源。猗蘭生園中。含馨媚幽色。不與芝同芳。乃與蒿並植。溥霑時雨滋。日夜各生息。異類等敷榮。此意誰能識。秋蘭出幽谷。託根臨軒楹。微馨散閨闈。隨風有餘清。美人紉爲佩。素花間紫莖。令德良自貴。慎勿當門生。中夜群動息。寒鴉栖復驚。西風颯然至。萬木皆商聲。達人塵慮絕。仰瞻

星漢明。洒心遊八極。但覺元氣清。俯彼階下草。湛湛寒露凝。寒露已爲霜。豈知非堅冰。所以古人心。慎初惟戰兢。至教有如此。慄馬獨撫膺。寒蟬響不息。宛在庭樹叢。朝飲葉間露。夕吟木杪風。浮游埃塵外。蛻形濁穢中。尸解等仙遊。凡類孰與同。瓠蛆雜糞壤。反以安其躬。斥鷃笑鵬鳥。奮翼翔蒿蓬。物類有清濁。世道有汙隆。悵然拂衣起。目送天邊鴻。凌晨適南畝。駕言觀我田。我田奚不臧。狼莠鬱芊芊。願耘歎力薄。釋此愁思牽。及時功不懈。終期大有年。在昔顏氏子。陋巷困簞瓢。爲邦兼四代。克復在一朝。青蠅附驥尾。騰驤千里遙。竭才方卓爾。奚暇嗟無聊。負暄茅屋下。采芹南澗濱。野人效微忠。持此將獻君。矧茲青雲士。學道觀人文。大節誠有虧。功名安足云。陳蕃旣下榻。蔡邕還倒屣。上有賢主人。下有高世士。今古同一時。胡寧獨異此。周公躬吐握。千春照文史。綺園成羽翼。采芝商山岑。魯連却秦軍。長揖謝黃金。功成身亦退。不受名迹侵。寥寥千載後。誰識斯人心。紈素麗且潔。實勞機杼功。製爲團團扇。爲君播仁風。仁風被四海。熙熙百世同。秋至商飈發。棄擲靡所庸。行藏隨所遇。哀哉吾道窮。楚國賤荆璞。棄之等沙礫。宋人寶燕石。藏之重圭璧。舉世目多盲。茫然無所識。賢愚共乘軒。誰分堯與跖。班姬歎紈扇。韓子悲短檠。篋笥尚有恩。牆

角竟何情。物理有窮達。人心有愛憎。用舍諒難恃。哲人宜靜聽。我有三尺琴。泠泠倚桐質。上無冰絲絃。妙音誰能識。高人得深趣。時時橫在膝。摩挲久沉吟。悟悅心自懌。終焉無與愬。俛首常淵默。漁磯在洛濱。書舍依鳳麓。把釣月生波。讀書雲滿屋。上焉友千古。下焉不耦俗。至樂諒斯存。胡爲歎幽獨。杖藜步原野。愛此春山深。丹霞曜其陽。白雲生其陰。坐覺群生遂。行聞孤鳥吟。安得一壺酒。自酌還自斟。俯仰天地間。陶然樂吾心。窮居在陋巷。所親瓢與箪。蓬廬無客過。棘門晝常關。豈不念妻子。豈不憂饑寒。賴有古人書。使我開心顏。生年幾六十。好古希前脩。時時持簡編。寸心常悠悠。貧賤非我感。富貴非我求。天爵苟自尊。世事焉足謀。手持唐虞典。欣欣慕古人。上有堯舜君。下有巢由民。我獨奚爲者。幽居洛水濱。願言時太康。躬耕不厭貧。四時有代謝。人生有盛衰。吾今老將至。斑斑髮如絲。幸茲康且寧。好德心孳孳。但願考終命。樂天復奚疑。太空無纖雲。十五清光圓。止水風不興。中有青青天。哲人體玄化。洒心常湛然。此樂真自得。此意不可傳。我有金蓮炬。揚暉照無垠。千燈與萬燈。自我一炬分。燈燈各自明。我炬長有神。煌煌一寸光。夜夜如三春。忘機北山公。抱拙丹溪客。混沌猶未分。焉知玄與白。所以古人心。直道以爲則。塊然天地

間。俛首長淵默。武子百世師。柴也千載人。小智不自鑿。乃得全吾真。我
思灌園者。抱瓮良苦辛。極知事桔槔。機心誠可嗔。明月出東隅。揚暉燭
我堂。涓涓行空谷。皎皎遙相望。舉酒酌明月。我亦盡一觴。嘉會在今夕。歡
娛猶未央。常恐晦朔交。清光深自藏。與汝不相見。淚下空霓裳。玄陰散
寒雨。布襦淒以風。川途泥瀆漉。林藪煙溟濛。茲惟秋冬交。少昊收成功。納
禾嗟改歲。來賓悲遠鴻。吾生抱幽獨。養拙衡門中。感時歎無褐。寄身憐轉
蓬。幽貞乃有吉。勞謙乃有終。此懷諒難託。歲暮心忡忡。設教有先後。人
才有賢愚。草木自區別。格言乃譬諸。小子當洒掃。實與誠意俱。君子體諸
身。進脩本同途。商偃遊洙泗。文學固有餘。信道苟不篤。判然言論殊。及門
三千士。訓誨無親疎。循循善誘人。孰令躡等趨。宣尼今尚存。六經語不虛。
誦言能自勉。不愧君子儒。人生如飛蓬。飄蕩隨風轉。及時不爲樂。日月
去人遠。華亭有鳴鶴。上蔡有黃犬。已矣復何言。追遊諒非晚。中年衰且
貧。獨抱固窮節。傾壺有醕漿。葱菁儼成列。人情賤清素。門無長者轍。我本
淵憲徒。商歌心自悅。仲冬風氣寒。緼袍猶未具。擁膝憇衡門。交臂行中
路。惡服非吾慙。狐貉非吾慕。由也百世師。斯道宜深悟。雪落何紛紛。北
風何颼颼。袁安居陋巷。偃卧非自高。顏淵與原憲。飯麩還鋪糟。道德雖云

尊奉養良獨勞。我亦固窮者。跼蹐在蓬蒿。有生信如此。今古誰能逃。黽勉思先哲。異世爲同抱。居易俟天命。庶慰心忉忉。夷齊志高潔。守經終不移。遯迹首陽阿。長吟薇蕨詞。清風起頑悞。百世同一時。君子貴中庸。試用此道推。又偶成四首。夜氣沉沉萬象幽。長楊憔悴幾經秋。星眸月面無人識。露泣風啼總是愁。鵲橋牛女赴佳期。銀漢無聲素月移。夢裏相逢還又別。可憐歡會不多時。獨著荷衣汗漫遊。長風萬里去悠悠。月明露冷千巖靜。老鶴一聲天地秋。清夜披衣上石床。月華爲牖洞爲房。洞前手種松千尺。始覺山中日月長。劉嵩詩集讀范太史詩。麒麟鳳凰不世出。我思美人寧有終。飄然一去不可挽。徒令四海歌清風。忼慨范夫子。行高身益窮。讀書白雲下。養母青山中。大布之衣烏角巾。於世不悟亦不同。時來清江弄明月。瀟灑絕似商山翁。乘時徒步謁京國。一鷄矯矯飛南東。群龍方滿朝。惟爾獨來晚。豈無五色線。可補舜華袞。當時作者揚與虞。倡和徃徃諧笙箏。藍田共擬雪色玉。滄海獨携明月珠。一朝低迴去臺閣。騎馬南入閩中幕。幕中三任總知名。江海高風動寥廓。蹇予束髮弄筆時。已解竊寫中朝詩。獨憐生晚墮荒僻。每誦制作增漣沔。我我百丈遺靈臯。安得披榛薦卮豆。茲晨再讀海康稟。玉立踈髯恍神覲。嗟哉老成今不存。

箏笛蒲耳愁喧喧。百年氣運有屯復。月落南山空斷魂。又夜宿永古寺。與孤峯上人談詩。蓮華池上月如霜。金地無塵夕景涼。海藏暗浮龍影動。露盤微注鶴聲長。雲栖梵鉢留僧供。風隱鉢衣護佛香。一夜不眠聽說法。雨花撩亂蒲禪床。又讀薩天錫詩。三策當年動赤墀。一官南郡奏朱絲。參軍情性丹陽酒。御史聲華白下詩。騏驥雪迷沙苑道。鳳凰春隔上林枝。江淮蕭瑟風流遠。獨坐秋山有所思。又偶閱胡思齊詩。追憶故友。范實夫李子翀。曾共雲邊看晚晴。夫容峯下聽灘聲。當時范李今何在。愁向詩中見姓名。錢宰臨安集擬古十九首。古詩十九首。有風雅之遺音焉。或者謂其未能一於雅正也。余嘗擬之。其一。行行重行行。賢者不得於君而作。然但祝之以努力加餐而已。今擬曰。願言崇明德。無爲終棄捐。庶幾有規諫之意焉。其二。青青河畔草。刺輕於仕進而不能守節者。然但結之以空床難獨守。則濫已甚矣。今擬曰。褰裳竟何爲。日夕終風暴。庶幾有警戒之意焉。今日良燕會。美士之不苟進也。然結之以無爲守貧賤。若勸之使苟進矣。今擬曰。無爲受羈絆。回車駕言邁。自傷不見用於時也。然結之以榮名以爲寶。若急於仕矣。今擬曰。榮名何足言。東城高且長。自傷不得仕進。而惟燕趙多佳人之比。今擬曰。鄒魯多哲人。束帶陞其堂。生年

不滿百。勉人及時燕樂。而惟仙人王子喬之慕。今儼曰。重華何人哉。還可與等夷。皆勉之使歸于正云。諸篇皆然。出門萬里別。行行遠防邊。相望各天末。北斗日夜躔。四運秋復春。不見君子還。燕車北其轍。越馬南其轅。目遠心愈近。悵望徒懸懸。黃雲暗關塞。路險不見天。式微夫如何。日月忽已遷。願言崇明德。無爲終棄捐。灼灼堦上花。離離堦下草。盈盈倚市門。粲粲顏色好。對客巧趨蹌。當歌善窈窕。母爲逞妖冶。愧爾增譁傲。褰裳竟何爲。日夕終風暴。青青霸陵草。莽莽長安道。人生如過客。鬢髮白已蚤。及此芳春節。灞水流浩浩。豈無一尊酒。逍遙散幽抱。命駕出北征。貴游多年少。白馬金絡頭。瓊筵相輝耀。燕姬間秦箏。夾坐紛窈窕。縱飲極娛樂。沈幽何嗟悼。置酒開華宴。行樂及芳辰。吳趨理妙曲。逸饗沈行雲。雅調暢高情。和者如陽春。同心夙所契。適趣當爲陳。叢林下翔鳥。晴川見游鱗。何當解余佩。怡然樂天真。無爲受羈絆。局促悲苦辛。高臺何巍巍。參差與雲平。玉繩臨雙闕。長河流無聲。上有羽衣人。逍遙吹玉笙。清響涵明月。飛佩何泠泠。借問弄者誰。疑是董雙成。逸思隨風發。無人識其聲。曲終再三歎。感慨有餘情。所悲同門友。局促趨世榮。願將秋水劍。爲之解塵纓。笑呼雙黃鵠。與子俱遠征。涉海採琅玕。紅者珊瑚枝。明珠盈懷袖。將以遺所

思海闊不得返。所寶莫致之。爛其納我室。抱璞將何爲。皎皎明月光。照我屋東頭。寒螿鳴樹間。招搖指孟秋。白露下高梧。落葉聲颼颼。寒暑更變遷。河漢東南流。懷哉里中兒。奮志起遠遊。飄然逝長風。乘槎犯牽牛。支機織女石。爲問今在不。水深波濤闊。浮名將焉求。青青梧桐樹。托根在高岡。與子新合歡。翁如鳳與凰。鳳凰鳴鏘鏘。合歡期世昌。歡情一何短。離思一何長。嗟彼籬下菊。含英揚其芳。晨霜秉貞節。寧隨秋草黃。終當採而佩。歲晏夫何傷。中林多幽蘭。泣離雜芳蓀。采之酌春酒。將以清心魂。持杯未及飲。悵然念王孫。王孫不歸來。置酒在芳尊。河東有織女。皎皎雲爲章。手弄機上絲。日夕更七襄。織成五色文。欲製君子裳。莫言隔秋水。可以駕飛梁。睨彼牽牛星。終日不服箱。青郊一何曠。悠悠駕飛轅。好風從東來。百花徧中園。所嗟花下人。華髮愧芳妍。盛衰固常理。何必金石堅。朝聞庶有得。夕死不愧天。花開已復謝。榮名何足言。空階白露下。秋氣日夜涼。悲風動高梧。落葉淒已黃。四叙逝流易。歲晏髮旣蒼。興懷感逝川。長歎惜流光。勇躍勵情志。毋使徒悲傷。鄒魯多哲人。美者金玉相。被服黼與黻。斐然爛成章。至今猗蘭操。遺響一何長。馳情整華佩。躑躅增悵望。何當秣余馬。束帶陞其堂。朝登太行山。山下見古墓。生時諒英雄。覆屐封且固。

千秋萬歲後。荆棘沒廣路。狐兔穴其中。躑躅走樵豎。朽骨食已無。螻蟻上
枯樹。人生天壤間。歲月如脫兔。日往月斯臨。寒至暑則去。方生何控搏。之
死亦奚懼。吾將學長生。空同渺何許。酒至輒盡觴。曲肱樂吾趣。死者如
逝水。生者如浮雲。郭西蒿里塋。累累盡荆榛。終古一長夜。永寐不復晨。落
日下牛羊。叢棘蔽斷麟。不如東家丘。崇岡氣氤氲。樵蘇代有禁。聖澤日已
新。人生無百歲。每作千歲期。月出日已沒。流光疾如馳。哲人惜寸陰。進
德當及時。嗟彼自放者。且復樂今茲。重華何人哉。還可與等夷。孟秋涼
風至。噦噦鴈南翔。游子在中野。卒歲嗟無裳。豈無同心友。悠悠阻關梁。昨
宵夢見之。劈手陞其堂。美人懷昔歡。贈以金玉相。願得長切磨。狂斐藉成
章。神交不斯須。寤起增煩傷。恨不生羽翰。與子永徜徉。如何顧盼意。引領
遙相望。念我心尚爾。君情諒不忘。十五明月滿。十六月已虧。月虧旁死
鬼。初三已生輝。愁多感時邁。涼風夕淒其。仰看明月光。零露沾裳衣。故人
有短書。寄之鴈南飛。但寫長相憶。不及早來歸。把書起長歎。草虫鳴何悲。
區區念子心。無使久相違。故人萬里別。海水日夜深。南風海上來。遺我
雙南金。不見故人面。乃見故人心。鑄作黃金徽。置之白玉琴。彈爲別鶴操。
聞以懷湘吟。曲終聽者稀。矯首望知音。出門見新月。揚輝照我裳。褰裳

起悵望。美人天一方。長安信佳麗。不如歸故鄉。王事方靡盬。離思徒彷徨。
願君樹明德。賤妾有耿光。又擬古。長江東流去。來者方不息。白日沒
西山。晨光還奕奕。春花瘁復榮。秋草黃已碧。造化無停機。循環豈終極。人
生天壤間。少壯須努力。浮槎不土著。摧折在山阿。一朝洪流發。漂蕩入
長波。浩浩去無極。江海安可涯。類此羈旅人。經年不還家。途窮無相知。歲
晏將如何。沈憂不得返。徒使衣帶緩。旭日照下土。渚風耀其輝。輝耀未
及遠。浮雲已蔽之。淫雨瀰川澤。重陰翳四垂。來牟委疇隴。農事安所施。浩
浩洪波翻。舟楫不得維。文命去已遠。悵然起遐思。山中有神人。逍遙若
處子。饑來餐朝霞。渴飲銀漢水。舉世慕金丹。誰能達其理。瀛洲有微茫。弱
水渺千里。掩關絕塵交。相去諒亦邇。庭樹日已黃。白髮日已短。候蟲鳴
前除。秋霜蕙花晚。歲月如奔駒。六轡不可挽。泛舟涉方瀛。方瀛水清淺。安
期邈難求。吾揖亦已返。花開醉復斟。黍熟饑自飯。逍然樂悟生。瑤島諒不
遠。蘇平仲太史集絕句。落葉滿衡門。蕭蕭風雨夕。一燈溪上明。何處獨
歸客。幽花陣陣隨風減。芳草萋萋逐雨添。悶倚瑣窗聽紫燕。不知粉蝶
過朱簾。雜詩二首。富貴每多合。貧賤恒見疎。自我罷朝請。於今四月
餘。平生交親者。對之良可吁。深情劇山海。厚貌彌勤渠。微君仗高誼。何以

慰窮途。豁達見肝膽。疊疊忘其幼。君雖今人居。君乃古人徒。還家信可喜。還家亦可悲。喜全骨肉親。悲與故舊辭。吳越各異縣。關河復間之。明日一尊酒。何由共歡持。念念不忍別。戚戚臨交歧。童子笑謂我。悲戚亦奚爲。自非形與影。安得長相隨。清江貝廷臣集雜詩。我聞度朔山。蟠桃何鬱鬱。千歲纔一花。結子復何日。食之云不死。敷腴反枯質。跨鶴凌九天。將期五龍匹。諒非廣成子。欲待安可必。祖龍帝六合。不暇談黃虞。且復求神仙。入海窺方壺。置酒阜鄉亭。超然忘故都。空留赤玉舄。安期今有無。種桑飼春蠶。桑葉何沃若。種瓜待秋摘。瓜蔓何漠漠。春秋各有獲。在野猶可樂。君看金張館。草深狐兔宅。勿較是與非。看雲倚高閣。大哉龍門樹。鬱鬱上蒼天。根株豈不固。小草還相纏。蓐收行素秋。淒其風露寒。病葉危欲墮。翔禽亦已遷。朝華痛夕殞。掩淚復何言。結束將何之。龍門訪陳迹。戒途及良辰。置酒別親戚。迢迢越千里。人馬疲登陟。大江不可濟。天方限南北。悵然迴吾駕。去從山林適。春山一雨過。百草皆縱橫。百草不出山。山中人遠行。懷金別妻子。殉祿辭父兄。寒暑忽已易。燕趙千里程。龍門能碎舟。風浪安可爭。性命輕鴻毛。苦爲朝暮營。愧此山中草。萋萋林下生。薛公未罷相。賓客競相傾。一朝偶失意。門無珠履聲。貴賤已如此。何論死與

生。秋燕辭空室。春蝶抱留英。盈虛信物理。聚散亦人情。達士甘寂寞。力耕
謝華纓。道尊豈戀祿。心遠孰希名。腐鼠非吾餌。朱鳳以時鳴。悠然動遐想。
五鼎益爲輕。又錢彥彬抄詩爲賦一首。好古思古人。古詩朝暮讀。澹
泊玄酒味。和平綠琴曲。古人今白骨。古意不諧俗。已歎知者稀。古淚空滿
掬。錢起亦敦古。其人美如玉。昨昔忽相過。大雪山中宿。不知破硯水。抄詩
夜燃燭。諒非鮑謝才。可繼曹劉躅。聽之詎能歎。舊葉且當束。丁一鶴詩。

大道日已蕪。游談紛瑣瑣。韓非不得死。商鞅終梯禍。偉哉高世士。結屋
青山左。年來頗得道。已覺初心果。朝漱王池津。夜存金鼎火。御氣超六虛。
萬物真螺贏。又漫成。今朝無酒只清坐。落筆猶有氣凌雲。天下黃金
賤如土。何人爲購相如文。東隣昨日收白骨。西隣今日啼青娥。傷心又
過中元節。城下招魂應便多。平生落落苦難合。十五讀書今老翁。却怕
秋來添客思。梧桐昨夜又西風。南金大貝亦何物。六月胡商死道邊。蒲
地清陰日亭午。老夫高枕北窓眠。又無題。樓臺十二近藍橋。簾幙重
遮半面嬌。洛浦有神通子建。天壇無意會文簫。仙衣雪皎裁蟬翼。寶髻雲
鬆插鳳翹。月落江寒春夢斷。相思空寄海門潮。錦瑟鸞笙恨總牽。尚思
華屋對嬋娟。春風豆蔻初含日。玉女蘭香未嫁年。綃折鴛鴦裁寶扇。酒行

琥珀瀉銀船。蓬萊一別三清淺。憔悴應知不及前。又發春試筆一首。
宮花無意插烏巾。暫到金門遂乞身。不用天官書上第。已蒙學士喚山人。
葛洪井畔應堪老。范蠡湖邊又見春。重賦遂初慚造化。狂歌痛飲樂吾真。
謝肅密菴詩。蒙庚戌秋七月。中山劉坦之先生。補註選詩。辭簡而事明。倫
切而指達。正五臣之荒謬。黜蒼山之淺鄙。擷花采實成一家言。蓋可以行
今而傳後者也。詩以美之。西風吹雨作朝晴。覽鏡應憐白髮生。金馬玉
堂寧入夢。石田茅屋豈關情。五言謾寫林間竹。初醞聊飛海上觥。不有簡
編工著述。悠悠百世竟何名。張孟兼集雜詩。今晨振我衣。起作溪上遊。
好鳥若喚客。兩兩鳴相求。我心忽不樂。竚立河之洲。爾鳥亦不鳴。飛去山
木幽。呼童採蒲艾。置之塵几間。更滌古銅瓶。浸以清潺湲。兀坐終對此。
隱然怡我顏。愧爾亂莨莠。冶色空爛斑。千岳藏爽氣。及此夏日長。我生
更休暇。散坐岳之傍。草木自多茂。心境恒清涼。不須結茅宇。托此永相忘。
大雅集偶題。漁波微動上湘簾。圓沼初成小鏡奩。葉底翠丸青可摘。小
娃纖手送吳鹽。又絕句。東風細雨濕窻紗。日晏黃蜂未報衙。芳草蒲
庭隨意綠。時時吹落碧桃花。小徑斜穿入竹林。曲闌通轉亞花陰。墻隈
勢逼風如旋。落地殘紅幾許深。宋玄僖庸庵後蒙三月二十三日。出南門

訪柯人。及還遇張與權。借過建初佛舍。觀畫題詩之際。與權出舊紙索詩。遂爲書五十六字。南郭春晴。穀雨餘。爲尋仙客過郊居。留侯孫子歸途。遇佛氏園林與世疎。頻見赤松清夢裏。同遊寶地綠陰初。老夫已悟人間事。爾祖丹經願起予。僧宗泐全室集偶作。蹉跎歲將盡。守此山寺間。累月事營作。茲晨始暫閑。松床聊拂拭。焚香方掩關。吾途行不遠。初服庶可還。末事盡何益。祇使摧朱顏。眷言南軒下。靜覺天地寬。棄置千歲憂。展以一日懽。初陽有微燠。群鵲噪簷端。起來命徒偶。共登溪上山。人事天時不可常。纔經炎暑又逢涼。芭蕉自解知秋早。蟋蟀如能識夜長。向日高臺還走鹿。只今滄海已成桑。殷勤說與權豪客。鳥盡良弓自合藏。又無題。欲上青天盡道難。下方無策問仙官。秦堦却被重雲掩。清島還遭大水漫。顧兔身從何處入。若華根自幾年蟠。憑誰說與司權者。莫使人間有熱寒。又古詩二首。高高道傍樹。有鳥來作巢。嚙枝未斂翮。風雨復漂搖。託身諒失所。移居北林坳。狐狸取子去。哀鳴亦嗷嗷。嗟爾一微物。有生良亦勞。長咏倚松閣。空山暮蕭條。周季昔不競。龍虎相噬吞。干戈旣浩浩。縱橫亦紜紜。吁嗟陽人聚。萬古啓降門。後來軹道側。銜璧禮彌敦。天道與人事。反復何足論。所以忘世客。掩耳不願聞。又雜詩。落葉委通渠。紛

然無人掃。但覩新行迹。不見舊時道。古木倚道傍。亂藤絡其杪。歲暮雖青
青。終非本容好。世人懷仕途。悟此若不早。振衣無後期。來從漢陰老。少
小薄世榮。雲泉寄幽賞。冉冉三十年。誤身隨塵網。流形大化內。萬古同羈
鞅。得中久已安。遺外非所強。但望還山雲。時時結遐想。娑娑雙桂樹。芳枝
春正長。自我來涇川。星歲已再周。託茲山水勝。謂可成遲留。柰何外物
牽。撫事心悠悠。久知世道惡。奚事仍夷猶。橘林有奇鶴。未嘗識羅浮。翩然
覓靈鳳。接翅崑崙丘。群邪可干正。衆枉能矯直。蕭條孤生篁。隱忍在叢
棘。白璧竟何愆。青蠅自懷慝。公論苟不存。孰辨夷與趾。吕梁險可逾。大行
危可陟。如何方寸間。中自多荆棘。尊前生白刃。舟中起敵國。一感睚眦。瞋
報之甚仇。隙吐嗟難與居。俯仰隘八極。思欲凌風翔。恨無凌風翼。伯陽
西度關。仲尼東浮海。道大無所容。一身置何在。蘭蕙秋風前。芳馨竟誰采。
天道自茫茫。知命不復悔。栖栖止百年。赫赫向千載。猛虎出深山。往往
多渴饑。閑居肆彼惡。噓突當九達。機檻素不設。赤手安可羈。衝颺激脩坂。
白日異陰霾。吾思陽羨子。延佇心淒其。夜久無與適。塊然坐中堂。白鳥
亦何多。營營來我傍。靜言聊假寐。遂以襲單裳。諧膚猶可忍。聒耳諒難當。
晨星耀東廡。明月度西廂。念爾能幾何。滅跡於朝陽。禍福無定在。倚伏

誰先知。於事已難料。於理亦固推。西伯稱大聖。美里却見縻。况居千載下。
風教日已衰。願君畧形累。所存心不期。魯連天下士。片言能解紛。千金
博一笑。永絕平原君。高蹈東海上。卷舒若浮雲。清風散八表。繼者今誰聞。
四月維孟夏。六陰云已盈。靡草夕凋瘵。螻蝻晨悲鳴。運叙迭張王。萬彙
紛枯榮。斯理信昭灼。君子宜守貞。清晨曲肱卧。夢昇華頂岑。殊庭就巖
構。左右脩竹林。仙人五六輩。列坐調玉琴。莞然顧我笑。余獨何苦心。石梁
有懸水。濯此塵中襟。劉漣自怡集漫成二首。暖日融和管發生。柳條爆
眼麥菁菁。化工辛苦先施設。臘底春前見此情。落梅過雨委蒲地。辛夷
數株花已齊。不須爛漫競春色。桃樹李樹根成蹊。張宏江湖吟嘯集丁鶴
年嘗有詩曰。畫舫載春天上坐。紫騮馱醉月中歸。余愛其奇。因續以成篇。
少年文采連京畿。壯志凌雲逸興飛。畫舫載春天上坐。紫騮馱醉月中
歸。美人歌罷花成陣。豪客題來錦作圍。自是風流超物外。姓名何用籍金
閨。高季迪缶鳴集夜聞謝太史誦李杜詩。前歌蜀道難。後歌徧仄行。商
聲激烈出破屋。林鳥夜起隣人驚。我愁寂寞正欲眠。聽此起坐心茫然。高
歌隔舍與相和。雙淚迸落青燈前。李供奉杜拾遺。當時流落俱堪悲。嚴公
欲殺力士怒。白首江海長憂饑。二子高才且如此。君今與我得何爲。願祿

詩藁題邵文伯家藏仇山村白湛淵二先生贈其先世詩後。白頭偃僂
邵平孫。鐵杖鏗然遠扣門。先世橐金俱散盡。故人遺墨喜猶存。又主文
官趙公德彰詩附見。今夜文星聚一堂。東吳文學最非常。心清我識如
陶令。腰瘦人疑類沈郎。筆陣久排山嶽壯。詞鋒端捲海濤狂。高歌痛飲雖
無厭。要拔人材貢
帝鄉。答宋景濂學士論詩。風雅凋零降黍離。竟從刪後已無詩。嘲風詠
月非吾事。只愛
忠君杜拾遺。

永樂大典卷之九百四

重錄總校官侍郎臣高拱

學士臣瞿景淳

分校官編修臣陶大臨

書寫儒士臣謝用樞

圈點監生臣叢仲楫

臣徐璜



